

FRANCISCI  
BENCII

AB. AQVA. PENDENTE

E. SOCIETATE. IESV  
CARMINVM

LIBRI. QVATTVOR

EIVSDEM. ERGASTVS



ROMÆ, Apud Iacobum Tornerium.

CIO. IO. XC \*

FRANCIS

BENGLI

AR. JOVA RENDENTE

F. SOCIETATE ILLE

C. AM. M. M.

LIBRI QUINTI

LIBRARI. C. C. C. C.



LIBRARI. C. C. C. C.

LIBRARI. C. C. C. C.

FRANCISCVS

BENCIVS

SOCIETATIS. IESV

FRANCISCO. SFORTIAE

S. R. E. *(cardinali amplissimo*

*S. P. D*



VLTAE me

communes cau-  
sae propriaeque  
impulerunt ,

Francisce Sfor-  
tia Cardinalis ,

siue cum superiorem vitam retexe-  
rem meam & naturalem cognatio-  
nem, siue cum cogitare praesentem,

*scribit*

\*

2

& sanctioris

Et sanctioris vincula societatis, ut  
hoc quicquid est munusculi offerrem  
tibi, intelligebam videlicet me eadem  
opera gratum facturum compluribus  
necessarijs meis mihi coniunctissimis,  
qui summis viris famaue Et vir-  
tute celeberrimis Mario Et Paulo  
patruis tuis mirifice addicti semper  
ac dediti fuere : Et Francisco pri-  
mum parenti meo, quem tum sua i-  
psius causa, tum etiam mea, illi ydem  
tui patruui, Et tu in primis Cardina-  
lis amplissime prosequimini beneuo-  
lencia non vulgari : qua ille maxime  
cogitatione sustentat crudam suam  
adhuc Et viridem senectutem :  
Francisco deinde Morello, eiusque  
fratribus germanis, meis consobrinis,  
qui in obsequio quod acceperunt a  
patre



patre, quasi hereditario iure perseue-  
rant. neq. non aliquid Hasdrubal po-  
tuit. Andreae Benciij filius, tui studio-  
sissimus, eaq. terra vbi primū hausi  
hanc caeli lucem, quae & nunc gau-  
det voluntario patrocinio excellentis-  
simae familiae tuae, & laetata est o-  
lim eiusdē imperio ac ditione. Nam  
quid de me dicam? qui cū essem edu-  
ctus atque edoctus hac spe, vt quātū-  
lum possem ingenio ac doctrina in ser-  
uire tuis, a patribus Societatis Iesu,  
quibus vitae meae moderādae ac re-  
gendae quasdā quasi habenas cōmi-  
si, illa superiora nesciētibus, iussus sū,  
vt quibuscūque in rebus sciā possim-  
que morē gerā voluntati ac dignitati  
tuae? Ergo haec, etsi habent ali-  
quid commune, tamquam propria

numerentur . Sequuntur commu-  
nia : immortalia nimirum beneficia,  
mea quibus Sodalitas obstrictam se  
esse profitetur Gregorio XIII pro-  
pinquo tuo , qui immensa beneficen-  
tia , & religionis propagandae cura  
supremam mortalium & caelo pro-  
ximam dignitatem acquavit : quae  
eius beneficia talia sunt ac tanta , ut  
& in nostrorum omnium animis at-  
que ore versentur , nec memorentur  
a me ipso , cum sint in oculis Roma-  
nae Urbis , & totius prope orbis Chri-  
stiani . Has igitur ob res , non effu-  
gissẽm , ut arbitror , reprehensionem  
hominum prudentium , si e duobus li-  
bellis meis qui nunc exeunt ( quando  
unus iam diu erat desponsus ) alter  
non praescripsisset sibi nomen illustri-  
simae

*simae amplitudinis tuae. Maluisssem  
sane, haec quae offeruntur, meliora  
esse, ac digniora admirabili tuo inge-  
nio, & quo teneris studio rerum gra-  
uissimarum : sed neque a mea im-  
becillitate in praesens maiora existere  
potuerunt, & fidem mihi facit tua  
humanitas ac nominis magnitudo,  
ut benignitate suscipientis, ipsius rei  
quae offertur exilitas augeatur. Vale.  
E Collegio Romano Pr. Kal. Octob.  
CIC IC X C*

3 Collegio Romano P. A. O. B. O.  
 quae ostent eximie augentur. Tale  
 ut beatitudine sustentis ipsius rei  
 humanitas ac nominis magnitudo,  
 poterunt, & felix vultu facit nos  
 docuisse in praesentibus existere  
 & in futurum: sed neque a nos im-  
 mo, & quod tenetis studio terminare  
 esse, in signore & in vobis duo inge-  
 re, & in pace operari, meo  
 meae & in vobis meae. Vale. Amen

3 X CI CIO





# I N D E X

## CARMINVM

### LIBER PRIMVS

Poëmatum heroico carmine  
descriptorum. Eorum  
nomina hæc sunt.



<b>A</b> RMEN quo quaeritur quae sit opti- ma ratio tranquillioris vitae instituen- dae	pag. 1
De origine Rhetoricae	16
Epicedium Pauli Stellae	35
De alma domo Lauretana	39
De obelisco Vaticano	45
De tholo S. Petri	48
Iudicium Laboris & Torporis	55
Precatio ad Deum	67
Aliud carmen eiusdem argumenti	68
Aliud	69
Antonio Quaerengo	71
Ad duos Cardinales	73
Ad Cardinalem Maurocenum	74

# I N D E X

## L I B E R S E C V N D V S

continet odas viginti,

hymnos nouem.

<b>A</b>	D. Gregorium XIII. P. M. in translatione S. Gregorij Nazianzeni. ode prima, pag. 76	
	In eadem	79
	Ad Christum pro Flandria	80
	Ad Flandriam	81
	In die Sanctorum Innocentium	83
	Ode sexta	84
	Ad Philippum Regem Hispaniarum	85
	De eodem	85
	De obstetricibus Aegyptijs	86
	De Sanctis Abundio & Abundantio	88
	Ad Martyres	92
	In funere Caroli Ducis Cluiac	93
	Ad Gulielmum Caroli patrem	96
	Ad Ioannem Moronum Cardinalem	97
	De Romae Nouae victoriae	98
	De Virtute ex Aristotele	100
	Collegium Romanum. Anagrammatismus	100
	Ignatius de Loiola. Anagrammatismus	101
	Ad Petrum Magnum	103
	De obelisco Vaticano	105






# I N D E X

## LIBER TERTIVS

Elegias quattuordecim  
complectitur.



<b>D</b> e Gregorio XIII. P. M. elegia prima	119
Ad Sixtum V.P.M.	122
De sacello Exquilino	125
Ad Camillum Palaeorum	129
In funere M. Antonij Martij iunioris.	132
In obitum Alexandri Farnesij Cardinalis	138
Ad Odoardum Farnesium	142
Ad Christum	145
Ad Deum	146
Ad eundem	149
Elegia vndecima	150
Ad Christum in die Salutationis Angelicae	152
In die natali Domini	154
De Christi Domini precatione in horto	158





## LIBER QVARTVS

habet epigrammata viginti  
nouem, & disticha tria  
& viginti.



<b>D</b> E Roma Vetere. epigramma primum	161
De Roma Noua	162
Ad Gregorium XIII. Pont. Max. de reliquijs translatis in templum nouum Farnesia- num	162
Ad eundem nomine regulorum Iaponiorum	163
Ad Sixtum V. P. M. de obelisco Vaticano	164
De eodem	164
Ad Franciscum Bencium parentem meum	165
Ad Sixtum V. cum inuist aedem S. Hieronymi Illiricorum	165
Epitaphium Helenae.... quæ in ipso partu decessit	166
Epitaphium Bernardini Roscij	166
In tumulo cuiusdam	167
Ad Andream Bencium fratrem	167
In funere Iacobi Sabelli Cardinalis. Anagram- matismus	168
In	

# IXNDIEMXI

In duo eiusdem argumenta illustriora	168
De eiusdem columba. Anagrammatismis	169
Ad insignia F. Hugonis Cardinalis Meliten-	
sis	169
Ad effigiem S. Hieronymi	169
De imagine Deiparae	170
De Beatissima Virgine	170
De eadem in caelum ascendente	171
De SS. Barptolemaeo & Ludouico	171
Ad imaginem conuiuij nuptialis in Cana Gali-	
leae	172
Ad Maxentium martyrem	172
Ad effigiem S. Hagnae	172
Ad effigiem S. Francisci	173
Aliud	173
De S. Maria Magdalene	174
De martyribus emblemata	174
Aliud	174
Ad effigiem Christi redimiti spinis. Distichon	
+ primum	175
Ad Christum, dum cruci suffigitur	175
De rupe Caietana	175
Ad effigiem Christi Domini & B. Ioannis Bapti-	
stae puerorum colludentium	175
Ad effigiem S. Petri	176
Ad effigiem S. Ioannis Euangelistae	176
Ad effigiem S. Gregorij Magni	176
Ad effigiem S. Francisci	176
Ad imaginem Beatae Catharinae Senensis	176

# I N D E X

Ad vas aquae lustralis	176
Ad solarium matutinum	177
Ad effigiem S. Iuliani disticha duodecim	177. 178
ERGASTVS drama	179

Finis Indicis.




1  
FRANCISCI. BENCII  
E. SOCIETATE. IESV  
CARMINVM

LIBER. PRIMVS

Carmen quo quaeritur quae sit optima ratio  
tranquillioris vitae instituendae.

Dictum in nouo Gymnasio Gregoriano  
Romae v i. idus Nouembris  
CIO IO XX CIV.



*VI fit vt anxiferæ cum quisque  
obliuia vitæ  
Otiaque & voto & blanda ratione  
sequatur,  
Atque omnes idem ardor agat,  
vix denique paucis*

*Vera quies dematque metus, stimulosque reuellat,  
Et caecos tumido depellat pectore motus?  
An quia in obliquum incerta regione viarum  
Quisque suum sectatus iter, procul auius errat,  
Atque alias vagus in partes diducitur omnes,  
Nec potis est animus curarum euincere molem?*

*¶*

*Sic*

Sic equidem ducebam animo: at si quaeritis, ecquae  
 Momenta impulerint suspensam examine mentem  
 Vergere in hanc partem, nisi quid vos auocat, oro,  
 Attentas adhibete aures, animisque fauete:  
 Ipse quidem expediam, rerum & discrimina pandā,  
 Est bona pars hominum, quos plura innatus habendi  
 Torquet amor vana illiciens dulcedine sensus:  
 Namque illos simul ac tetigit praediuitis auri  
 Ardor inops, pectusque insano perculit oestro,  
 Ilicet exiliunt summa & nituntur opum vi  
 Ad summas emergere opes: merguntur at ipsi,  
 Dumque aliud miseri quaerunt, se perdere certant,  
 Ut quam auide cupiunt, nequeant sperare quietem.  
 Sic auri quacumque lenis diffulserit aura,  
 Fertur amans, feruetque amens, nil linquit inausum,  
 Nil intentatum: temnens praesentia, tendit  
 Id quod abest: nec meta datur, requiesque laborum.  
 Sic puer, ut corpus radiati ab lumine Solis  
 Auersum tulit, ut radijs tendentibus ultra  
 Officiens, longam iaculetur protinus umbram,  
 Ignarus si forte illam ludensve sequatur,  
 Nil tamen assequitur demens, sequiturque fugitque  
 Sese idem, & cura & cursu defessus inani.  
 Ergo ille argenti venas, aurique metalla  
 Scrutatus, terrae partes rimatur opertas,  
 Et, saeuum, omni ferae violat dum viscera matris,  
 Ardet hians immane, feroque inuoluitur aestu,  
 Atque illam effodiens, viuum se defodit alte.  
 Aspice ut exanimis, quaesito ut concolor auro,  
 Palleat, & vultu testetur nubila mentis,

Vique

Vtque animo incerto fluitans quid postulet ipse  
Nesciat, & quaerat semper, nec pectore constet?  
Heu miseri, quae vos subigit tam dira libido  
Abdita naturae toties, penitusque latentes  
Certatim penetrare sinus, summique feracem  
Materiem tentare mali, & recludere terras?  
Nec satis hoc: audent ignotos voluere casus,  
Nec dubitant vitam fallaci exponere vento,  
Et fragili freti ligno, freta caeca reductis  
Solicitant remis, & monstra natantia siccis  
Spectauere oculis, blandi aut pellacia ponti  
Rideat, aut tristi minitetur fronte procellas.  
Non etenim facies eadem semper maris: altum  
Iam sternit, placidumque solū: iam murmura voluit  
Caeca tumens, magnoque vndarum fluctuat aestu:  
Et quassans caput indomitū fremit vndique, & ignes  
Euomit: & caelo gaudens indicere bellum,  
Foedere rescisso, montes attolit aquarum,  
Atque equitem impatiens arrepto vt pectore crura  
Ardua iactat equus, dorso procul excutit: ille  
Lucra petiturus, suprema dissitus vno  
Vix a morte gradu, iam caeli sidera lambit,  
Iam visus penitus stygias intrare cauernas:  
Se viuus viuentem effert, viuoque sepulcrum  
Nauigium statuit, caeli suspensus & inter,  
Atque maris molem, tandem se respicit, & se  
Stultitiae damnans lacrimas effundit inanes.  
Namque licet medio versantem in turbine mortis  
Quando absumpta salus, vitae spes deserit omnis,  
Atque fugae, ac penitus spes ipsa extincta timorem  
A 2 Extinguit,

Extinguit, propiusque aperit se ianua leti,  
Consilia in melius referens, & mente recepta  
Ipse suam miserans animam, se deflet, & illos  
Felices clamat, qui laeti paupere cultu  
Persacile angustis tolerarunt finibus aeuum.  
Quam mallet nullos duxisse ad pectora remos,  
Et nullam pressisse trabem, pontumque profundum  
E terra spectare procul, ventosque furentes.  
Scilicet extorsit veras e pectore voces  
Mens commota malo, & duris exercita rebus.  
Quod si forte maris tumidi Deus aequora placet,  
Fluctibus & medijs det fractam euadere puppim,  
Pauperiem ferre indocilis, simul ante malorum  
Oblitus, reficit deciso robore quassam  
Ipse ratem, atque iterum tentat vada feruida ponti,  
Iniiciens ventis campo certamen aperto:  
Tantum diuitiae diuerso ab littore, tantum  
Auri caecus amor potuit perferre laborum.  
Sic propter vitam viuendi est nulla voluptas.  
Quos etenim inflauit leuium spes anxia rerum  
Vt vento, & vani rapuere cupidinis aestus,  
Vruntur miseri, & scinduntur pectora, quales  
Aestate in media, cum facta silentia siluis,  
Rumpuntur questu, viuentes rore cicadae.  
Iam quid ego & pugnatum acies, Martisq. tumultus,  
Asperaue attingam saeui certamina belli?  
Cum stetit in medio densis exercitus armis  
Instructus spatio, ardentes cum longa cohortes  
Explicuit legio, & compleuit milite campos,  
Et procul aduersa ostendit fluitantia signa,  
Fulgor



Fulgor vbi ad caelum se tollit, & horrida circum  
 Aere renidescit tellus, & Martius horror  
 Membra quatit, lectaeque ardent in proelia vires.  
 Nam simul ac pugnam raucus canox increpat, idemq.  
 Excitat armatos, animosque accendit, & ipse  
 Admonet armipotens paribus concurrere telis,  
 Et conferre manum, & collatis quaerere signis  
 Aut palmam, aut mortem, decertantesque cateruae  
 Ceu quondam vasto luctantes acquore venti  
 Proelia sustentant ducibusque, & viribus aequis:  
 Extemplo horribili tellus tremit ista fragore,  
 Et mare longinquum horrescit, caelumque remugit,  
 Responsant silvae, & montes: hinc ferreus imber  
 Ingruit, & late campi fluxere natantes,  
 Et procul accenso nitroque & sulfure viuo,  
 Aetherio tonitru, & caelestibus aemula flammis  
 Aera tonant, longeque globos ardentia iactant  
 Fulmineos, aciemque metunt, mediumque per agmen  
 Limitem agunt, saeuit mors horrida, & omnia ferro  
 Cum secat ancipiti, nigrantes explicat alas.  
 Tunc inter bellantum iras, gemitusque cadentum,  
 Cum vox mista virum, fremitusq. auditur equorum,  
 Et clypei galaeque sonant, & stringitur ensis  
 Plurimus, & sparsis tellus hastilibus horret,  
 Et rubet: & tristi refugum stat puluere caelum,  
 Sanguineque effuso manauit turbidus amnis,  
 Atque viros, atque arma virum deuoluit in aequor.  
 Quis memoret tremefacta olli per viscera quantus  
 Insinuet pavor, & tenui discrimine leti,  
 Quantus agat dubios terror, glacieque rigenti

*Membra liget, coëatque pigra formidine sanguis ?  
Tempore in hoc toto repetens suspiria corde  
Miles, vt in pacem flagranti pectore se se  
Creber agit, caramque domum, castumque cubile  
Coniugis, & dulces natos reminiscitur, & quae  
Sperat inops animi, pugnae mala : Iam satis, inquit,  
Poenarum dedimus, iam coepti poenitet. o vos  
O fortunati, dulcis quos commoda pacis  
Laeta tenent, & certa salus, vitaque fruantes,  
Expertes belli securos ducitis annos,  
Consilio meliore vsi : sunt otia vobis,  
Est iucunda quies : vobis non classica somnos  
Pulsa fugant : non hostis atrox cum fulminat, & cum  
Intentans mortem, densata vt grandine nimbus  
Obuia prosteruens saeuit, vos terruit : intra  
Vos patriae fines, proprijsque in sedibus aeuum  
Degitis optatum faciles, vitamque serenam :  
Contra ego non felix, notis disiectus ab oris  
Exul ago, vitamque extrema per omnia duco,  
Et metuo instantem momenta per omnia mortem.  
I nunc, atque aude bellum praeferre quieti :  
At parte ex alia, clari quem fulgor honoris  
Percutit, atque oculos, animumque accendit & angit  
Ambitio, Tyrijs iteratae vellera lanæ  
Muricibus, lectasque rubro de litore conchas,  
Atque salutantum turbam, numerumque sequentum,  
Attonitis inbiantem animis, studijsque petentem,  
Et tenuis tenebras vitae sordesque perosum :  
Roma tibi quorum fuit ingens copia quondam,  
Sed nec abest secunda seges : dum limina regum,  
Atque*

Atque aulas penetrat, domini nutusque loquaces  
 Obseruat, fingens aliena ab imagine vultus :  
 Quanta putas miserum vexant incendia ? quantus  
 Est maeror ? qui quamquam animo subsedit in imo,  
 Et premitur, tamen in muto saepe eminet ore ,  
 Et risum mendacem aperit, tectumque dolorem :  
 Nec mirum : inuidia, miseroque cupidine pectus  
 Vritur, & cinere in multo veluti obrutus ignis  
 Emicat, & tennes index it fumus in auras ,  
 Indicio patet ipse suo, palletque pauetque ,  
 Mensa cibi, lectus somni traducitur expers .  
 Quod si forte aliquem domini prouexerit aura  
 Curarum in partem , atque arcani conscia sensus  
 Munera, vt in clara versetur luce, potentem  
 Quem taciti spectent oculi, digitique loquantur,  
 Ambulet vt regi propior, propiorque sedere  
 Vina inter lectasque dapes, lectosque ministros,  
 Et praelibatas epulas contingere possit :  
 O quanto liuore animus tabescit, & ira,  
 O quantum est odium vitae , lucisque tuendae .  
 Illum omnes colere, esse illi maxima curae,  
 Quaque tulit gressum , laetos assurgere ciues :  
 Se gregis in numero , quem fors obscura recondit ,  
 Non vllum gessisse vmquam nomenque , decusque :  
 Et quamquam magnis magnorum obfessor honorum  
 Officijs pugnet, vanum cecidisse laborem .  
 Ergo vt auis quaerit decisis abdita pennis ,  
 Nec sublime potest implumis tollere corpus :  
 Sic lucem fugiens hominum consortia vitat ,  
 Vnius vt ipse suae producat funera famae .

Quippe indignatus maeret cessisse minori,  
Cuius opes nequit, aut mores perferre superbos.  
Vsq̃ue adeo, vt cauta si verses omnia mente,  
Non forsan facile hoc omni ratione refutes.  
Ille etenim ex humili qui creuit stemmate, & altum  
Vertice conspicuus caput extulit, ilicet omnem  
Turgidus excelsa plebem despectat ab arce.  
Quanta supercilio moles imposita potenti,  
Luminibus grauitas, toruae fastidia fronti?  
Vt quos maiores olim tulit improbus, atque  
Dignior ante omnes humili vitaeque locoque,  
Iam positos infra nullis affatibus illos,  
Sed ne oculis atque ore quidem, vultuque beato  
Dignatur, metuens maculare hoc lumina caeno:  
Oblitusque sui, fortunaque ebrius ipsa,  
Quae rerum subiere vices, quam nigra procella  
Aestatem excepit, tempestatemque serenam,  
Nil secum repetens stultus, quae somniat error,  
Vera putat, falsusque animi, spem pascit inanem?  
Sed tamen interea rerum conuertitur ordo,  
Atque hominum meliore loco, labefacta ruit res,  
Et leuis incertos casus transmutat honores:  
Nunc mihi, nunc alijs arridens ore benigno.  
Heu vanos hominum nixus, stultumque laborem,  
Lubrica quid toties petitis? quid certa pericla  
Quaeritis incerti? quid tandem incommoda saeculi  
Auetis miseri semper? spatium breue vitae  
Quid breuius facitis? curasque accersitis vltro,  
Quae ceu praecipites fluuij de montibus altis  
Subiectas celeri consternunt agmine valles,

Sponte

Sponte sua ignaras mentes ac pectora inundant  
Vosne odium cepit vestri? satis ipsa superque,  
Ne cumulate alios, maerorum examina in ortu  
Cuique dedit natura suo: ne incendite morbum  
Crescentem, potius medicina flectite: gliscit  
Ille magis, viresque acuit, flammisque ministrat,  
Et secunda malis absomit viscera curis:  
Aestiferis curis, quarum nec nomina quae sint,  
Nec quae sint species, aut mēte, aut carmine, quisquā,  
Credo equidem, nec vana fides, comprehendere possit.  
Dixerit hic aliquis, si curarum omnia plena,  
Inque illas hominum natum genus, an pote certum  
Sperari effugium? an veluti ratis aequare vasto  
Naufraga cum scissa est, nautasque exponit in vndis,  
Nusquam tuta salus, mediaque in morte tenentur,  
Sic etiam postquam mortalis lumina vitae  
Quilibet attigerit, lacrimans, lacrimabilis idem  
In mare nauifragum matris proiectus ab alio  
Nusquam tuta quies, luctus, curaeque sequaces  
Incubere animis, nec inania iurgia miscent?  
Haud equidem abnuerim: nec quisquā dicere falsum,  
Omnia si secum reputet, me forte putarit:  
Sed tamen in medijs tabulam si fortiter vndis  
Naufragus arripias, constanti & pectore serues,  
Paulatim adnanti liceat sperare salutem.  
Ille etenim prudens, fortunatusque laborum,  
Egregiusque animi, vitam iucundius optat  
Ducere, & euentus habuerunt vota secundos,  
Qui nec opes, nec caedem hominū, nec sperat honores,  
Nec quibus immoritur vulgus: virtute sed vna  
Cuncta

Cuncta minora putat, discendi & captus amore  
Inuigilat libris, libris se inuoluit, & ardet  
Omnia vestigans, rerum cognoscere causas,  
Quaeque oculos fugiunt, celeri percurrere mente.  
Ille, licet tranquilla quies, curisque soluta  
Gaudia non desint, sed amantes otia Musae  
Pectus alant, ludo non delectatur inerti,  
Nec vacuas ignauus amat consumere noctes,  
Sed vigili excitus studio, gratoque labore  
Dulciter allectus, veterum monimenta virorum,  
Et sapientum artes, doctrinarumque reperta  
Excudit, atque opibus mentem melioribus ornat:  
Quandoquidem euigilans multa de nocte, priusquam  
Auroram gallus cantu, & plaudentibus alis  
Prouocet, haec Solem rubicunda luce morantem,  
Artibus ingenuis iamdudum affixus, & haerens,  
Nobilibus mentem studiis, & lumina pascit!  
Nam seu quae verum a falso discriminat, & quae  
Sermonem ratione artem concludere monstrat,  
Sensibus explorat tacitis, seu coepta latentis  
Naturae, & varios iuuat componere motus,  
Siue acrem obtutum rebus caelestibus infert,  
Quis referat, quanta constet dulcedine pectus,  
Qualia certatim perfundant gaudia mentem?  
Scilicet exquirat transacti haud inscius aevi  
Qua corpus ratione ingens concreuerit orbis,  
Atque suis descripta oris sint membra, locisque,  
Nec quicquam alterius tenet transmittere fines:  
Caelum erret, stet terra, fluat mare, pendeat aer,  
Et capiant certas animantium singula formas.

Illac

*Illae autem, aeternum saecula ut se cuncta propagent,  
Vnda velut fugiens veniente impellitur vnda,  
Flumen idem remanet, pariter surguntque caduntque.  
Inque vicem nascente noua vetus interit aetas.  
His alitur curis, nec abest sollertia maior:  
Quippe etiam, audaci sinuosa volumina visu  
Omnia condentis, promentis & omnia caeli  
Explicat, inuentis gaudens, magnamque per artem  
Sublimes aperire vias, & limina certat.  
Iamque suis stellas formis ac viribus omnes,  
Et celerem imparibus cursum notat interuallis,  
Quaeque suum aligeri virtus contorqueat axem,  
Quae faciat luci aut nocti longamve breuemve  
Causa moram, seu bruma cadat, seu serueat aestas:  
Vnde vigor ventis, quo concita saepe tumultu  
Terra tremat, quatiatque domos, & terreat vrbes:  
Cur toties Sol deficiat, cur Luna laboret,  
Nec migret iratum dictis de sedibus aequor,  
Nec fusis decrescat aquis, crescatque receptis.  
Nec minus ut coeant caecae per inania nubes,  
Et caelum inuoluant tenebris, hiememque minentur,  
Et scissae liquidum demittant protinus imbrem:  
Mugiat ut tonitru domus ardua, & acta minaci  
Agmine dissiliat, ruptis ut nubibus ignis  
Emicet, & misto fulgore & murmure fulmen  
Terreat explosum, terrae sola, caerulea ponti.  
Quod si forte inuat propius concedere, & illa  
Quae doctis subiecta oculis spectacula pandunt  
Grata magis, miranda minus, quia saepe videntur,  
Cernere, & occultas venari indagine vires,*

*Nimirum,*



Nimirum, & naturam hominum, prolemq. ferarum,  
 Et pecudū, & volucrū, atq. vna genus omne natantū,  
 Cur ferrum alliciat magnes, caua vallibus echo  
 Cur resonans parua frustretur imagine verbi,  
 Inspicere: aut etiam siluis natalibus arbos  
 Fertilis, an sponte, an posito de semine crescat,  
 Quaerere: & ingenium fruticum, segetisque feracis,  
 Frugis, & herbarum, & quaecumque arbuta virenti  
 Se tollunt fronde, & fetus in tempore fundunt:  
 In tenui labor, at tenui de germine suavis  
 Exprimitur succus. quis enim non gaudeat inter  
 Singula, quae cupidae praepandunt lumina menti?  
 Adde tot impositas varijs regionibus vrbes,  
 Et varios hominum mores, lucosque, lacusque,  
 Fluminaque, & fontes, montes, vallesque, viasque,  
 Tum siqua est fluitans, siqua est circumflua ponto  
 Insula, & egregiam quisquis felicibus vndis  
 Tellurem fluvius locupletat, & irrigat auro:  
 Quae pelluentes lapides, gemmasque nitentes  
 Ripa alat, & varijs depingat littora conchis.  
 Haec agitati homini, quam vera & certa voluptas?  
 Fructum animi vt nihil imminuit, pacemve quietam?  
 Sed quis erit finis? vident vt sese erigat vltro  
 Supra hominem, illustrans mortalis commoda vitae?  
 Quid sit enim virtus, & quid sapientia possit,  
 Quam saepe & pulchrum turpi, & contendat honesto  
 Vtile, perspicere, atque animam vitijsque carentem,  
 Et curis vacuam, & sanctis virtutibus aptam,  
 Exemplar reliquis imitandum ponere, quanta  
 Dignum laude putas? quanta, traducere vitam  
 Caelitibus



*Caelitibus dignam in terris, certamque tenere,  
Qua te, qua natos, qua urbem ratione gubernes?  
Quid cum etiam gaudet victuris credere chartis  
Quae didicit, multo contingens cuncta lepore,  
Seu sermonem habeat, seu condat nobile carmen?  
Illum equidem, mihi si liceat depromere verbis  
Sensa animi, quando tantis excellere rebus  
Ipse Deus voluit, diuina stirpe creatum,  
Et decus humanae gentis demirer, & optem,  
Vestra meo nisi diffideat sententia voto,  
Vt similem studijs vitam, factisque sequamur.  
Plurima de genere hoc fama maiora fideque  
Commemo rem, si fas: sed adhuc & plura supersunt:  
Et satis haec, ne detineam vos carmine multo.  
Sed quo? quo rapior sublimis? limen Olympi  
Quis referat? iuuat intrare, & penetrare beatos  
Talia cum cupida visendi mente recessus:  
Quamquam oculos hebetat mortales humida circum  
Fusa mihi nubes, caligantesque tenebrae.  
En domus, en video, superum domus enitet ingens,  
Splendidior vitro, fuluo radiata metallo,  
Quam circum murus stellatus iaspide cingit.  
Ille videns, triplex vno qui lumine fulget  
Sese aperit, late exundans, inque omnia lucem  
Dispensans, totum irriguis splendoribus orbem  
Conferit, & fetum vitali recreat aura.  
Ter ternas circum videas adflare cohortes  
Aligerum alterno modulantes carmine cantu,  
Attonita qui mente canunt, laudantque parentem,  
Atque Dei nutum, maiestatemque verendam  
Observans*

Observant alacres studijs, quorum agmina quæ sunt,  
 Sunt habitus totidem diuersi, vestis, & oris.  
 Has super egregio magnum decus enitet ore,  
 Et vir conspicuo cingens diademate frontem,  
 Prima tenet, iuxtaque comes pulcherrima virgo,  
 Vnde Deus quondam mortales induit artus.  
 Hic vir, hic est, sibi quem promissum saepius, orbis  
 Audijt, & vidit perfossum vulnere plantas,  
 Atque manus sacua & traiectum cuspide pectus,  
 Illud amore auidum, cuius praediuite vena  
 Exilit effusis septenis fontibus, vnda  
 Natiuam maculamque luens, & crimina tollens.  
 Hos fontes, Deus, hos fontes, hos repperit vsus  
 Ipse Deus, fluuio vt posset delere salubri  
 Immundam illuuiem, veteremque inducere cultum  
 Gens hominum turpi iamdudum obnoxia morbo.  
 Ipse etenim (quis enim æterno modus adsit amor?  
 Quid non fecit amans?) curam huc traduxerat omnē,  
 Redderet vt vitam, mortem vt mortalibus idem  
 Auferret, superaue humiles in sede locaret.  
 Nempe tulit mortem, quam reppulit: occidit ipse,  
 Dum cadit, & caelum, & terras aucturus, & aras,  
 Caelum animis, terras aris, & ritibus aras.  
 Salue vera Dei proles, Deus, ipse, salusque  
 Humani generis, tanton' dignaris honore  
 Me famulum? tua ne hæc olim per vulnera seruator  
 Vulnera quæ Solem radijs & lumine vincunt,  
 Quæ magnus meminisse dolor, spectasse voluptas:  
 O, liceat nobis, senio cum moenia mundi  
 Expugnata dabunt labem, seramque ruinam,  
 Omnibus

*Omnibus & iuste meritorum praemia reddes ,  
Prendere quam caeli cupientibus annuis arcem :  
Hic ubi in aeternum secura pace fruamur .  
O fortunatos, haec quorum pectora cura  
Vna coquit, si cura tamen dicenda voluptas,  
Tanta est, ut libeat naturam quaerere rerum ,  
Quas caelum tenet amplexu, tellusque recondit :  
Qui pia solícite venerantes numina, mentem  
Moribus, & rectis linguam sermonibus ornant.  
His veteres vitam studijs coluere parentes ,  
Qui tantum e tenebris potuere extollere lumen,  
Ad quorum exemplar cupide nos fingimus omnes .  
Ergo agite, o iuvenes, si nobis otia pulchra,  
Quae placidam nullo perturbent turbine vitam ,  
Non animus deses, nec turpis inertia, cordi :  
(Hoc pietas petit, hoc superis addicta voluntas)  
Discendi studio, & verae virtutis amore ,  
Qua patres posuere pedem, quibus atria caeli  
Sancta patent, aequis animis, non passibus aequis,  
Caelum aspectantes, vestigia tuta sequamur :*

D E. O R I G I N E  
R H E T O R I C A E  
EX. PROTAGORA  
P L A T O N I S



NNVA conuersis bis septem  
anfractibus orbis  
Cura redit, iuuenes, veterum qua  
dicta virorum,  
Ignea qui celeris vibrarunt ful-  
mina linguae,  
Rhetoricaeque memor praecepta  
remitior artis.

Quare agite, & mecum nostrarum exordia rerum  
Susceptique operis laudem celebrate fauentes.  
Rhetorices antiqua mihi terrestris origo  
Carmen erit. Tu Christe faue: tu carminis auctor,  
Dexter ades, quamquam hic Graiae vestigia gentis  
Ingrediar, doctosque dolos, & ludicra fetu  
Plena graui, & veros falsa sub imagine sensus,  
Ceu rigidis subter folijs, & cortice duro  
Saepe latent dulces seruantes semina fructus.  
Vos autem, quibus egregio sub pectore virtus  
Excubat, humanumque animum, mentemq. benignam  
Præbet, & his placidas dictis aduertitis aures,

Est

*Eſte mihi faciles, ſit fas mihi munere veſtro  
Priſcorum commenta virum memorare canendo :  
Et veniam, ſi ſiſta feret, concedite vati .  
Ante hominum pecudumq. genus , piſtasq. volucres,  
Et quae muta ſecant liquidos animantia fluctus :  
Omniſ erat rerum ſpecies confuſa, neque vllus  
Orbis honor, maria, & tellus, nec lucidus aether ]  
Seminibus permiſſa ſuis ſine lege coibant  
Cuncta coërcebat tenebroſum corpora corpus .  
Sed ſimul in proprias coeperunt ſingula ſedes  
Muneribus diſcreta ſuis ex ordine labi,  
Et tener ab rerum diſcrimine creſcere mundus .  
Tum primum in medio conſedit pondere tellus  
Nixa graui , hanc circum irriguo ſe gurgite pontus  
Intulit, & ſuper incubuit ſpirabilis aër ,  
Omniaque extento caelum comprehendit amiſtu .  
Nec minus aurato diſtingui coepta decore  
Sidera, quae toto radiant pulcherrima Olympo ,  
Seu tremulo rutilant, ſeu fixo lumine fulgent .  
Terra tulit grauidas vlllo ſine ſemine fruges ,  
Terra parens rerum, & magni velut emula caeli  
Induere in varios ſtudit ſua ſidera flores .  
Haec propter, roſa ſanguineo, vacinia fuſco ,  
Lilia candenti, ſtauo velatur amiſtu  
Caltha, crocus rutilo, violae ferrugine, & auro  
Et niue fulgentes, alios variare colores  
Atque alios tendunt : haec pallet, purpurat oſtro  
Illa magis, gemmam illa refert, ſtellamq. micantem,  
Haec virides rubro praetexit ſanguine guttas ,  
Et matutinis collucent roribus herbae .*

Talis erat mundi facies : animantia deerant  
 Interea, quorum obsequijs assuesceret orbis :  
 Ut domus in domini varios describitur vsus .  
 Iamque dies praefixa aderat, qua numina diuum ,  
 Qualia finxerunt ludentes monstra Poëtae ,  
 Cetera quae dcerant e terrae glutine & igni  
 Formandi studio, si dem venerere sub vnam,  
 Qua latuere cauae nigra sub rupe caernae .  
 Nec mora : multiplices species, volucrumq. cateruas  
 Squamigerumque pecus pelago, formasq. animantum  
 Effingunt, hominumque genus. sed spiritus illis  
 Tardus, & infirmae vix noto in corpore vires .  
 Roboris expertem vitam sine luce trahebant .  
 Nec talem duxere diu. Producere tandem  
 Dū statuunt, cautoque vocant cū fratre Epimetheum.  
 Imponunt his partem oneris, sociosque laborum .  
 Esse iubent, horum arbitrio permittere visum  
 Muncra mortales olim tribuenda per omnes ,  
 Seu volucres, piscesve forent, hominesve, feraeve.  
 Dicitur has partes fratri cessisse Prometheus ,  
 Scilicet eximiam speranti hoc munere laudem .  
 Ille autem velut imprudens si forte magister  
 Sumat opus, primo vires artemque profundit  
 Inscius, haud sese ventura in tempora seruans :  
 Talis & ipse Deum in pecudes largissima dona  
 Omnia dispensat male prodigus, immemor vna  
 Humani generis, cui pars non vlla relicta est .  
 Ergo alijs celeres infirmo corpore motus  
 Attribuit, quibus & ventos praeuertere possint,  
 Et volitare leui tranantes aëra penna .

Sunt

Sunt quibus ingentes generoso in pectore vires  
 Inseruit, tamen vt tarda se mole ferentes  
 Inuideant leuitatem alijs, sed robore praestent.  
 Idem etiam haec operit rigidis animalia villis,  
 Fortibus haec corijs, haec durae cortice testae,  
 Haec squama squallere iubet, pars corpora pluma  
 Suspendunt volucris, sunt illis mollia lanae  
 Vellera, partem autem pinnis setisve rigescunt.  
 Quin etiam facile vt vitam corpusque tueri  
 Effet, & aeternum species transmittere in aeuum,  
 Mutuaeque aduersus muniri proelia possent:  
 Cornibus his frontes, illis armauit obunco  
 Vngue pedes, his rostra dedit: sunt corpora turris  
 Ritu alijs, sunt quae se oculis vigilantibus, & sunt  
 Quae se astu, & quae se valeant seruare veneno:  
 Dentibus haec, rituque, fero sunt corpore tecta  
 Quaedam alia, & circum spinis ingentibus horrent,  
 Telorum in morem, excusso quae tergore iactant,  
 Non secus ac cornu neruo stridente sagittam.  
 Adde quod & pecudum generi sunt obuia cuique  
 Praesidia, aut certe paruo quaerenda labore,  
 Seu victu indulgere iuuet, seu ponere fessa  
 Membra solo, & placidam libeat captare quietem:  
 Lectum illis praebent instrata cubilia fronde,  
 Et nemoris dorso molles iacuere per herbas,  
 Poma ferunt baccaeque cibum, radicibus illae  
 Vescuntur durae vulsis è viscere terrae:  
 Hae laniant, manduntque alias, magnaeque sua vi  
 Funesta in pecudes exercent regna minores:  
 Quare etiam effectū saeuū vt genus omne animantū,



Quae praeda satiare famem, quae vivere raptō,  
 Quacque sitim gaudent haustu sedare cruoris,  
 Hand plures alat, & longo post tempore fitum  
 Concipiat tandem, & seras vix fundat in auras.  
 At contra infelix venantum praeda, ferarum  
 Mite pecus, grauido numerosam corpore prolem  
 Sufficit, & facili deponit pignora nisu,  
 Non ita post multo patres auctura nepote.  
 Haec simul effundens pecudes exhausit in omnes  
 Iapeto natus, tandem se aspexit, & omnes  
 Absumptas vires sero cognoscit, & vnum  
 Esse hominem reliquum sine re, sine spe, sine diuum  
 Munere. Quam sera est imo sapientia fundo?  
 Ingemuit, fratremque diu respexit iniqui  
 Spectatorem operis. Doluisti caute Prometheu,  
 Quando hominem aspexisti. Turbatus constitit ipse  
 Solus, inops, laedi facilis, nudatus, incrimis,  
 Infelix, tantum lacrimas effundit, & vdis  
 Flutibus, ac teneris vagitibus aethera complet.  
 His inopem sese, his miserum, nec iure relictum  
 Donorum expertem quaeritur, partesque reposcit  
 Ipse suas: frustra: proprios animantia in usus  
 Omnia rettulerant, nec vero audire rogantem  
 Eque suis rebus decedere posse negabant.  
 Illicet horribili trepidauit terra tumultu,  
 Saenit atrox bellum, vi cuncta & fraude geruntur:  
 Omnia conferta miscentur corpora pugna.  
 Sic crepitans ubi feruet hiems, ventique profundum  
 Foedere rescisso facto velut agmine vexant,  
 Et Notus in Boreā, & Zephyrus bacchatur in Eurū,

Continuo



Continuo exultat pelagus, fractaeque procellae  
 Undique tollunt se, & caelum tellusque remugit:  
 Omnis abest requies, pax omnis: nulla salutis  
 Nulla fugae ratio: clademque, necemque minantur  
 Omnia, nec miseris tanto spes ulla periclo est.  
 Infandae o pugnae facies, o agmina mille  
 Tam promptis instructa armis volucrumque ferarumque.  
 In miserum glomerata hominē. Nempe audeat vnus  
 Imbellis, desertus, inops, rerum omnium egenus  
 Pectore nudato tam forti obistere turbae.  
 Pugnabant homines, sed letum immane manebat.  
 Arma quidem non sunt ipsis vestesve repertae,  
 Nondum vllae certandi artes, non bellicus vsus,  
 Non gladios strinxere manu, non aerea cassis  
 Stat capiti, aut clypeus per mollia vincla lacerto  
 Inseritur, nondum consertis leuiter hamis  
 Lorica induitur: nescit leuis hasta ruentum  
 In pugnam, voluci perrumpere limite turmas.  
 Non currus sonipes, fera nec calcaria sensit,  
 Non equitem dorso, non frenos ore recepit.  
 Sed neque fulmineo dissultat machina bombo  
 Quassa fragore graui: vt strepitus imitetur Olympi,  
 Dum tonat, & rutilo iaculatur ab aethere fulmen.  
 Pugnabant: sed enim siluas, & concaua cursu  
 Antra petent profugū, penetrabit saeua tellus  
 Agmine praecipiti frendentum immane leonum  
 Horrida vis, stimulante fame, rapietque faretque  
 Corpora, & humano spargetur terra cruore,  
 Vinaque viuente condentur viscera busto.  
 Conscedent viuas ne trabes, altāsque cupressus?

Extemplo insilient auium strepitantibus alis  
 Agmina clangentum, letumque informe ferentum  
 Vnguibus, & diro lacerantum pectora rostro.  
 Talia Pygmaeae dicuntur proelia genti  
 Strymoniae mouisse grues, cum territa pubes  
 Corporis exigui, clangorem & rostra volucrum  
 Vt fugeret, natali etiam de sede profugit.  
 Terra autem non tuta domus. Pelagus ne petessent  
 Vi rapida? quis sternat iter? fluctus ne tumentes  
 Temnere quis paret, & dubio se credere ponto?  
 Scilicet accedet valida qui ligna bipenni  
 Deuoluat, scindatque trabes, ignique sequaces  
 Molliat, ac pice perfundat, tum robore texto  
 Velinolum aedificet corpus, remisque paratis  
 Inijciat noua transtra, ratemque impellat in aequor,  
 Quae simul vncta natet, celeri simul impete ventis  
 Inijciat bellum, & campo procurrat aperto.  
 Atqui nauis abest, tamen & vada caerula nando  
 Transmittent, flatuque simul iactisque lacertis  
 Pectore discindent pelagus, quaerentque per vndas  
 Effugium à terris. Quis nandi repperit artem?  
 Quis motis docuit manibus discludere marmor,  
 Cedat vt, & liquido sustentet corpora fluctu?  
 Praeterea exterrent fremitus & murmura Ponti,  
 Et rapidi tot monstra maris, crudelia cete,  
 Et Scyllae, & Pristes, & hianti gutture Phocae  
 Ingenti latratu, & terrifico mugitu.  
 Quid faciant miseri, deuotaque corpora morti,  
 Quis neque persugium tellus neque praebeat aequor?  
 Muffantes doleant ne omnes, pereantque silentes,  
Seque

Seque feris praedam velut in viuaria clausam  
Esse sinant, viuique suum deforme sepulcrum  
Horrescant, vastum metuentes semper hiatum?  
Non ita: non feret hoc praestanti corde Prometheus  
Germano haud paulo sapientior. euolat ille  
Ad superos, hominum veluti mandata referret,  
Sponte sua: neque enim talis sapientia menti  
Illorum est, tantae vt cladi reperire leuamen  
Possit, & hunc tandem curis imponere finem.  
Ergo hominum indignos animo miserante labores,  
Non audax, caelo vt referat mortalibus ignem  
Vt quondā, vt perhibent: nō vsus fraude Prometheus  
Luce palam, magnum & vultu testante dolorem,  
Ad superos legatus abit: rerumque parentem,  
Qui mundi status, & ratio, qui casus agat res,  
Quae clades miserranda homines, fortunaque meruit,  
Edocet, & requiem pugnae, rebusque salutem  
Postulat euersis, ne diuum insignis imago  
In terris, hominum genus admirabile pessum  
Sic abeat, data praeda feris, monstrisque marinis:  
Munera seruentur superum. Quae meta laborum?  
Qui finis? semper ne hostilia circumspiciat  
Agmina gens hominum imbellis? semper ne ferarum  
Mugitus, strepitusque pedum, faucesque tremiscet?  
Quod nisi caelicolum seruet pater, atque hominū rex.  
Ipse suum quod finxit opus, ni consulat ultro,  
Intereat decus, & rerum aspectabilis ordo.  
O pater, o caeli, maris, o terraeque potestas,  
Affer opem, si fas, poscentibus: aspice quantum  
Diluuium inuoluens terras impune feratur:

Da dextram miseris, caelo solatia mitte,  
 Ne pereant, prosit similes caelestibus ortos.  
 Dixerat, & lacrimis maduerunt ora profusis.  
 At pater omnipotens casus miseratus acerbos  
 Constitit, inque hominum defixit lumina rebus:  
 Nec tantum decet esse morae: demittit ab alto  
 Mercurium in terras, ac primum talia mandat.  
 I, celer, i, succurre hominum opportune labori:  
 Et tecum ratione vna ac sermone potentem,  
 Quam primam in nitida virtutum sede piarum  
 Esse vides, cultu insignem, viridemque iuuenta,  
 Duct age Rhetoricen: nihil cōt felicius illa,  
 Quod clades & damna leuet: dabit ipsa salutem  
 Humano generi, vt sese descendere possit  
 Consilio, & saeuas animantum eludere vires.  
 Non tamen ex aequo cunctis tribuenda, neque vnā  
 Quilibet in proprios vertet communiter vsus:  
 Sed si qui ingenio praestant, & moribus, atque  
 Mente vigent, celerique valent comprehendere motu  
 Maiestatem illam, ac reliquos formare docendo,  
 Fas illis dicendi artem concedere tantum.  
 Concilijs sedet hoc caelestibus: haec mea mens est.  
 Iuppiter haec: nutuque omnem tremefecit Olympum.  
 At sacra Rhetorice medijs in maenibus vrbs  
 Aetheriae longe sublimi in sede sedebat  
 Vestitu illustri, quem versicolore lapillo  
 Flos auri consertus obit, laetumque nitorem  
 Euomit, & vario visum splendore la cessit:  
 Qualis Chaoniae torques gemmata columbae  
 Emicat, vt radijs aduerso in Sole refulsit,

Nunc hos, nunc illos pluma referente colores :  
Pulchra quidem forma, sed cuius candida fucus  
Pinxerat ora leuis, roseum mentita decorem ,  
Dextraque depositos crispauerat arte capillos .  
Ipsa manu cornu praefert, insigne beatum  
Omnigenis auctumque bonis, opibusque refertum :  
Diuitiae circum assistunt, & purpura & auro  
Splendentes : sociam se illis laetantibus addit  
Gloria, quae quoniam caelo descendit ab alto,  
Nunc quoque sidereo vehitur super aethera curru,  
Et caelum affectans, nubes & inania temnit .  
Nec minus & dicendi ardor, suadela, leposque,  
Et circum volitant insignes ora puellae  
Agminibus crebris, has dicunt nomine laudes,  
Hae sacrum quacumque licet contingere corpus  
Et dominam assiduo gaudent extollere cantu .  
Ac veluti Tiberim circum, septenaque Nilum  
Ostia pandentem, quem laeto in gramine pictor  
Fecerit excelsum cornu, glaucoque sedentem ,  
Dum lymphas diffundit equo, vario ordine riui  
Infantum in speciem ludunt, nunc brachia patris  
Percuttrunt, nunc illi humeros, nunc horrida menta,  
Caeruleos fert ipse oculos, flumiosque ministrat ,  
Et ripa viridante ingens extollitur arbor :  
Talis erat circa dominam chorus : aspicit ipsa  
Mercurium patris imperio parere parata ,  
Et simul in terram lapsu leniore feruntur .  
Sanguinis en flumios, en campos ossibus albos ,  
Cerne soror, quam pugna impar, quae mortis imago?  
Aspicias hinc tigres, illinc, germana, leones  
Corporibus

Corporibus miserorum haerentes, ora cruore  
 Aspersos, tepidi ecce rubent sub dentibus artus.  
 Horruit aspectu virgo, & contrita mente,  
 Non verbis hoc tempus, ait, properanda salus est.  
 Haud mora. Mercurius coetu selegit ab omni  
 Excelsa qui mente viros acieque valerent  
 Ingenij, hos placide expolijt, taciteque dolauit  
 Rhetorice sensim insinuans, mentisque tenebras  
 Dispulit, ingenium erudijt, pectusque repleuit,  
 Et multa insignes dicendi reddidit arte.  
 His autem simul vt noua lux diffulsit, & alta  
 Plurima mente agitant, & larga est copia fandi.  
 Quoque hominum res summa loco, qua clade pericli  
 Cum gemitu aspexere, feris loca tuta relictis  
 Corripiunt, aliosque vocant. Cyllenius ipse  
 Adiuvat, ipse feras duris congressibus arcet.  
 Conuenere omnes, miserum ac miserabile vulgus.  
 Maxima pars operit trepidantibus vlcera palmis.  
 Hi pedibus trunci, hi manibus, pars corpore adeso  
 Confecti macie vultus, & pallida longa  
 Ora fame. exanimis dicas spirare sepulcris  
 Turpibus effcessos, & vincta cadauera ferri.  
 Pauci adeo integras habuere in corpore vires.  
 Et subito numero ex omni, lingua optimus vnus  
 Qui fuit, & voce egregia, gestuque decoro  
 Vt tumultum ascendit, quem cū cum plurima vallis  
 Tenditur, & nulla ramorum conditur vmbra,  
 Constitit, vt possent oculi spectare loquentem,  
 Et sonus ad cupidas ferretur commodus aures.  
 Et simul vt maerens huc lumina vertit & illuc,  
Communem



Communem indignans sortem, visaeque ruinae  
Illacrimans, non ille humili ratione loquendi,  
Blanda nec ingressus per rerum exordia: vicit  
Omnem artem dolor, & luctu spectacula mentem  
Confudere grauem. Nam quae medicina malorum,  
O miseri, qui finis erit, requiesque labori?  
Quis tantis modus aerumnis, semper ne ferarum  
Ingluiem pascemus, ait, lacerandaque semper  
Corpora per nemorum latebras siluasque trahemus?  
Perque ipsas nemorum latebras, siluasque tremētes?  
Heu pudor, heu numquam fortes, heu semper inertes,  
O hominum genus infelix, o praeda minorum.  
Quin nos respicimus tandem, miserandaque laeto  
Eripimus membra, atque aliquam traducere vitam  
Non soli, vt soliti, ac dispersi montibus altis,  
Viribus at iunctis connixi, & corpore toto  
Quaerimus vnanimis? miseris audacia crescet,  
Vim dabit ingenium: certa in Statione manendum  
Omnibus esse reor. Statio ramalibus esto  
Firmanda, & lapidum nexu: non cernitis, vt se  
Defendant volucres, nidos vt fingere discant  
Rupe sub excelsa, paleis per mutua nexis?  
Turpe homines auibz concedere. Non erit vmquam  
Vt gelidas vitare niues, vt grandinis ictus,  
Vt brumae, vt Soli, vt liceat decedere nocti,  
Atque vmbra saltem in vita gustare quietis,  
Funeribus nullis ac fletibus interruptae?  
Interea tacitus tristi de pectore cunctis  
Luctus igit, vitaeque piget, taedetque malorum.  
Non tali auxilio, non hac ratione medendum

Aerumnis,



*Aerumnis: opus est animis, est viribus usus.*  
*En mihi noua lux oritur, lux magna sereno*  
*Enituit caelo, penitusque illapsa videnti est:*  
*Quisquis es, o nostris qui ardorem mentibus addis,*  
*Te sequimur, tu rebus ades, tu coepta secundes.*  
*O vos o socij, quae sunt accommoda rebus*  
*Efficite, & meritis caelo persoluite grates.*  
*Hacc simul effatus, moliri srondea tecta*  
*Agresti stipula; inaeoque vluaque palustri,*  
*Arboribusque solo deuotis, coepit, & idem*  
*Hortatur socios: parnis consurgere primum*  
*Culminibus nulla arte casae, virgultaque circum*  
*Corpora cum folijs attexi, robore duro*  
*Arceri pecudes: diis parere magistri*  
*Vulgus iners, regit ille animos, & numina diuum*  
*Esse docet, rutilo vt conspici fulgure nubes*  
*Murmure terrifico e caelo sensere minaci:*  
*Mox etiam raris coctae mapalia villis,*  
*Atque humiles coepere domus ac tecta parari,*  
*Et pluuio commissa luto, glebaque tenaci,*  
*Et solido e saxo, paulatim compita cingi*  
*Scipibus, & vallo, & fossa, dein aggere terrae:*  
*Donec longa dies, & rerum pluri nus usus*  
*Vt reperit meditando artes, & crescit eundo,*  
*Atque hominum exacuit mentes interprete lingua,*  
*Oppida munire, aeternas indicere leges*  
*Edocuit, tutaque omnes in sede locauit,*  
*Et tandem imposuit summis fastigia rebus.*  
*Sic tenuis plerumque imo nec turbidus amnis*  
*Gemmea conspicuo gradiens per gramina riuo*  
*Labitur,*

Labitur, ut pedibus possit transmittere virgo,  
Vix vdam admirans traiecto gurgite plantam:  
Idem autem, simul atque raens de rupibus altis  
Ruptis aggeribus montano flumine torrens  
Auctus aquis, niuibusque nouo sub vere volutis  
Praecipitat saxa, & valles, camposque natantes,  
Euulsasque trahens siluas, & tecta domorum,  
Ingenti fremitu attonitum se euoluit in aequor:  
Scilicet, & metuens fluxio ne forte rapaci  
Cedere, & ignotas cogatur quaerere terras:  
Sic tonat abruptus, sic feruet spumens, ac si  
Prælia, non pelago commercia portet aquarum.  
Haud aliter paruo primum de semine creuit  
Rhetoricae indicijs rerum speciesque decusque,  
Atque homini in pecudes cesserant regna ferasque:  
Pax vnde, & requies, & tutis gaudia terris.  
Gratia magna tibi, per quam sunt omnia nobis,  
Aurea Rhetorice: tu pacis pulchra creatrix:  
Tu leges, moresque pios, tu moenia condis:  
Tu vitam e tenebris, tempestatumque procellis  
Suscipis in portu, claraque in luce locandam.  
Salve magna parens virtutum, magna virorum  
Præstantum ingenio, & rerum felicibus ausis  
Rhetorice: tua namque sequens vestigia, sollers  
Mens hominū ad magnos semper properauit honores,  
Diuitijsque olim, & donis ingentibus aucta.  
Te sequor humanae gentis decus, aethere nobis  
Concessu delata Dei. Tua maxima pergo  
Munera Romanae numquam interitura iuuentae  
Tradere. Te nobis sociamque ducemque benignam  
Adde

*Adde precor. Tu Christe magis, tu conditor orbis  
Magne iuua. Tu clara soles praepandere menti  
Lumina. Tu verbum. Tu das infantibus almam  
Scire potestatem dicendi, & pectora formas.  
Et quisquis labor hic, vni tibi militat omnis.*



FRANCISCVS BENCIVS  
E. SOCIETATE. IESV.

P. JO. ANTONIO  
*Valtrino S. D*



ALVVM te & incolu-  
mem Neapolim venisse  
gaudeo: atque istam tibi,  
siue loci, siue caeli muta-  
tionem, futuram spero &  
animo iucundam, & cor-  
pori salutarem. Nam hic quidem apud  
nos mors omnino dominatur: quae et-  
si ipsa timenda non est, tam frequenti  
tamen mortuorum spectaculo non ti-  
meri sine timore aliquo non potest.  
Non longe abierimus. Heri Ioachimo  
Pichelio iusta persoluimus, & terram  
terrae reddidimus, non sine sensu dolo-  
ris. Fateor tamen id quod est, indolui  
magis, atque etiam ingemui, in morte  
carissimi fratris nostri Pauli Stellae,  
quem nudius sextus extulimus. Scis  
quid

quid de eo collocuti simus, superiori-  
 bus an diebus an mensibus, cum eius  
 laudaremus non modo pietatem ac re-  
 ligionem, sed etiam studium & inge-  
 nium. & sane eum ita amaui viuum, vt  
 mortuus magno me dolore percusserit.  
 Semel mihi licuit ad eum adire aegro-  
 tantem: erat enim in Seminario Roma-  
 no, vbi etiam vixit. Illi autem ita gra-  
 tus fuit atque acceptus aduentus meus,  
 vt non minimam dederit laetitiae signi-  
 ficationem. Ita magno ac libenti ani-  
 mo & cogitabat & loquebatur de mi-  
 gratione, vt iam tunc appareret illum  
 eius excessum, nō misericordia, sed be-  
 neuolentia prosequendum esse. cum ab  
 eo discederem, cōplexus est magistrum  
 suum, vt ille dicebat, amantissime. ro-  
 gavit, vt sibi, si minus fortasse diligens  
 fuisset ac vellem, ignoscerem. Ego fer-  
 reus, tenui lacrimas, quae nunc intem-  
 pestiue erumpunt. Addita est quae-  
 dam dignitas ori morientis. ita ex ani-  
 mi voluptate ac laetitia redundauit ali-  
 quid in corpus. Ferunt visam ei, paulo  
 antequam obdormisceret, speciem san-  
 ctæ

Etac illius Catharinae Senensis, quam  
 praecipue venerabatur: atque hoc qui-  
 dem, quod est magis admirabile, in  
 eiusdem virginis peruigilio. Mortuus  
 est enim sabbato, eo ferme tempore,  
 quo mihi in schola, ex Virgilio, quem  
 certis explico diebus, nata est disputa-  
 tio de ijs stellis, quas Graeci cometas,  
 nostri crinitas vocant, & magnarum  
 fuisse legimus praenuntias calamitatū.  
 Narro tibi. vbi de eius interitu audiui,  
 opinione omnium maiorem cepi dolo-  
 rem, a quo quasi aberrationem quae-  
 rens scripsi carmen quoddam, quod die  
 Lunae dixi auditoribus meis. Placuit  
 tamquam recens scriptio, ac minus ex-  
 pectata. Mitto ad te, non quo sperem  
 tibi probatum iri opus, in quo nihil lau-  
 des praeter voluntatem, vno praeser-  
 tim die confectum: sed vt dolor, quem  
 ex eo nuntio tu pariter maximum ca-  
 pies, hac fortasse lectione leniatur.  
 Quod si illud addideris, vt, si tibi videat-  
 ur, plures facias doloris mei aut po-  
 tius ineptiarum participes, non erit id  
 mihi tam mea causa gratum, quam vt  
 C cognoscant

cognoscant omnes, Stellam nostrum  
propter egregiam quamdam indolem  
& virtutis & ingenij, non solum di-  
gnum qui a nobis, sed etiam qui ab om-  
nibus, qui de eo aliquid inaudissent,  
amaretur ac diligeretur, fuisse. Vale.

v. Kal. Maias CIO IO LXXXIV.



35

E P I C E D I O N  
I N . P A V L V M  
S T E L L A M



*NE* prohibes lugere dolor, dolor  
improbe, quid me  
Flere iubes, & flere vetas? Tu-  
mesacta resident  
Vlcera, & ex oculis vndabit vi-  
uidus ardor ,  
Qui mentem coquit, & carpit. Quid vincla pudoris  
Obijcis, & frustra tentantem exire coërces  
In gemitum, & vero testari pectora vultu?  
Frustra ignis tegitur, sensim se exuscitat ille ,  
Castigatque moras, tantoque valentior exit ,  
Quo magis obicibus ruptis sese extulit, atque  
Claustra indignatus, patefecit flumine campos .  
Scilicet extinctus STELLA est, mihi lumē ademptū.  
Dumque miser iacto mutantem regna cometen ,  
Ac portendentem gemitus mortalibus aegris,  
Exuor heu regno : regnum mihi Paule fuisse .  
Et vocor ad gemitus . Quod si mortalia corda  
Tangit adhuc pietas, nostri miseresceitis . Heu me  
Dissimulare dolor, pudor est aperire : sed absit

Hinc pudor, excipiam maerenti corde dolorem,  
 Quem tamen effundam, si qua est via: fluctuat ille,  
 Fluctuat, atque imo rumpuntur carcere flammae.  
 Eloquar incompte, comptus dolor abiicit. ecquis  
 Ornatum ferat in lacrimis? dolor anxifer idem  
 Et lucem fugit, & tenebras: quantumque videri  
 Se cupit, ornari metuit. timor aequus utrimque est.  
 Et mihi vix vox ipsa viam sibi repperit: & vix  
 Fundere conanti datur illaudabile carmen.  
 Coepta dolor prohibet, mens urget damna tacendi  
 Impatiens: gliscit non attrectabile vulnus,  
 Nec medicas vult ferre manus, plagamque recentem  
 Asperat: haec nullam membris dat saeva quietem.  
 Haec ego, si tecum, tu si solator adesses,  
 Aequo animo ferrem: tu sed mihi causa doloris,  
 Nec solator ades: tu me hac caligine mergis  
 STELLA extincte: licet tu non extingueris: auges  
 (Hoc pietas, hoc casta fides, hoc integra suadet  
 Religio, hoc mores digni caelestibus) auges  
 Caelestium numerum, & maiori luce resulges:  
 Sub pedibusque vides stellas, & despicias orbem.  
 Forsitan & nostros rides laetissime luctus.  
 Excidere e caelo Sol visus: causa dolendi  
 Illa mihi: cessitque omnis de corde voluptas.  
 Vidi ego te morti, dulcis mihi PAULE, propinquum:  
 Inieci simulans spem vitae: certus eundi  
 Oblatam tibi tu vultu meliore recusas  
 Spem vitae, & caelum, caelum, clamore salutas.  
 Hic ego quid facerem? vidi haec, & territus hausi,  
 Atque premens altum maerenti corde dolorem  
 Dissimulans

*Diffimulans mandata dabam. Disiungimur. At tu  
Vadentem amplexus, veniam petis. O ego durus,  
Abstiniui lacrimis, voci luctuque peperci.  
At nunc me tandem desertum conqueror: & quam,  
Si propria, heu, mihi lux fuerat, lux illa decusque  
Gymnasij, poteram fingi: dicique beatus,  
Nunc tandem inuitus fateor: numquam excidet ille  
Addiscēdi amor, & studiū, quo PAVLE flagrabas,  
Atque facem socijs manifesta in luce ferebas:  
Seu tibi Romani decus immortale paterque  
Tullius eloquij, seu non imitabile carmen  
Virgilij ante oculos esset: tu ponere suctus  
PAVLE pedem, quocumque horum vestigia ferrent.  
Atque etiam, heu miserū, memini te dicere: summus  
Intentum te operi, quod nobis forte parabas,  
Oppressit morbus. videor mihi saepe fuisse  
Mortis causa tuae. ab potius mihi terra dehiscat.  
Pro quo etiam optassem, si fas, effundere vitam.  
Quam tibi, de nostris, quosquos mihi demeret annos,  
Apposuisse Deum cuperem. Tua dignior actas  
Vita erat. Heu raperis primaeuo in tempore vitae:  
Et vere in medio decusso flore, fefellit,  
Quae magnae in messis spem sese erexerat, aestas.  
Quo mentes casu attonitae, damnoque repentī,  
Vix factum pensare valent, lacrimasque resorbent,  
Quae, simul atque aberit terror, vaga flumina fundēt.  
Hoc cōmune malum: proprium mihi. proxima primū  
Tanguntur, tanguntque. Tibi sed proximus ipse,  
Et mihi tu. Quid enim propius, quam cura docentis,  
Discentisque labor? Veniam date magna loquenti,*

O iuuenes. amor atque dolor miscentur in vnum.  
Magna quidem ingenij splendet lux vestra, fugatis,  
Et video & laetor, longe lateque tenebris:  
Sed tamen, haud aliter vos inter STELLA refulsit,  
STELLA meus, stellas inter quam Luna minores.  
Iamque abit ex oculis, celeresque euadit in auras,  
Quaque fugit, nequeunt oculi seruare sequentum.  
PAVLE fugis, nec te fugientem vidimus, heu heu  
Nec laetum, vt perhibent, extrema aspeximus hora:  
Heu, nec clausi oculos iucunda in morte natantes,  
Laeta quibus mors insolitos afflauit honores.  
Desuimus summo officio: sed nostra rependunt  
Munera caelicolae: nec abes sanctissima virgo,  
Qua se dines auis, & claro nomine iactat  
SENA vetus, lux illa tuo praecessit honori.  
O ego, si possem tibi caelo educere molem  
Magnificam, celsas attollentemque columnas,  
Quam non tempus cdax, non inuidiosa vetustas  
Dirueret, neque ventorum conuelleret ira,  
Seruaretque tuum aeternum per saecula nomen:  
Non equidē abnuerem, nec me labor iste grauaret,  
Aut operis terror: viresque animosque cupido  
Adderet, & meritum solarer forte dolorem.  
Adjicerem Pario incisum breue marmore carmen.  
Visa modo in terris, in caelum STELLA recessit.  
Sed quoniam, tellus quicquid miratur & ambit,  
Despicis: & praestare, animus quod postulat ingens,  
Non opis est nostrae: ne munere fungar inani,  
Accipe, quod carmen tibi fundo flebile. Munus  
Exiguum, at magni monumentum & pignus amoris.

DE

39

# DE ALMA DOMO

## LAVRETANA

### CARMEN



*E* nunc, alma Domus, Picensi in  
littoris ora,  
Aduectam Illyricis freta per mi-  
rantia terris,  
Quam colimus toto votiva ex orbe  
ferentes

Munera, carminibus celebrem. Tu maxima Praeses  
Dia parens, tu vati affla, tu dirige euntem,  
Dum dubium praetentat iter, Galilaeiaeque arua,  
Resque humili parat ingentes evolvere versu.

Iam Gabriel Mariam affatus, iam iussa parentis  
Hauserat aetherij, iuuenum comitante caterua  
Caelicolum: angusto referens cum limine gressum  
Substitit, ac tales effudit pectore voces.

Salve sancta domus, salve o domus aemula caelo,  
Quae capis, & claudis, quem totus non capit orbis,  
Nec potuit clausisse polus: domus aurea salve,  
Vnde salus hominum, superumque afflantur honores.

Tu ne Dei hospitium, caeli terraeque potentis?

Tu ne Deum socias homini? tu fortia sancis

Foedera? tu rerum domino carissima nectis

Vincula, quae numquam veniens dissoluerit aetas?

O semper memoranda, Deus qua ludet in aula

Parvulus, & teneris ponet vestigia plantis:  
 Quantarum vel testis eris, vel conscia rerum,  
 Cum gremio natum accipiet laetissima virgo,  
 Et noscet venerata Deum, figetque vicissim  
 Oscula, & aeterni figetur vulnere amoris.  
 Cum Deus appellans titubanti voce parentem  
 In dulces ruet amplexus, risuque benigno  
 Non semel implebit lacrimantis gaudia matris.  
 Verum ubi paulatim crescens adoleverit aetas,  
 Et poterit certas audire & reddere voces  
 Conatu meliore puer, quot quantaque disces  
 Colloquia? o quali assidue sermone fruuntur  
 Filius, & genitrix? Quoties arcana recludet  
 Ille Patris? quoties matrem ventura docebit?  
 Audiet haec, & sacra inter penetralia condet  
 Componetque libens, quae mox depromere possit,  
 Tempus ubi & rerum poscet certissimus usus?  
 Cetera quid memorem? An iuuenis cum vota suorum  
 Praeuenit obsequio, atque humilē se format ad artē?  
 An magis ut bis terna latet per lustra, nec illam  
 Sol veluti obscura radios caligine tectus  
 Extulit, aut parvam, densa inter nubila, lucem?  
 Haec tibi nota vni fuerint, nec cognita caelo.  
 Dixerat. Aligerum interea de fratribus vnus,  
 Cui, mandante Deo, tellus Galilaea tuenda  
 Obtigerat, duplices tendens ad limina palmas  
 Suppliciter, tali Gabrielem est voce secutus.  
 O nimium dilecta Deo domus inclyta salve,  
 O curae pars magna meae: quam summus Olympum  
 Ipse simul repetet rector, castissima mater

Incolet:

Incolet : & morum quoniam fideique magistra  
 Ipsa erit, hinc dubijs poscent oracula rebus  
 Doctores hominum : diuini hic numinis aram  
 Constituent, ritusque sacros : nec parua sequetur  
 Gloria, te, multis labentibus ordine saeculis,  
 Visendi studio, patrijs e finibus olim  
 Ad tua Christicolae laetantes limina ituros.  
 Lambere quos terram, quos perreptare iuuabit  
 Innixos genibus, voluit qua ducere vitam  
 Omnipotens, & certa pedum vestigia liquit.  
 Salue iterum atque iterum domus o mea maxima cura.  
 Haec ait. at iuuenis contra, cui cesserat vni  
 Illyrici plaga ampla orbis, sic incipit ore.  
 Ast ego te, veneranda domus, post saecula dena  
 Ternaque, cum Syriam inuadet crudelibus armis  
 Hostis atrox, & caede fera & terrore coactam  
 Sub sua iura adiget, victosque arcebit inique :  
 Ne sanctum sit praeda canum, ne perfida turba  
 Ausit opes superum manibus temerare cruentis :  
 Tunc ego te, volet ipse Deus, stipante corona  
 Aligerum, trans & montes, & caerula regna,  
 Sedibus e proprijs vulsam, ac fundamine prisco,  
 Illyridis nostrae statuam sub vertice celso,  
 Italiam contra, qua curuo in littore pontus  
 Aestuatur Hadriacus, canisque allabitur undis.  
 Qualia tunc populos contingent gaudia nostros ?  
 Dalmatiam, Ioniamq. omnem, Carnosque, Liburnosq.  
 Istrosque, & Venetos, Alpini & regna Timaei.  
 Testis Alexander sacrorum antistes, acuti  
 Arida cui longum torrebat viscera morbi.



*Vis grauis : & subito decedet corpore febris ,  
 Accurretque, domum lacrimis veneratus obortis .  
 Testis Frangipanes, illam iustissimus oram  
 Qui patrio reget imperio. vos denique testes ,  
 Qui Nazareth missi , certissima signa feretis ,  
 Murorum spatia atque soli : quae ducta per omnem  
 Circuitum fidis monstrabunt licia nodis .  
 O vtinam propria haec essent tibi dona futura  
 Illyris : attinges tantum . Tres scilicet annos ,  
 Vix etiam septem cernes ea munera menses .  
 Sic Domino visum . Finem hic dedit ore loquendi .  
 Namque huic, atque alijs, quorū dedit esse ministros,  
 Omnipotens, etiam ventura arcana retexit .  
 Haec inter, iuuenis roseo pulcherrimus ore ,  
 Cui diadema caput, torques gemmata coronat  
 Cui collum, & longe rutilanti fulgurat auro .  
 Sedulus hic custos Picenae gentis , vbi Ancon  
 Nomina dat terrae , & tumidū procurrat in aequor,  
 Suscipit, & laetus reliquis mirantibus insit .  
 O, quod te celebrem templum memorabile : & o quā  
 Te domina Italia appellem: quo laurea silua  
 Piceni mihi grata agri, te nomine dicam ?  
 Cui domus haec dabitur cunctos seruanda per annos,  
 Auroque, & gemmis, donisque ingentibus aucta ?  
 Te super aequoreas, elatam nubibus, vndas ,  
 Nubibus aligerum circumque supraque canentum ,  
 Ducentumque thoros manibus per mutua nexis  
 Attonitum mare conspiciet, factaeque relinquet  
 Per medium signa alba viae. Te Recina tellus  
 Pastorum indicio excipiet : te marmore cinget .*

*Arte*

Arte laborato, ponetque expressa figuris  
Argumenta operis. Gens huc toto orbe profecta  
Confluet, auxilium genitrix sanctissima poscens  
Illa tuum, votique simul damnata. Manebunt  
Suspensae tabulae, & pulchro donaria templo,  
Laminaque, & titulus suscepti muneris index.  
Expulit hic Stomacho delapsus virus. At illi  
Albidus abscessit venter, quem languor aquosum  
Corrupti iecoris vitio, fluidoque liquore  
Inflarat, nantem infundens per viscera mortem.  
Huic autem fera per correptas flamma medullas  
Sacro igni, caeca vexabat pectora peste:  
Huc simul ire vouet, gliscentem flamma furorem  
Deposuit, pestisque retro conuersa remisit.  
Vulnera non memorem sanato in corpore, nec cor  
Effusum ex vtero sua rursus in claustra receptum.  
Sic, velut extincto, redierunt munera lucis.  
Hic leto grauiora putans tormenta, sub acri  
Iudice, confessus falso (nam saepe coëgit  
Prodere res dolor infectas) dum vincula collo  
Insertat, te virgo orans, tum vincula fracta,  
Et manicas penitus ruptas mirabitur insons.  
Iam quid & in bello, & pelago, seruata renarrem  
Agmina, cum feruent hastae, cum turbidus imber  
Praecipitans sine mora furit, nausque dchiscit  
Allisa ad scopulos? Tu non frustrare rogatus  
Alma pios: excussa procul mors: reddita vita:  
Et modus, & tempus, cernentur scripta per aeuum.  
Sed quis finis erit, tua si miracula dicam  
Lauretana Domus? Semper te, supplice adibit  
Voce

*Voce frequens populus: Tyrio te vellere cincta  
 Regia progenies: hic sceptrum ponet & enssem  
 Caesar: & angusto submittet vertice sacram  
 Christiadum mitram pastor. Te barbarus, armis  
 Cuncta licet circum vastet, venerabitur hostis:  
 Ut tua vel medio sit tuta in milite gaza.  
 Huc quisquis veniet perfusus membra timore,  
 Atque horrore comas, sanctam procumbet ad aram,  
 Ad veterem pueri effigiem, quem mater in vlnis  
 Sustentans cernere sacris. Tum lignea contra  
 Orabit simulacra crucis. Vidisse caminum  
 Dulce erit angustum, paruique armaria tecti,  
 Hic ubi seruatur vilisque & pauca supellex.  
 Nec minus effinxisse animis, tersisseque labris  
 Arctius impressis terram, qua parte puella  
 Dia fuit, Gabriel, tu cum suprema pauenti,  
 Quae dederat Pater omnipotens, mandata tulisti,  
 Castaque diuino tumuerunt viscera partu.  
 Vix ea: cum Gabriel, multis comitantibus, aedem  
 Ante salutatam linquit. sua quisque reuisit  
 Munia: pars maior superas euasit ad arces:  
 Terraque disclusam stupuit fulgescere lucem.*



45

# DE. OBELISCO<sup>45</sup>

## VATICANO

AD. SIXTVM. V. PONT. MAX.



*Quæ* *AE* vetus aërio contingens ver-  
tice nubes  
Stat moles spectanda foro , que  
clauiger aedem  
Petrus habet , cineresque sacros,  
aramque sepulcri ,

*Non* leuis hanc humili deductam e sede potestas ,  
*Vt* validas ostentet opes , artemque magistram ,  
*Extulit* , illustrique magis statione locauit :  
*Sed* pietas , sed sanctus amor , sed iusta cupido ,  
*Vt* veteres cultus , abolendaque numina diuum ,  
*Impia* quos olim fertur coluisse vetustas ,  
*In* melius conuersa , animos suspendere & ora  
*Visa* queant , tollantque Dei victricia signa :  
*Qui* simul humanos artus , moribundaque membra  
*Victus* amore suo casta de virgine sumpsit ,  
*Inque* crucem tulit efferri , simul omnia traxit  
*Ad* sese , & victor terrarum constitit orbis .  
*Ergo* , & quam geminis , nec iusta lege , dicatam  
*Caesaribus* quondam , perhibent incisa vetustis  
*Saxa* notis : Pater hanc *SIXTVS* tibi magne sacrauit  
*Christe* Pater , regumque apices , *Aegyptia* tellus  
*Quos* tulit , aeterno domino perere coëgit ,

Innumeras traxit gentes, longoque leuauit  
 Seruitio, ac saeua constrictas compede soluit:  
 Perque graues casus, & mille pericula rerum,  
 Incolumes tandem optatam perduxit ad oram,  
 Hostibus extinctis, spolijsque ingentibus auctas.  
 Sed quid ego haec autem Fidei miracula narrem,  
 Atque die in medio doceam lucescere Solem?  
 Certe ingens Fidei mirabitur argumentum  
 Quisque tuae, ter sancte senex, qui grandia saxi  
 Pondera, quod mare vix tenuit, vix horrida tellus  
 Praestitit eductum sinuosi e vertice montis,  
 Sublatumque alte fugit perterritus aër,  
 Imperijs erecta suis conspexerit. vt crux  
 Alta triumphato terrarum impendeat orbi:  
 Proque viri foribus, cui credita ianua caeli,  
 Alliciat mirantum animos, Christumque secutis  
 Indicet aetherij patefactum limen Olympi.

DE THOLO. S. PETRI  
IN. VATICANO



AD. VRBEM. ROMAM



OMA VIRVM, rerumque  
potens, quae culmina caelo  
Fers propior, propiorque Erebo  
vestigia figis,  
Et manibus totum geminis com-  
plecteris orbem:  
Aeterno imposta in saxo, quod  
vincere numquam

Vis queat inferna, aut propria de sede mouere:  
Ipsa licet certent tot monstra immania summis  
Expugnare odijs, certentque euertere ab imo.  
Vrbs vna ante alias fortunatissima, & vna  
Ante alias vrbes superum gratissima regi:  
Cui quondam placitum, bello & victricibus armis  
Per populos vt iura dares, nunc denique pulsas  
Vt tenebris larga perfundens omnia luce,  
Clara serenatis praepandas lumina terris.  
Vrbs sacra, cui quamuis immensi terminus aevi  
Nullus erit, nisi cum mundum considerare in ignes  
Ipse dabit genitor, corpusque immane resolui:

Damna

Damna tamen, rerumque vices perpeſſa, periculis  
 E medijs ercepta, graues ſarcire ruinas  
 Inſiteras dudum, atque iterum ſpectanda referre  
 Quae ruerant monumenta patrum, cultusque nouare,  
 Quos hominum inuidia aut labens aboleuerat aetas.  
 Iam vultu meliore nite, iam concipe priſcis  
 Non modo temporibus ſpeciem, ac virtutibus aptam,  
 Sed magis inſignem viſu, quam priſtina quando  
 Saecula vix norunt, mirentur poſtera ſaecula,  
 Et veteri praesentem artem contendere certent.  
 Aſpice quod MONTE ex ALTO tibi prodijt aſtrum,  
 Aſtrum FELICIS vitae index: nobilis aſtrum  
 Virginis eſſe putes, mores quae laeta vetuſtos  
 Iam rediſſe, hominum dignetur viſere coetus:  
 Praeq. ferens ſpicum & ramum frondentis oliuae  
 Illuſtres tibi deferri gratetur honores,  
 Qua ſe cumque tulit, gradiens qua lumina vertit.  
 Namque hic Caesareos obeliſcos cedere vidit  
 CHRISTE tibi, ſacramq. Crucē praetendere ſummo  
 Vertice, & antiquis ornatum accedere templis.  
 Hic rectas patuiſſe vias, certoque petitum  
 Tramite, qui celſos longe ſinuatur in arcus,  
 Flumen aquae, celebrare urbem montemq. Quirini,  
 Et qui Phacacum nemori non inuidet hortus.  
 Hinc etiam atque illinc geminas extare columnas  
 Argumentum olim pugnae, iuſtisque triumphis,  
 Quem manus extuderat caeſis animare figuris  
 Docta opus, & viuos de marmore ducere vultus:  
 Nunc veluti ſedem & fulcrum ſublime duorum,  
 Qui ſtudijs orbem paribus ſepere regendum



Et PETRI simul & PAULI. Stat praeses vterque  
 Aureus, ac sibi subiectas iam despicit arces,  
 Sub quibus infonti fudit cum sanguine vitam.  
 Has inter noua nunc tantum fastigia tollit  
 VATICANVS apex, vbi rerum torquet habenas  
 Humani generis custos, quantum ipse sacerdos  
 Mortales inter sacrum caput extulit omnes.  
 Haec PETRVS procul, & curas sub corde prementē  
 Regales SIXTVM aspectat: regum ipse potentum  
 SIXTVS opes laudesq. animis & sumptibus aequat,  
 Tum vero affari, mentemque accendere dictis.  
 Sancte senex, quem tot lectis e patribus vnum  
 Iustitia & pietate grauem, rex aetheris alti  
 Ordine tam longo voluit succedere nobis,  
 Sic meritum, CHRISTIQ. vices implere gerendo:  
 Dum niueas tutaris oues, dum laeta ministras  
 Pabula, nec partem auertunt furesve lupive.  
 Viue diu, nec te angustī timor anxius aeni  
 Grandibus abducat coeptis. Tibi plaudit Olympus  
 Auctus caelitibus, te iudice. Te stupet aequor,  
 Instructam admirans Tiberina ad littora classē,  
 Altaq. iamdudum pacatis otia terris.  
 Nunc age, perge feris purgare immitibus orbem,  
 Instaurare vrbis perge immortalis honorem,  
 Quod facis: aeternū vt maneat tua fama per aeuum,  
 Ipse ego tecum adero, & tandem tibi debita reddet  
 Munera, cum functum mortalis munere vitae  
 CHRISTVS in aetheriam victurum ascuerit aulā.  
 Audijt haec SIXTVS, caelique incensus amore,  
 Per benefacta viam ad superos sibi munit, & urbem  
 Regisco

Regifico cultu, donisque ingentibus auget.  
 Tum, veluti satis haud esset, quod largus egenos  
 Hospitio victuque iuuat, quod triste ferentes  
 Seruitium redimit pretio, quod publica laxat  
 Horrea, & aduectis solatur frugibus annum,  
 Auertitque famem, querulaeque impendia plebi:  
 Exquilias etiam sedes, penetralia MATRIS  
 VIRGINIS, & casti praesepia conscia partus,  
 Protinus adiecti decorat splendore sacelli.  
 Nec procul hinc adeo, LATERNI limina tēpli,  
 Sacra vbi Pontifices quondam fecisse feruntur  
 Rite DEO, & populis pia iura dedisse vocatis,  
 Non reficit tantum longo cedentia saeclo:  
 Ampliat, & solido partem de marmore ponit.  
 Sed quid ego indictum te VATICANE relinquam,  
 Mons sacer, vnde homines iam non oracula poscunt  
 Deuia, & errorem dubio velantia sensu,  
 Sed summi responsa PATRIS, qui legibus orbem  
 Temperat, & caeli dispensat munera terris?  
 Huc feror, huc tota rapior per singula mente,  
 Nec potis expleri visu. Iuuat vsque reuerti,  
 Atque animū, atq. oculos, noua per spectacula pasci.  
 Quid primum memorem? Augustis ex aedibus olim,  
 Fetibus ingenij dulcem captantibus auram  
 Non minimum exclusum spatij, quo muta per artem  
 Vt valeant monumenta loqui, teneantque docendo,  
 Impressis elementa notis noua littera signat?  
 An magis extructas felici munere sedes,  
 Tecta Palatinis non concedentia priscis,  
 Quae tibi consulto scelerumque & fraudis Apollo

Extulit Augustus, similesque effinxit in vsus?  
 Hic vbi magnorum veneranda volumina patrum,  
 Et sapientum artes, doctrinarumque reperta,  
 Certa quibus senioque fides, & nescia falli  
 Maestas residet vultu, condentur, vt omni  
 Tempore depromi quaerentum ad commoda possint.  
 Quisquis vt externa consultor venerit ora,  
 Et doctus meliorque abeat, causasque rogatus  
 Haec habeat dixisse satis, nec dicta retractet,  
 In VATICANO sic est effata Sibylla.  
 Sed quis iam fremitus, quis iam fragor occupat aures  
 Non longe? clamor ne virum, stridor ne rotarum,  
 An confusa ruunt simul omnia? saxa iacere  
 Hic video, hic stratos lateres, hic rudera acervos,  
 Caementa, hic bibulae mons est aggestus arenae:  
 Hanc contis subigunt iuuenes, gaudentque praeusta  
 Miscentes liquidas vndas committere calci.  
 Aspice dispositos lapides iam parte polita,  
 Artificumque manus reliquo insudare labori,  
 Quadrupedes in gyrum actos. Tolluntur in altum  
 Marmora difficili nisu: indignantia credas  
 Praecipitemque adeo frustra minitancia casum:  
 Sic strepitant, nodoque gemunt grauiore reuincta.  
 Non ego non possum visus attollere tantum,  
 Quantum surgit opus: lassantur lumina, & ipsa  
 Nondum acie superare queunt fastigia templi.  
 Scilicet hoc PETRO extruitur mirabile templum,  
 Magnum, excelsum, ingens, caeli pars maxima curae:  
 Formam vnde aduectam terris ostendit, vt aiunt,  
 ANGELVS, & tulit aetherias se rursus ad oras.

Nec

Nec mora, Pontificum mens huc traducitur, aedem  
 Ut statuant : sed res alio conuertere magnam  
 Improvisa animum cura grauiore coëgit.  
 Nimirum haec perfecti operis tibi gloria, SIXTE  
 Magne Pater, seruata tibi est. Tibi namque dedere  
 Caelicolae ad summos olim succedere honores :  
 Ut quamquam metuenda alijs, quamquã ardua tentes,  
 Atque humana graui musset persaepe labore  
 Ars, alias memor ipsa sui : tamen irrita numquam  
 Coepta, nec in vanos abeant ludibria ventos :  
 Et pia magnanimis aspirant sidera votis.  
 Te voluisse sat est. Graue & immutabile SIXTI  
 Pondus inest verbis, & vocem facta sequuntur.  
 Hinc, reliqua ut taceam, fieri quae posse negabant,  
 Facta, nec obsistat narranti inconditus ordo  
 Plurima : tu certe caelestis ianitor aulae  
 Conspiceris maiore tholo : tibi conditur aedes  
 Sacra, tuis vicina astris, qua nulla per orbem  
 Pulchrior, & qua Sol oriens se emergit Eoo  
 Gurgite, & Hesperijs obiens qua mergitur vndis.  
 Vix alibi te digna domus. Tua gratia SIXTE :  
 Cuius ad impensas animus molesque superbas  
 Augetur magis atque magis. Tu commoda postquam  
 Pacis in Italiam gaudentem principe tanto  
 Tuta refers, reddisque suos cultoribus agros,  
 Hanc etiam ingenti versas sub pectore curam, !  
 Ut PETRO quae coepta domus producit annis  
 Pluribus, ad seros se perductura nepotes,  
 Sic tarda se mole mouet (praecepta resistent  
 Ni tua sancte Pater) tandem molimine magno

*Vndique conductis operis, manibusque coactis,  
 Extremamque manum accipiat, finemque laboris.  
 Haud aliter, quia magna decet componere magnis,  
 Maximus Isacidum rector, cui candida nomen  
 Pax dedit, & partam meritis sapientia laudem,  
 Tum demum Solymis templum sublime locauit,  
 Urbis opus, sanctum, augustum, cum munera belli  
 Victoris patris imperio sopita quierunt.  
 Res melior sed SIXTE tua est. Illa inclyta templi  
 (Sic DEVS effatus) Solymorum gloria cecidit.  
 Cumque suis deserta iacet cultoribus ara.  
 Ergo & in arduas volitarunt tecta fauillas,  
 Dissiliisque procul lapides, auulsaque saxis  
 Saxa, nec antiqui manserunt signa decoris.  
 At iussis quae nixa tuis extollitur aedes  
 Sacra PETRO, aeternum toto celebrabitur orbe,  
 Et SIXTI feret inscriptum per saecula nomen.  
 Tu modo, quod superest, sanctis hortatibus vrge  
 Magnum opus, & sumptus impendere perge labori,  
 Inceptumque ingens laetis successibus exple.  
 Bellum alij te auctore gerant. Hostemque rebellem  
 Consilijs, opibusque pares, & foedere certo,  
 Ceu pestem excutiant longe, ne morbida gentes,  
 Quae iterum iam parva salus, contagia laedant.  
 Forsan & optatum veniet te principe tempus,  
 Cum Turcam audacem bello pelagoque potentem  
 Christigenae vincent armis: tu capta inbebis  
 Ad VATICANVM deduci colla triumpho,  
 Suspendique tholo sublimi barbara signa.  
 ROMAE quidem tunc te mirabere, tunc tibi dices  
 Pulchrior,*

*Pulchrior, in melius veteres cessisse ruinas :  
Cumque nouum decus aspicias laetissima, SIXTVM  
Auctorem decoris semper venerabere, SIXTVM  
Per fora, per fontes, per agros, per templa sonabis.*

---

## IVDICIVM. LABORIS ET. TORPORIS

Dictum in Gymnasio Rhetoricae tertio  
nonas Nouembris M.D.LXXXIX



*IS GRAVIOR, Torporem  
inter, pulchrumque Laborem  
Inciderat : dum turpe putat con-  
cedere Torpor,  
Et veterem sibi praereptum cau-  
satur honorem.  
Iam parat instructos testes, iam  
crimen acerbat*

*Multa mouens, luxum interea somnumque facessens,  
Et longam accendit stimulis non mollibus iram.  
At Labor, abiectum quamquam contempserat hostem  
Cum risu coeptum indignans, se impune lacesci  
Iam toties non ferre potest, seque increpat vltro,  
Virtutem exacuens, qua dicta aduersa resellat.  
Et causam disceptat Honos: Hic visus vtrique  
Arbiter, aequato geminas examine lances:*



Qui tenet, haud flecti facilis precibusve minisve.  
 Haec ego, dum fictis miscens verissima, paucis  
 Persequor, ut dulci delectem carmine mentes,  
 Attentas habuisse aures fortasse iuuabit.  
 Iamque dies edicta aderat. Sedet inclytus ostro  
 Atque auro sublimis Honos, foribusque reclusis  
 Torporem magna praeconis voce Laboremque  
 Imperat acciri promptus cognoscere causam.  
 Ac prior ingenti molimine Torpor agit se.  
 Vix dicas pedibus stantem: sic crura vacillant,  
 Et comite hinc suffultus, et hinc, pigra corpora firmat.  
 Lumina vix adeo extollit, dum iudicis ora  
 Aspiciat, famuloque ferat dictante salutem.  
 Nec mora, poscenti (nam ferri iusserat ipse)  
 Sella capax mollisque datur. Laetata corona est,  
 Ut latum in lata ventrem videre sedentem,  
 Nec quicquam superesse loci. Sic omnia complet.  
 Nec minus & propior puer est, qui temperet aestus,  
 Et ventum faciat, muscas abigente flabello.  
 At comes interior, submisso murmure, tempus  
 Ut terat, alloquitur: motans caput ipse, vicissim  
 Annuit, atque aegre defendit lumina somno.  
 Haec inter, Labor ingreditur, non robore tantum  
 Aetatis, sed flore vigens: neglecta decorum  
 Vestis obit corpus: sic & neglecta decebat.  
 Et patet incesu pulcher. Veneratur Honorem  
 Principio: cunctosque dein, quos accipit aula,  
 (Nam multos Fama excierat) gestuque modesto  
 Appellat, laetum, & vultu arridente salutat.  
 Ipsi autem: Reus hic n., aiunt, hic dicere causam  
 Cogitur:



Cogitur : iste actor ? Rerum o praeposterus ordo ,  
Inuersaeque vices . Sed consultissimus aequi  
Arbiter est : vtrique bonus sua praemia reddet .  
Iudicis interea nutu vocale minister  
Inflat ebur , partesque citat . Sonus impulit aures  
Cunctorumque animos . Torpor vix corripit artus  
Languentes : gemina in diuersum brachia tendit ,  
Oscitat , atque oculos mulcet : vix denique tollit  
Corpus iners : fessusque iterum segnisque residat ,  
Ni fodiant comites crebro , monstrentque Laborem  
Omnia cernentem irrisu , risuque sequentem .  
O quantum valet optatae spes aemula laudis .  
Olli segnitiam rupit pudor . Et simul vt se  
Irrisum aspexit , subitas exarsit in iras ,  
Et penitus toto eiecit de pectore somnum .  
Tum vero ingreditur . Res importuna quietem  
Turbat , & insolitum tentare negotia cogit .  
Sed semel hoc subeundum animo , ne saepe fatiger ,  
Atque eadem patiar toties . Numquam ne quiescam  
Per te inuise Labor ? Nam quae te vexat Erinnyes ,  
Quis furor , vt nostra inuadas , taeterrime , regna ,  
Dulciaque inuideas cupientibus otia terris ,  
Otia pacato terras aequantia caelo ,  
Otia caelicolum semper dignissima vita ?  
Tu maciem morbosque trahis . te incommoda mille ,  
Mille homines perdendi artes , luctusque sequuntur .  
Per te vita grauis mortalibus . Accipe iudex  
Optime : & ex imo deductas pectore voces ,  
Non iniusta peto , placatis auribus hauri .  
Qui natum in curas hominum genus esse queruntur ,  
Seque

Seque ferunt miseros, non accusare Laborem  
 Non possunt. Labor est hostis. Labor omnibus idem  
 Et dolor, & terror. Nam quot se vertit in ora  
 Improbis, ut capiat? quanta, heu, mendacia fingit,  
 Spem pretio vendens? hinc praesens nulla voluptas  
 Certa homini, dum incerta inhiat, poscitque futura,  
 Atque animum frangit curis, & pondere corpus.  
 Nec tantum ante annos sequitur properata senectus,  
 Mors etiam. O iuvenes, ubi vestra absumitur aetas,  
 Et breue quod vitae volat irrenocabile tempus.  
 Hinc calor effervet capiti, dentesque labascunt,  
 Lumina habent, renesque dolent, venterque, pedesque,  
 Et pulmo, & rigidas tussis coquit arida fauces.  
 Quot vestrum, quot, pallor habet, quot sanguis ab ore  
 Expuitur? quorsum longas protendere noctes  
 Peruigili studio: quorsum consumere luces  
 Assiduas, dum pectus agit ventosa cupido  
 Cuncta laboriferis quae sunt dudum illita chartis  
 Discere, & ingrati famam producere in acumen?  
 Mors ruit interea, & coeptis ingentibus obstat.  
 Talia suspensio demittit aranea filo  
 Et trabibus, sibi vela legens, sibi viscera carpens:  
 Et praedam afflicta cura frustratur inani. (est,  
 An quae animus meminisse horret, memorare necesse  
 Quot mare, quot ferrum exhaurit, dum nomen honoris,  
 O Honor, usurpant frustra: dum sacra profanant,  
 Et sibi promittunt securae gaudia vitae?  
 Quid? quod & interdum vitam lucemque perosi,  
 Taedia quod nequeant longi superare laboris,  
 Vincula suspendunt tectis, ubi debile corpus  
 Impediunt

*Impediunt collo, atque animas misere sub umbras .  
Heu miseras animas. Tantorum causa malorum  
Tu labor . O commune odium superumq. hominumq.  
Digne Erebo, vnde audax olim prolapse sub auras  
Pestifero attactu terrarum conficis orbem .  
In segetem ceu flamma ruit , cum forte ministrat  
Vim Boreas : crepitant stipulae, culmisq. propinquis  
Iniiciunt inimicum ignem : dispergitur ille  
Hoc magis , atque omnem spem lati intercipit agri .  
Aut veluti pluuijs riuisque sequacibus auctus  
Tibris agit fluctus, & priscum transilit alueum ,  
Ostia cum contra Tiberina spiritus Austri  
Perflat, & intrantem prohibet , retroque repellit .  
Ille pedem referens agros oblimat inertes ,  
Et pontem insultans stagnantem territat urbem .  
Et qua currus erat , remo fert nauita lintrem .  
Et dubitant aliqui victum damnare nocentem :  
Non terris arcere parant, non mergere ponto ?  
Et caput infandum, ferum & illaetabile nomen  
Viuat, viuat adhuc ? audet se opponere nobis :  
Iudicij lucem haud metuit: non nomen Honoris  
Iudicis, aut hominum saltem non respicit iras ?  
Quem primū summumve vocē ? quove ordine testes  
Appellem? O homines certatim accurrite, vestrum  
Obruite hunc hostem, & terras caelumque leuate.  
Fer miles gladium, remum fer nauta , ligonem  
Cultor agri, fer nupta colum, instrumenta dolorum  
Artifices duri, pueri calamumque, librumque,  
Et scalprum : sua quisque ferat quae sustinet arma :  
Et caput inuisum vestris pertundite telis .*

*Talia*

Talia monstra nefas tam longum viuere. Dixi.  
Plurimus interea sudor de fronte volutus  
Labitur, & faciem riuo inficit. ilicet illum  
Abstergunt comites lino. Considerare iussit  
Ipsium Honor, vt patuit praepingui corpore fessus :  
Lucentesque diu quatit aeger anhelitus artus.  
Is sedet, & pallam, quam lato amplectitur auro  
Fascia, crissantem talos demittit ad imos :  
Et blandum Colacem exandit, qui tempore capto  
(De græge Torporis pars hic non infima) in aurem,  
Nil melius potuisse, nihil vehementius, esse  
Iam victam insinuat causam, fractumque Laborem.  
Et suasit. Quis enim labor est suasisse volenti?  
Quod si vera loqui fas est. Facundia cuique  
Imponit. se quisque satis putat esse disertum.  
Et sibi quisque Colax: sibi quisque ante omnia plaudit.  
At Labor, vt primum est dicendi facta potestas,  
Defigens tellure oculos sic haesit: honestus  
Imbuit ora color: tantum non tangitur ira:  
Et pudet actoris, non criminis. Inscius artis  
Actor, & irasci facilis: quando improba, amaris  
Inuidiae stimulis agitur, crimina iactat.  
Sustulit inde oculos: & primum iudicis ora,  
Vt decuit, veritus, circum de more coronam,  
Quae sedet, aspexit placide. Dein farier orsus.  
Accerser capitis Labor improbus. acer, Honore  
Iudice, Torpor agit. Torpor nos dicere causam  
Hic iubet. o superi. Labor est non vilis orbi,  
Pernicies hominum, cunctorum causa malorum.  
Auctor mortis ego. Et quisquam me dicere mortis  
Audeat

*Audeat auctorem : per quem se tota propagat  
Rerum progenies, veniensque extendit in aeuum :  
Sed nihil est, ita Torpor ait, quod sponte quietem  
Non petat, & superas imitari cogitet arces :  
Pax vbi tranquilla, & requies aeterna laborum.  
Scilicet, in terris caelum sibi fingit, & astra  
Scandet iners. Mortale genus natum esse labori  
Nescit, & ignauis, quos mollis inertia tardat,  
Nil vmquam cecisse boni. Nascuntur inermes  
Nudi homines, Torpor. nisi si tibi veller a soli  
Caelicolum neuere manus, effulgere posses  
Pulcher vt exoriens duplici velatus amictu .  
At nos turba sumus. nobis sudore paranda  
Sunt bona : viuendi merces labor omnibus: & si  
Ad summas euadere opes, inuadere honores (tes,  
Quis velit, hoc pretiū est; pulchras labor addocet ar-  
Pauperiemque fugat. Quin ad caelestia regna  
Durum, iter angustum per callem, aditusq. malignos.  
Fortibus hic opus est. Si quos tenet improba Siren  
Desidia, hinc longe discedite. fidite fortes .  
Fit via vi. Deus ipse etiam compellit incertes ,  
Inuitans mercede animos, & praemia monstrans .  
Vsque adeo nihil est, cui non vt debita merces  
Sit labor . Ast odium est hominum, si forte, tuorum,  
O Torpor, comitum : quibus vna ignobilis oti  
Cura est, & tantum placita est damnosa voluptas .  
Accipe nunc contra, quae clades, quantaque tecum  
Sit coniuncta mali moles. Tu corpora morbis  
Oppugnas, animos vitijs : te infamia turpis ,  
Te fera pauperies sequitur : tu incommoda mortis  
Ante*

Ante obitus affers homini. Quid membra veterano  
 Pressa graui a morte intersunt: quid inutile corpus  
 A nullo quid vita silens a funere tristi:  
 A tumulo quid lectus iners? quis denique dici  
 Esse potest, qui segnis agit? Sed nomen honoris  
 Usurpant frustra, qui sacris abdita chartis  
 Eruere inuigilant studijs, curaue perenni  
 Erudiunt mortale genus. Sic dixerat olim  
 Conscijs ipse sui Torpor, fallens que refelli  
 Nil metuit. te spreuit Honos: te iudice certus  
 Fallere, te voluit falsi producere testem.  
 Non impune quidem, tua si mihi cognita virtus.  
 Nam quis, Honor, melius tibi se quis vindicat, an qui  
 Mentem onerat dapibus, vino obruit, inque sopore  
 Oblitus decoris iacet, ignarusque salutis,  
 Et pecudum ritu tantum praesentia captat:  
 An qui animum aeternis contra virtutibus auget,  
 Succingitque bonis, quae non variabile tempus  
 Offendat, non liuor edax, non barbarus hostis  
 Eripiat bello, non flamma exhauriat ignis?  
 Haec inter, sed noster ait, Labor anxius vrget,  
 Insistitque operi. Nimirum somnus, & umbra,  
 Et lusus, luxusque tui, risusque, iocusque,  
 Et comitum generosa manus, dum desidet, atque  
 Nardum inter rutilasque rosas conuiuia ciuat,  
 Ad certos dum membra modos mouet ocys, & dum  
 Ad citharam gaudet voces inflectere cantu,  
 Pectora tunc implet virtutibus, oppida & vrbes  
 Eruit, & longum mansuras extruit arces:  
 Tunc homines opibus firmat, formatque iuuentam.

Haec



Haec avidis praecepta animis haurite : magister  
Omnibus hic vitae est. Verae qui laudis amore  
Et decoris studio contingeris, accipe dicta.  
Haec Torpor multo perfusus tempora Baccho,  
Mollibus instratus violis, oracula ructat.  
Scilicet, in mediam somnos producere lucem,  
Indulgere mero, non vnumquam incidere ludum,  
Accurare cutem, saeuum fugitare laborem.  
Hae iuuenis tibi vitae artes : haec imbibere toto  
Pectore verba puer. Laetae hinc exordia vitae.  
O scelus : haec audes edicere : nec tua sentis  
Consilia extremam terris afferre ruinam,  
Excidiumque orbi? Et tali contendere monstro  
Me decet? his frustra cogor consumere tempus,  
Quod rebus debetur. Et est cur dicta refellam?  
Suscipe nunc Honor hanc causam, sociumq. Laborem  
(Nam sine me non verus honos) defende, malisque  
Eripe criminibus : ne sit qui impune laceat  
Infantem : ingenuae hoc possunt, quas conspicias, Artes,  
Vel tacitae. Tacet & Torpor : sed stertit. at illum  
Euigilare iube, & merita nos affere laudi.  
Hic iterum attento figens in iudice vultus,  
Et coetum aspiciens, finem dedit ore loquendi.  
Assensere omnes animis, & vera locutum  
Clara voce probent : tua sed praesentia iudex  
Obstat Honor : tamen assensum dant murmure rauco :  
Deque Labore inter sese gratissima mustant.  
Aest Honor immotus paulum stetit : aequus vtrunque  
Pondera perpendit : simul & collata duorum  
Argumenta agit : videt hinc simulata, sed illinc  
Vera



*V*era mouent : longumque teri per talia tempus  
Non visum. *V*t secum statuit, sic incipit ore.  
*Q*uandoquidem *T*orpor falsa obtrusisse videris  
*C*rimina : vera *L*abor, dum te defendis, & hostem  
*A*rguis. *I* *F*ama insontem testare *L*aborem,  
*V*ictoremque cie, & magna comitante caterua  
*D*uc ad *V*irtutis. *L*entus spectacula *T*orpor  
*L*aeta dabit : tardi costas agitabit aselli  
*A*d templum inuectus, pompamq. ducemq. secutus.  
*D*ucite vos *A*rtes illum, stimulisque morantem  
*C*astigate : dabit iustas pro crimine poenas.  
*H*aec ait : & magno sonuerunt omnia plausu.  
*E*t iam *F*ama celer coetu gratante *L*aborem  
*C*ompellat : laetumque cauo dedit aëre canorem.  
*D*icite io comites : & io ter dicite : victor  
*V*ive *L*abor. similis comitum ferit aethera clamor,  
*A*tque *L*abor *L*abor & montes vallesque loquuntur,  
*E*t *L*abor excussi referunt ad sidera colles.  
*I*pse autem pulchro calefacta per ora rubore,  
*E*t capite insignis nudato, & vomere duro,  
*V*omere, longinquo attritus qui splenduit usu,  
*I*t pedes, & gressum accelerat. comitantur euntem  
*A*gmina laetantum iuuenum, laudesque canentum  
*V*ictoris, nam *F*ama praecit. *V*t proferat acuum,  
*A*edificet muros, secundos conferat agros,  
*I*nstituatur leges, mores informet & vrbes,  
*I*nstruat ingenium, sapientum consecret artes,  
*Q*ueis *V*irtus florere omnes dat posse per annos,  
*C*orpora conseruet. *T*u dulcis commoda vitae  
*C*uncta paris princeps : tu nobis excutis ignem

*E* silice

*E* silice, & nudis circumdas terga ferarum  
Artubus, & terras aperis, pontumque profundum:  
Hinc patet vna domus, quidquid complectitur orbis.  
Te superum mirata cohors, stupuitque ferentem  
Intentas in caelum acies, ortusque obitusque  
Stellarum seruantem oculis, radioque docentem.  
Nec te vllae rerum species, non effugit ipse  
Omnipotens genitor, non qui se spiritus omnem  
Per naturam infert, vitalique afficit aura.  
Vine Labor dilecte Deo, cui plaudit Olympus,  
Et dignam meritis caelestem destinat aulam.  
Talia gaudentes celebrant: super omnia victum  
Torporem adiungunt, dictamque ex ordine causam.  
At Torpor turpi iamdudum impostus asello,  
Vrticae caput ignauum amplectente corona,  
Praeq. manu hirsutum portans cum germine ruscum,  
Spectantum irrisu, & magno clamore sequentum,  
Vix somno excusso inuehitur: stupet inscius ipse,  
Labentesque oculos male sustinet: ipse resistit  
Attonitus quadrupès, nam turba interstrepit arcta,  
Et premit impostus dorso: sed tumiditur illinc  
Ictibus, atque illinc. quamquam foetissime sessor  
Et tibi subiectos stimulos in corpora vertunt,  
Saepe velut fullente manu, feriuntque dolentem,  
Et lassos referentem oculos. Siluestria poma  
Sint quoque qui iactent pueri: ni vocibus Artes  
Ingenuae obsistant. ergo, quod denique possunt,  
Clamoresque inter, fremitusque, & sibila plebis,  
Increpitant segnem. Quae tanta audacia Torpor  
Ista fuit, quae tanta animis dementia venit,

E

Nomen

Nomen ut egregij velles deferre Laboris,  
 Et litem, infelix, intendere? Nunc age tandem  
 Euigila, & victus victorem agnosce Laborem.  
 Ut ventum ad templum Virtutis, ludicra pompa  
 Constat: ingreditur Labor impiger: ad sacra Torpor  
 Limina subsedit, stimulis agitatus, & ora  
 Perfusus sudore gravi: fessusque laboris,  
 Postulat, ut solitae tandem det membra quieti.  
 At praeco, quod Honor praeceperat, aere canoro  
 Increpat, horrificum. Tum facta silentia linguis.  
 Ille autem e magni praescripto iudicis insit.  
 Poenarum satis est. Habuit sua praemia Torpor.  
 Ilicet. Hic omnes clarum plausere: diuque  
 Haec fuit in memori laetissima fabula vulgo.



# PRECATIO

## AD DEVM

**S**UMME Deus, qui das humiles con-  
temnere honores,  
Diuitiasque inopes, & tristia gaudia  
vitae,

Desuper ostentans caelestis praemia palmae:  
Quo simul accensi patriae melioris amore,  
Omnibus a curis curam traduximus omnem.  
Tu magnos inspira animos, tu illabere menti,  
Tu penitus caecis infer penetralibus ignem:  
Et si quod vitium, si qui non utilis humor  
Pestifero attactu fundo subsedit in imo,  
Excoque, & exudans tennes vanescat in auras,  
Neu mentem defigat humi, cursumve retardet.  
Infer quod nullo labefactum vulnere robur  
Sufficiat vires, & fortia pectora firmet,  
Quae tibi dum grato famulantur laeta labore,  
Stent nullis neque fracta malis, neque territa monstris:  
Omnis ut auxilijs spes, & fiducia nostri  
Atque opibus subnixa tuis, promissa fidemque  
Expleat: & quando coeptorum es maximus auctor,  
Sis operum adiutor. Da nunc, da vincere cursum:  
Da cursu superare leui, quam poscimus, arcem:  
Exciti ut studijs, laetique euentibus ipsis,  
Quale est victori pretium, quae munera forti,  
Quem vis nulla altis potuit deducere coeptis,  
Sunt posita, haec olim, meritosque feramus honores.

**R**EX hominum, cui nostra salus & gloria  
cordi,  
O quam grande tuum, sanctum, admirabile nomen,  
Qua se cumque ingens terrarum porrigit orbis.  
Aetherias etiam sedes, alta atria caeli  
Institit innolitans longe celerantibus alis.  
Hinc puer ipsa licet matris lactantia quaerat  
Vbera, & a labris liquidus non cesserit humor,  
Te pleno canit ore Deum, dum perfidus hostis  
Infando abstineat bello, seque increpet ultro  
Impius, & fractis discat non fidere telis.  
Ipse quidem caelum quoties sub nocte serena  
Lucentemque globum aspicio, quasque aequore in alto  
Accensis facibus choreas pulcherrima Luna  
Ducit inerranti gressu, tua dona, tuumque  
Immortale opus, obtutu defixus in vno  
Haereo, & attonito clamans vox exit ab ore.  
Nam quid homo est tandem, cuius meminisse voluptas  
Est tibi? quid proles? illam quae causa tuendi est,  
Omnis ut in parua magni stet cura parentis?  
Hunc tu certe hominem, o genitor, discrimine paruo  
Aligerum procul a numero lectaque cohorte  
Esse iubes: claroque ornas diademate frontem,  
Quae circum illustri radians scintillat honore:  
Omnibus ut rebus, tua quas cum dextra creatrix  
Omnia formauit, varios effinxit in usus,  
Imperet, & totum mittat sub legibus orbem.

Ille

Ille autem sibi sub pedibus videt omnia iussu  
 Stare tuo, cunctosque greges ouiumque bouumque,  
 Et pecudum quodcumque genus, quodcumque ferarū,  
 Et quae se volueri librat per inania penna,  
 Et quae marmoreo gens innat squamea ponto.  
 Rex hominum, cui nostra salus & gloria cordi,  
 O quam grande tuum, sanctum, admirabile nomen,  
 Qua se cumque ingens terrarum porrigit orbis.

---

## ALIVD

**F**ERTE Deo fetus ouium diuina propago,  
 Ferte Deo, & sacras maētandos sistite ad aras:  
 Ferte Deo cum laude preces: persoluite honorem:  
 Carminibus celebrate Deum. sancta atria circum  
 Ture flagrent, resonent votis, & sanguine fument.  
 Auditis? Deus insonuit: vocem aequora caeli  
 Accepere: leues turbarunt protinus vndae.  
 Pro quāta in voce est virtus? quantū instar in ipsa est?  
 Scilicet aëriam potis est excindere cedrum,  
 Cedrum quae Libani sublimi in vertice, quantum  
 Ad caelum ramis alte surgentibus exit,  
 Tantum etiam terris late diffundit odorem.  
 Sensit & hinnuleo similis, qui territus antrum  
 Deserit, ignotasque fugax aufertur in oras,  
 Exiluit Sarus, & Libanus, tonitruque remugit,  
 Quod micat, et rutilas iaculatur ab aethere flammās.  
 Ecce autem horrifono miscetur terra fragore:  
 Concussus gemuit Cades, ceu femina primum

Cui grauis indoluit maturis mensibus aluus,  
 Plenaque vicino fremuerunt viscera partu.  
 Vox eadem ceruis properato tempore fetus  
 Ante diem ex utero exemit, pondusque leuauit,  
 Cruda puerperia, at dextra medicata salubri.  
 Pandentur veteres decusso robore siluae,  
 Et Solem accipient euersae a stirpibus imis:  
 Et nomen laudesque Dei templum omne sonabit.  
 Ille triumphata nimborum nocte, coruscus  
 Arce sedet, scissis demittens nubibus imbres:  
 Et reget aeterno imperio quem condidit orbem.  
 Hic sibi quem populum cunctis e gentibus vnum  
 Eligit, aspiciet propius, vultuque benigno  
 In pugnam vires animis ardentibus addet,  
 Hostibus ut victis secura pace fruantur.





LIBER PRIMVS. 78  
A N T O N I O  
Q V A E R E N G O



*A*M quid ego Antoni, vita mihi  
carior ipsa,  
Cui penitus secreta mei sunt per-  
uia cordis,  
Audio? tam tristis dulci vox ex-  
cidit ore?  
In dubium haec igitur traxit sen-  
tentia pectus,

Hoc animo subiit, potuisti huc flectere mentem,  
Ut tibi non prudens irascerer, ut minor esset  
Factus amor, quem nulla queat violare vetustas,  
Non res vlla gradu moueat, licet omnia late  
Peruolitans flammis vltimicibus expiet ignis,  
Et simul inuoluat nigranti exusta fauilla?  
O ego non plane tibi cognitus. o vbi nostrum  
Et pellucidius vitro, stagnoque liquenti,  
Et mite ingenium, ac simplex? vbi mentis imago,  
Non modo frons ipsa & facies, quae fallere possunt,  
Integer ac purus sermo? Procul este malignae  
Vos nebulae, emissaeque nigris procul este latebris,  
Ut nubes pluuiarum, irarum semina voces,  
Vnde animo afflantur lites, & iurgia gliscunt,

Non vllus locus est vobis, vbi candida sedem  
 Fixit amicitia, & concordi foedere dudum,  
 Auratoque iugo, solidoque adamante reuinxit,  
 Et paribus studijs & moribus apta duorum  
 Pectora: quos inter medios licet improba nexus  
 Excita tartareis volitet Discordia ab antris,  
 Et plagam adducta infligat male sana securi,  
 Aut flammam iniiciat circum, ventosque furentes  
 Euocet Aeolia, vt magnas incendia vires  
 Accipiant, dirimantque vltro, quos talia iungunt  
 Vincula: nil agat, & tandem defessa quiescat.  
 Nescit amor laxari adeo: manet, editus alto  
 Vt scopulus pelago, quem circum flamina & imbres  
 Cum pulsan, vexantque feri, franguntur: at ille  
 Eminent, & caelo caput imperterritus effert.  
 Bencius irasci Quaerengo possit: amicus  
 Quippe suo modo iure vsus dicta aspera iccit  
 Liberius. Tam parua in nos concessa potestas?  
 Quid mea si manibus tandem, si corpora ferro  
 Laesisses, an iusta foret mihi causa dolendi?  
 Tam ne parum nobis tua sit spectata voluntas  
 Tempore tam longo? Meritorum, rere, tuorum  
 Vlla ne me capiant obliuia? Quid tua virtus,  
 Quid mihi nota fides, animi & caelestia dona,  
 Quae tuus iste labor cumulis maioribus auget,  
 Doctrina & pietas, & rerum plurimus vsus,  
 Et tua fama olim per cunctas didita gentes?  
 Me ne iubes tibi restituam? Quis me abstulit? At si  
 (Vt potius metuo, o vtinam timor irrita fingat)  
 Quid mihi te rapuit, tu te mihi redde, tuumque,

Quo

*Quo sine nec cupiam, nec possim viuere, amorem :  
 Sed duplicatum oro. Namque irae, forsan, amicos  
 Si tangunt, cum cara animis ad munia ventum  
 Est iterum, cœu Sol, nigras vbi dispulit umbras,  
 Clarior ostendit radiantia lumina terris,  
 Sic etiam eiectis irarum e corde tenebris  
 Interrupta prius fit gratia maior amantum.*

**A D. DVOS. CARDINALES**  
 qui paucis diebus ante Cineralia  
 sua præsentia Rhetoricae  
 gymnasium honestare  
 voluerunt.



*O S' autem, illustri maiorum san-  
 guine creti,  
 Humani generis pars optima,  
 nostra subire  
 Fecta quibus libuit : sceleri dum  
 laxat habenas,  
 Atque animas dulci deceptas  
 felle veneni,  
 Oblitas decorisque sui propriaeque salutis,  
 Detrahit in praeceps lasciuiâ : dum vaga circum  
 Compita, perque domos non inconcessa voluptas  
 Luce palam figit vestigia. vos quibus ornem  
 Laudibus, & tanto pro munere dicere grates*

*Quas*

*Quas animo trepidante parem? Sat magna voluntas  
 Et praetentat onus, sed deficit. O ubi fulmen  
 Eloquij, vortex ubi carminis? Ibimus ergo  
 Officij immemores, & sit qui facta refellat,  
 Et nostrum arguto traduxerit indice nomen?  
 Non ita. nam quamquam non possim aequare canendo  
 Dicere quod cupidam mentem obruit: attamen ingens  
 Haerebit studium, gratoque inscripta cupido  
 Pectore, quam numquam veniens oblitteret aeuum.  
 Nec mecum haec muto condetur fama sepulcro.*

**A D . I O . F R A N C I S C V M**  
 Maurocenum Cardinalem Epi-  
 scopum Brixiensem.

Prid. Kal. Maij M. D. X C. quo die in classem  
 Rhetoricae venturus esse dicebatur.



*V I V S* erat saeculi iam nonagesi-  
 mus annus,  
 Principium sexti Sixto: claud-  
 bat Aprilem  
 Proxima lux Maio, qua se pul-  
 cherrima Roma  
 Comparat ad celebrem pompam,  
 redit actus in orbem

*Ad sacra Pontifici sollemnia debita plausus:  
 Cum Venetum antiqua ducens ab origine nomen  
 Brixia*

Brixia quo pollens opibus, magnoque virorum  
Consilio & virtute potens, sub praeside gaudet :  
Integer & vitae. Romano insignis & ostro,  
Has humiles aedes, angusti haec limina tecti  
Maurocenus adit : parua illum sella recepit ,  
Nescio quem voluit quando vidisse docentem .  
Illius hoc magis extollet se gloria facti ,  
Non vlla delenda die : memorabimus ipsi,  
Dum vox ore sonet, dum spiritus hos regat artus :  
Mox memorandum alijs, alijsque feretur ab illis.  
Perque vices, vocesq. hominum, dum Roma manebit  
Romanusque pater pacatum proteget orbem ,  
Maurocenus erit, nec erit quin nomina iactet :  
Atque omnis factum admirans venerabitur aetas .

FINIS. LIBRI. PRIMI

FRANCISCI. BEN CII  
E. SOCIETATE. IESV  
CARMINVM

LIBER. SECVNDVS

Ad Gregorium XIII. Pont. Max. in  
translatione Sancti Gregorij  
Nazianzeni .

O D E . I



*VID ROMA feruet Martia?  
quid vomit  
Effusa Campus Martius agmina  
Ad Vaticani sumptuosa  
Templa, pio renouata cultu?  
Quid strata multae flos varias  
rosae?*

*Quid ture fumant Attalidis domus  
Velatae & aulaeis, & ostro  
Mane diem referente purum?  
Flammarum inundans ordine cur via  
Longo relucet? carmine cur fremit  
Seu voce laetantes acuta  
Sine graui modulante cantus?*

*Ardente*

Ardente circum sulphure cur tonat  
 Excelsa moles, quam Tiberis rigat,  
 Crebroque diffultat fragore,  
 Et rutilos iaculatur ignes?  
 Quis purpurarum conspicuus nitor?  
 Quae pompa late splendida? quid rigens  
 Includit aurum? quos triumphos  
 Ducit agens niueus sacerdos?  
 Ergo beatis mentibus additi,  
 Quo tollit altum Graecia verticem,  
 Imposita sublimi feretro  
 Gregorij veneramur ossa?  
 O sancte custos, o pater urbium,  
 Morum o magister mitis, & vnice  
 Assertor almae veritatis,  
 O domitor scelerum, atque fraudis  
 Inuicte vindex: horruit impius  
 Te Iulianus transfuga, qui tuum  
 Expauit enssem, qui peruri  
 Igne notae doluit probrosae.  
 Sensere, claro dum eloquio tonas,  
 Quid lingua posset, quid calamo manus  
 Tendente longe, perduelles,  
 Dum validos meditaris ictus.  
 At si remittas munera grandia,  
 Opusque sumas carminis & lyrae  
 Mansuetioris, si labores  
 Cecropia recrees Camoena.  
 Diuina quis te sanctius aureo  
 Plectro sonantem, flebilibus modis

Vincat



*Vincat querentem : saeva Ditis ,  
Saeva hominum mala , saeva carnis ?  
Vir magne : quando maxima pars tui  
Caelo recepta est , vrbs tenet alteram ,  
Temploque consortem Latini  
Gregorij , pater ipse fecit  
Romanus , omen nomen & inclytum  
Tuum secutus : respice ab aethere ,  
Quae dona , quos aris honores  
Roma tuis meritis reponat  
Auctore tanto : quo nihil aureus  
Maiusve Titan , aut melius videt  
Caelo coloratos ad vsque  
Seras , ab Hesperijs remotis .  
Quem nec reclinat sollicitum labor  
Poscens quietem , sed neque publicae  
Saecli fatiscantis ruinae ,  
Nec vigiles domuere curae .  
Haec mole rerum consulit omnibus .  
Germana pubes testis , & Anglica ,  
Et Graeca Romae , quo fidesque  
Et patriae reparentur artes .  
Custode magno Gregorio neque  
Morsus latentum grex timet anguim ,  
Saevos nec assultus leonum ,  
Nec quot habet fera monstra Auernus .  
Salve o potentum maxime principum ,  
Longumque regna , perge age Graeciam ,  
Omnemque terram , pastor vnus ,  
Vna fides , regat , vna Roma .*

## I N. E A D E M

## O D E. I I

**M**AGNE SEV gemmas Orientis auges,  
 Magne seu fulges iubar Occidenti,  
 Magne pascendo grege magno, & idem  
 Magne docendo.

Qui tuas ausit numerare laudes,  
 Hadriae insanos numerare fluctus,  
 Ille & immensam spatijs Libyssam  
 Ausit arenam.

Quis piam mentem referat? quis oris  
 Spiritum Graias animantis vrbes,  
 Vnde tot viuunt monumenta sacris  
 Condita chartis?

Dicat haec caelo pia gens recepta,  
 Dicat infandi rabies tyranni,  
 Cum tremens monstrum furiale diris  
 Truditur umbris.

Ille damnatur scelerum sub Orco,  
 Tu Deo partos agitas triumphos  
 Laetus, & dulci fruieris beatae  
 Munere lucis.

Haec tibi sedes animae: sepulcro  
 Roma honorato cineresque & ossa  
 Seruat, & miro decorata cultu  
 Templa frequentat.

Templa, quae magni tibi rector orbis

Et tuum nomen referens sacrauit  
 Saeculis seris veneranda, & arti  
 Nescia priscae.

Martium te iam tenuisse campum  
 Est satis. posthac iuga Vaticanani,  
 Quo nihil maius propiusve caelo,  
 Sancta tenebunt.

A D. CHRISTVM  
 pro Flandria.

ODE. III.

QVOVSQVE tandem CHRISTE pater  
 tuum

Tam dira pestis, tam fera vastitas  
 Terrebit orbem corruentis  
 FLANDRIAE in exitiale fatum?

Desunt beatis vrbibus incolae,  
 Atque officinis ingenia & manus:  
 Et classe portus, & colonis  
 Diuitibus viduantur agri.

Iam non aristas flaua gerit Ceres,  
 Extenta non grex vbera lacteus,  
 Pictosque flores non Ibera  
 Lana rubro saturata fuce.

Terra insepultis corporibus gemit

Oppressa,

Oppressa, abacta prole furentium  
 Matres equorum, nec relictæ  
 Spe Sobolis procul interemptæ.  
 Inter minaces & litui & tubæ,  
 Et militantum tot strepitus, silent  
 Artes decoræ, nec videntur,  
 Cuncta fero rapiente Marte.  
 Mars pestilenti saeuior Africo,  
 Flamma impotenti Mars violentior,  
 Bacchata longè quæ domorum  
 Celsa leues ferat in fauillas.  
 O rector orbis maxime, qui bonis  
 Mutare gaudes tristia, desine  
 Sæuiri, deiectisque parce,  
 Et pietas tua flectat iram.

## A D. F L A N D R I A M

## O D E. I

I N te quis, o, te FLANDRIA agit furor?  
 Quæ culpa poenas exigit ultimas,  
 An ne id laboras, ut fidemque  
 Immemor, imperiumque frangas?  
 Hac mole nondum pressa vides mali  
 Quam sit timendum, non violabilem  
 Spretam esse legem, non repressos  
 Ancipites populi tumultus?  
 Quæ te ira, quis te contudit impetus

Caeli minantis? quis Notus insolens  
 Deiecit, in turpemque luctum  
 Quae rabies, miseranda, verit?  
 Quisnam tuorum funera ciuium,  
 Quis rapta ab ipsis pignora matribus,  
 Et strata inundantum viarum  
 Quis calido referat cruore?  
 Compesce mentem. seditionibus  
 Insanientum nullus erit modus?  
 O nobilis virtute; fama,  
 FLANDRIA, nobilior ruinis,

---

AD. CHRISTVM. IN. DIE  
 Sanctorum Innocentium,

M A I O D E V

**V**IRGINIS magnae puer, o benigne  
 Christe, paruorum pater Innocentium,  
 Sume, quae recti studiosa reddit  
 Vota iuuentus.  
 Nil habet maius, licet illa paruum  
 Offerat munus tibi; ne recusa,  
 Quod potest, casto modo nil reseruans  
 Pectore donet.  
 Iam vale mater scelerum voluptas,  
 Mentis & feruor male sanae habendi;  
 Serua libertas vale, & imperandi

Caeca

LIBER SECVNDVS.

Caeca libido.

Duc iugo suavi Deus impeditos,

Et leui laetos onera catena,

Aureis vrge manicis, decora

Compede vinci.

Quisque sublata cruce, te sequendo,

Certat extentos celerare gressus,

Sed gigas longo spatio relinquis

Pone sequentes.

Admones cursum tamen vt capeffant,

Et vel obseruent oculis euntem,

Et per impressas pedibus notas ve-

stigias figant.

Grege tenellorum subit Innocentum

Proximus longe, niueis amictus

Quas ab aeterni saturat cruore

Vestibus agni.

Martyrum o flores nimium beati,

Queis Deum primis genitum professis

Pro fide, vix dum datur institutam

Ponere vitam.

Quis furor, quaenam truculenta Erinnye

Tantum in insontes inimicat arma,

Asperat tantum gladios cruenta

Cote nocentum?

In sinu natos laniare matrum

Nescios fari, quis iniquus ardor

Cogit, vt lactis fluij redundent

Sanguine misto?

Heu dolor, raptos manibus parentum

F 2

Caedo

Caede mactari : dare blandientem  
 Dexteram ferro : modo tot petatur  
 Millibus vnus.

Ille sed morti rapitur recenti :  
 Surge, nam dixit Gabriel, marite,  
 Surge, in Aegyptum, puerum, parentem  
 Transfer & ipsam.

## O D E. VI

**O** CVRAS volucres : o nimium breues  
 Conatus hominum: debita perfidis

O ludibria ventis :  
 O votum varium ac leue.

Quo se consilium proripuit vetus?

Quo desiderium nobile? quo mea

Mens dilapsa recessit,

Quae me reddiderat mihi?

Heu cur circumagor? quo trahor insolens?

Quis me suppositum, quis pedibus premit?

Heu quis verberare torquet,

Heu, me quis mihi surpuit?

Iam iam nolo alios. CHRISTE pater, tuus

Sum, sum CHRISTE tuus : me tibi vindica,

Me tam saepe fugacem

Iniecta domina manu.

Et ne diffugiens rursus agar retro,

Ternas mi manicas iniice : nec satis.

Ternas nocte catenas :

Ternas inferre compedes.



LIBER SECVNDVS. 85  
A D. P H I L I P P V M  
Hispaniarum Regem.

ODE. VII

**G**ENTIS humanae columen Philippe,  
Maior o magno patre, tot potentum  
Oerunt quotquot fueruntve suntve  
Maxime regum.

Si quies tanta tibi mole rerum,  
Sume Praenestis generatus vrbe  
Quos tibi dulces modulatus offert  
Cernuus hymnos.

Talis in caeli domibus beatiss  
Cantus aeternum dominantis aulae,  
Cum pio reddunt Superum parenti  
Carminibus laudes.

Sic diu laetum modereris orbem,  
Pace composita duce te: tuumque  
Nomen aeternet veniens per aeuum  
Fama superstes.

D E. E O D E M

ODE. VIII

**A**ETERNE regum rector, & arbiter  
Mortalis aeni, quem, simul annuis,  
Repente decliuus veretur  
Terra, polus, stygiusque carcer.  
Tu qui Philippo, cui melior subest  
Maiorque terrae pars habitabilis,

Mentem potestati, fidemque  
 Imperio geminam dedisti.  
 Hoc quando ab vno magna hominum salus  
 Pendet, precantum vocibus annue:  
 Da profuturæ longæ vitæ  
 Tempora, da validam senectam.  
 Viuat Philippus maximus optimus,  
 Serusque tangat limina caelitum,  
 Cum regna terrarum subacta  
 Viderit, & geniti nepotes.

---

A D. G R E G O R I V M  
 de obstetricibus Aegyptijs.

Ô D E. I X

P H A R A Ô tyrannus gentis Hebraeae patres  
 Graui fatigabat iugo:  
 Quaerensque semen stirpis omne extinguere,  
 Praecipit obstetricibus,  
 Vt si quæ proles nasceretur mascula,  
 Guttur repente frangerent.  
 Iussa horruerunt obstetrices impia,  
 Pij fauentes legibus.  
 Ac caede sese continent infantium;  
 Parcunt & innocentibus.  
 Aspexit haec communis e caelo pater,  
 Qui cuncta solus aspicit,  
 Domosque

Domosque firmas struxit obstetricibus,

Remunerator optimus.

Licet ne sancte comparare Pontifex

Caelestibus mortalia?

Licet. parata namque sunt sese dare

Mortalibus caelestia.

Tenebricosi rector orbis inuidus,

Qui fraude terras occupat:

Et Christiana siqua se tollunt sata,

Vtut potest, interficit:

Mandauit ante disciplinis exteris,

Iisdemque liberalibus:

More obstetricum, quae leuant puerperas,

Retensque partus editos:

Vt robur omne, & spem virilis sanguinis

Necent cruentis vnguibus:

Meliorque sexus totus vt semel ruat,

Imbelle non curat genus.

Hinc illa erat iactura lacrimabilis,

Actumque vulnus altius.

Cohors bonarum sed fidelis artium

Deum verentum laedere

Maribus pepercit: vt senectutem patrum

Aetate firmata iuuent.

His GREGORI, qui solus in terris vicem

Deique minus obtines,

Facis benigne: & qua nitet Sol aureus,

Amas, fontesque litteras.

Sed hac in vrbe, Christianis gentibus

Quae sancta praepandit facem,

*Fautor bonarum liberalis artium,*

*Attollis ad caelum domos.*

*Eritque tempus, turba cum clientium*

*Vt gens Iudae praepotens*

*Spolijs onusta Aegyptijs, gaza grauis*

*Cum virga reclusit freta :*

*Miretur aequor subditum sicco pedi,*

*Hostemquemersum rideat.*

## IN. DIOCLETIANVM

Imperatorem, qui se Iouium

appellari, & vt Deum

salutari voluit.

### ODE. X

Qua breuiter narratur beata mors sanctorum  
Abundij & Abundantij.

**I**NSANE vastis inferorum faucibus

*Flammis vorande vlticibus,*

*Deuota praeda Tartaro: quid te Deum*

*Frustra vocari praecipis?*

*Cur vestis auro fulget, ardet ignibus,*

*Gemmaque suras induis?*

*An caede facta, quam parasti carnifex,*

*Neglecta sordet purpura?*

*Quid*

Quid istud alti nobile, vt putas, Iouis  
 Cognomen vsurpas tibi?  
 Hominis ne sortem, & patris obscurum genus,  
 Et patriam obliuisceris?  
 Indignum an ista te coëgit dignitas  
 Iactare in altum cornua?  
 Tantamque morum fœcit insolentiam  
 Honoris insolentia?  
 An celsa, quâ superbe subnixus sedes,  
 Sedes parit fastidium?  
 Tu te beatum prædicas. nescis miser  
 Quam certa tempestas ruat.  
 Quanta flagres infamia: cunctos simul  
 Contemnis, & contemneris:  
 Puteum putem te vane, despiceris magis  
 Quanto videris altior.  
 Iniusta numquam iussa iussi fecerint  
 Abundus & Abundantius:  
 Ille vt sacerdos optimi magnus Dei,  
 Hic vt minister sedulus.  
 Et hic & ille Christianorum gregem  
 Quacumque possunt adiuuant:  
 Et ante mutas quam colant imagines  
 Dementium ludibria,  
 Adulterumque, & patris osorem Iouem,  
 Stuproque conceptum Herculem,  
 Immota cernēs flumina, & montes gradu  
 Perambulare concito.  
 Vrit, proterue, quam vides, CHRISTI Dei  
 Liberrima attestatio.

Vngues cruentus exere, exerce ferox

Est quicquid in te virium.

Minare vincla, carcerem, ferrum, famem,

Et noxialem stipitem.

Effla venenum, pestis, hauri sanguinem,

Incende Auernales faces

Nam Christiana non potest vinci fides

Inter pericla fortior.

Altumque pectus martyrum gaudens nece, &

Modesta contumacia.

Pudet ne vinci? & fessus auelli iubes

Vtrique deuotum caput?

Feliciter dixistis illustrissimi,

Christique fortes martyres.

Nempe immolandi, victimae gratae Deo,

Ab vrbe ducuntur procul:

Superasque ad auras, lumen & caeli, valent

Renocare sancta corpora:

Vitamque dirae mortis exortem dare:

Et mors dolore rumpitur.

En Martiani filius ab ipsis redit

Exuscitatus inferis,

Patri & salutem reddit aeternam: simul

Lympha salubri prolui

Se postulat cum filio: tantus Dei

Flammabat ignis pectora:

Quem nec (nesanda pro manus satellitis)

Profusus extinxit cruor.

Ergo sacerdos cum ministro plectitur,

Et Martiano, & filio.

Animae

Animae solutae corporis contagio  
 Ad astra consortes volant.  
 His Christus inter concinentes caelites  
 Dat praemium victoriae;  
 Aurum coronat capita promicantia;  
 Gemmata torques pectora:  
 Impie tyranne fallere. illorum putas  
 Cuni corpore extinctum decus.  
 Fluxisse nondum vulnere ex illo vides  
 Plus gloriae, quam sanguinis?  
 Neu morte captos cogita, vitae quibus  
 Magis beatae exordium  
 Dat dextra, quam dedisse credis exitum.  
 Nam quisquis, o superum parens,  
 Mortis petitor interit martyr tuus;  
 Non interit, sed nascitur.  
 Nec Christiano pompa ritu funebris;  
 Sed nec sepulcrum defuit:  
 Mulier virilis roboris, Romae decus,  
 Pietatis exemplum graue,  
 Theodora utrumque praestat, a Deo data  
 Huic muneri diuinitus:  
 Urbique prudens tanta seruat pignora  
 Ariniano in praedio:  
 Eritque tempus; Roma cum reddet suis;  
 Quae nunc negasti munera:  
 Longaque rerum serie, & annorum vice  
 Mille & trecentum circiter;  
 Vetusiore ab valle Tarpeii iungi  
 Ad pulchriorem transferet



*Sic Pontifex GREGORIUS (hunc orbi dabit  
Bononiensis ciuitas)*

*Aedes IESV, regio sumptu struet*

*Quas inclytus Farnesius*

*Ornans, iubebit : caelitem accedet fauor,*

*Hominumque vera gaudia.*

*At tu bibis qui sanguinem, & bullis scelus,*

*Titulosque anhelas numinum,*

*Excussus vrbe publici expers muneris,*

*Vitae perosus taedia,*

*Aestu doloris mox reluctantem expues*

*Alimenta flammae spiritum.*

## A D. M A R T Y R E S

### O D E. X I.

**I**NVICTA proles caelicolum patris,

*Qui morte vitam perpetuam breui*

*Mutastis, & terra relictâ*

*Aetherias penetraſtis oras.*

*Vestros honores inuiolabiles*

*Et clara iuſtis tollere laudibus*

*Stat facta cordi, facta nullis*

*Fortia temporibus tacenda.*

*Anguſta quamuis ora cupidini*

*Tanto repugnant, nec pietas parem*

*Sortita virtutem Camoenae*

*Magna timet tenuare paruis.*

*Vires*

*Vires volentem deficiunt . tamen  
Vincat voluntas . scilicet audeat  
Aequare mortalis piorum  
Carminē quos celebrat triumphos .  
Sed vestra nullis in tenebris latet  
Ignota virtus , viuit adhuc fides  
Mutis sepulchris , aridoque  
Fama viget cineri superstes .  
Telluris omnes omniferae sinūs  
Ingressa facti gloria personat  
Aeternum : inextinctum refuso  
Oceano iubar enitescit .  
Vos cum procellae sanguinis ingruunt ,  
Caecaeque nubes vulnerebus tonant ,  
Et fulmina exaudita caedis  
Diluuiem minitantur acrem :  
Vos cum tyrannorum ira per incitos  
Exundat enses fluminis in modum ,  
Totusque coniuratus orbis  
CHRISTE tuae incubuit cohorti :  
Sanctum obtulistis pestiferæ caput  
Laeti ruinae : mortis atrociam  
Temni dolentis tela ridet  
Pectus amans melioris æui ,  
Calensque CHRISTO . scimus vt impius  
Obiecta leto corpora libero  
Satur cruoris , strage fessus  
Vidit , & obstupuit satellites .  
Parantur ignes , & gladij , & ferae :  
Martyr secatur , manditur , vtitur :*

*Sed*

*Sed nec cremari incensa posset,  
Mortua nec pietas perire.*

*Namque illa, ventos ceu pelago silex  
Stat contumaces frangere pertinax;  
Circumque ramis pullulantes  
Spargit opes viduata quercus,*

*Tot namque poenis iuuat inemori,  
Et hoste in vno vincere tot mala,  
Saeuasque per flammās, & enses,  
Pandere iter potuisse Olympo.*

*Hic horridarum finis & arbiter  
Victoriarum Christus amor suis  
Lauro coronatis viventi  
Laetitiam sine fine praebet.*

*Huc & cruenta fortis Abundus &  
Fidus minister perueniunt via,  
Quorum senescentes beata  
Roma cupit renouare honores.*



IN. FVNERE. FRIDERICI  
Karoli Gulielmi F. Cliuiæ Ducis  
Tumulus.

## O D E . X I I

**M**ORARE. quisquis. praeteris. & . pellege  
Quae. litteris. inscriptus. hic. te. volt. lapis  
Quomque. hauseris. oculis. acerbum. nuntium  
Tum. si. tenebis. lacrimas. vere. es. lapis  
Heic. magna. lux. & . singularis. gloria  
Deliciae. amorque. nobilis. Germaniae  
Locata. sunt. vno. petita. fulmine  
Heic. Fridericus. Karolus. Dux. Cliuiæ  
In. quem. vicissim. contulerunt. munera  
Superi. hominesque. liberali. dextera  
Raptus. iuuentae. flore. primaeno. iacet  
Iacetque. secum. magna. virtutum. cohors  
Et. si. quid. vsquam. gentium. rarum. fuit  
Heic. deposuit. maestus. aeternum. pater  
Longumque. maerens. condidit. Germania  
Exsanguia. ossa. spiritus. caelum. tenet  
Id. te. ego. volebam. tu. bene. precare. atque. abei

Kaue . Karole . Salve . Karole . Karole . Vale

AD. GVLIELMVM. CAROLI  
patrem, qui obligatam linguam  
habere dicebatur.

## ODE. XIII

**T** Andem rumpe pater rumpe silentium;  
Et nato miseras exequias age,  
Deduc pectore ab alto  
Questus heu miserabiles.  
Antehac vocis erat deuus exitus,  
Nec linguam licuit soluere liberam;  
Sed suspiria crebra  
Iam voci inuenient viam.  
Si linguae potuit frangere vincula  
Nato olim pietas, atque metus patri,  
Spiramenta relaxet  
Nunc patri ob genitum dolor.  
Quamuis ille tibi non modo flebilis,  
Multis flebilior filius occidit,  
Quorum pectora tangit  
Simplex religio & fides,  
Hic iustus populos luctus habet pios,  
Hoc desiderium curaque non leuis,  
Istū quod cadit vno  
Germanum & studium & decus.

AD. IOANNEM. MORONVM  
Cardinalem.

## ODE. XIV

**M**ORONE summo proxime principi  
 Qui vnus supremo proximus est Deo,  
 Longeque princeps o Senatus,  
 Grande decus, columenque Romae.  
 Quo me timentem splendor agit tuus?  
 Quo nota virtus, quo rapit arduum?  
 Cur tollor audax ad propinqui  
 Lumina suspicienda Solis?  
 Dicam ne per te magna negotia  
 Transacta regum, compositos status  
 Tot ciuitatum dissidentum,  
 Tamque graues positos tumultus?  
 Dicam ne finem concilio sacro,  
 Quo Christianum nomen in exteras  
 Profertur oras, quo superbum  
 Astra ferit superum Tarentum?  
 Nam lustra quod non bis duo, & amplius,  
 Ingente nisu Pontificum trium  
 Fecere, paucis dat diebus  
 Linguaque & ingenium Moroni.  
 Sic legum habenas, praua licentia  
 Lasciuientum turpiter hostium, &  
 Peccare probrose docentum,  
 Imperiumque pati coacta.

Tu pacis almae tutor & arbiter,  
 Mens consulentis provida curiae,  
 Maturus annorum, & secundis  
 Temporibus dubijsque rectus.  
 Vindex auari castę cupidinis,  
 Custos piarum sedulus aedium,  
 Vtroque & orborum parente  
 Quos & opes & aui relinquunt.  
 Quis te ordinanda re bene publica  
 Priscaque norma quis sapientior?  
 Virtute quis rebusque gestis  
 Tergeminae propior tiarę?  
 Sed conscius me plura pudor vetat,  
 Paruaque tantum Musa potens rei.  
 At vos, quibus venä est benigna,  
 Magna modis celebrate magnis.

DE. ROMAE. NOVAE  
victoria.

ORD. E. XV

ET QVIBVS noster numeris canemus,

O beatorum generosa regum

Mater: o summi, NOVA ROMA, sedes

Inclita patris:

ROMA inextinctae Pietatis aedes:

ROMA sincerę Fidei magistra:

Et



Et nouum genti decus, & salutis

O NOBILE pignus.

Martyrum o felix patria: o beate

Martyrum semper cinis, & sepulcrum:

Martyrum palmis, meritisque diues

Ara triumphis.

Nomen o sanctum NOVA ROMA: princeps

Vrbium, & Mundi caput: o colenda

Omnium votis, hilarique semper

Voce canenda.

O NOVA, o victrix veteris. Triumphe.

Vincis, en vincis NOVA. Io triumphe.

In NOVAE laudes noua Christiani

Flectite verba.

Disce iam vinci VETVS, & recenti

Cede. Tu victrix, refer vnde vincis

Gratias CHRISTO: fuit ille tanti

Auctor honoris.

Ille te saxo stabilem locauit,

Et coli immotam dedit: ille terris

Esse te lumen voluit, suoque

Limen Olympo.

Ille ad hanc grata vice te regendam

Legit, o custos hominum, paterque

GREGORI, & longum viridis senectae

Prorogat aeuum.

Nos diu vt praesis bone rector vrbi:

Nos diu vt praesis bone pastor orbi:

Menteque & laetos referente cantus

Voce precamur.

EX. ARISTOTELIS. HYMNO  
De Virtute.

O D E. X V I

**V**IRTUS quietis nescia languidae,  
Decora virgo, semper amabilis,  
O dulce solamen laborum,  
Atque operum generosa merces.  
**T**e propter vnam pulchra petentibus  
Dura expetuntur, dum fera pectore  
Indefatigato frequenter  
Proelia sustinuisse gaudent.  
**T**e namque felix gloria tempore  
Delenda nullo consequitur magis  
Auro refulgens, cui parentum  
Cedat amor, facilisque somnus.

---

COLLEGIUM. ROMANVM  
Anagrammatismus

ANGELO. MIRVM. LOCVM

O D E. X V I I

Ad Sodales.

**A**MICE site cura Romani coquit,  
In quo manes, Collegij:

Tecumque

*Tecumque quaeris illius quid nominis*

*Traiecta reddat littera :*

*Vide quid expiscatus ipse vno impetu*

*Brenique puncto temporis .*

*Probas ? habebo gratiam , & amorem tuum*

*Agnosse dicam libere .*

*Si rectius quid inuenis ( & plurima*

*Hoc rectiora inueneris )*

*Per vincla te communia, imperti, rogo*

*Tuo fruamur munere .*

*Hoc dum paras ROMANVM habe COLLEGIVM*

*Vel ANGELO MIRVM LOCVM.*

## IGNATIVS. DE. LOIOLA

### Anagrammatismus

#### O. IGNIS. ILLATVS. A. DEO

#### O D E. X V I I I

**C**VM DEVS e nihilo mundū disclusit, & orbē  
Terrae polumque condidit ,

*Inseruitque homines terris , & sidera caelo :*

*Vt parte ab omni nobile*

*Daedala quod magni tornarat dextra parentis*

*Opusque perfectum foret :*

*Humanis animis caelestia semina flammae*

*Citosque motus indidit :*

Ne sacra degeneri torperent corda vetero  
 Adstricta, vel pigro gelu:  
 Sed magis ad Superos facili se tramite ferret,  
 Toroque mentis impetu.  
 Vidit & invidit caelo taeterrimus hostis  
 Exactus in caecos specus:  
 Et grauis aggestu terrae consopijt ignem,  
 Ac mole clausit saxea.  
 Hinc anima haerebat terris lutulenta velut sus  
 Et serua & hospes corporis:  
 Atque oppressa graui sub pondere mersa iacebat  
 Tenebricofo in carcere.  
 Non tulit hanc speciem rerum mitissimus auctor  
 Operisque seruator sui.  
 Et simul in terras aeternos rettulit ignes  
 Delapsus alto ab aethere:  
 Ut flammam imbiberent mentes, castasque medullas  
 Diuinus intraret calor.  
 Hinc onere excusso & tenebris mortalis origo  
 Recreata sustulit caput:  
 Coepit & aetherias arces sperare, suamque  
 Hereditatem cernere.  
 Sed tamen in peius potuerunt lapsa referri  
 Iniquiora tempora:  
 Atque iterum desaenit hiems, crassumque rigorem  
 Penetrare frigus intulit.  
 Has etiam, ut voluit rebus succurrere fessis,  
 Miseratus aerumnas Deus:  
 Ne misera horrendam patiantur saecula noctem,  
 Et foedus obcaecet nigror:

Insignem

Insignem virtute virum & praestantibus ausis

E bellicosa Iberia

Extulit. hic dudum sopitos suscitât ignes,

Et nomen euentu probat.

Namque putem instinctu Superum monituq. parâtes

Nomen dedit: IGNATIO:

Vt prius aestifera conceptum mente vaporem

Lumenque terris diuidat.

Magnaue de tenui veniant incendia flamma,

Ac multa inardescant face,

Eq. mari Hesperio rubicundi Solis ad ortum

Lucemque & ignem differant.

O magnum decus hoc aeni. Tu IGNATIVS ille es

ILLATIVS. IGNIS. A. DEO

AD. PETRVM. MAGNVM  
auctorem libri de consilio.

O D E. X I X

**V**ICTVS es tandem precibus potentum,  
Abdita vt longum veniant in auras,

Magne, quae scribis nimium vetustae

Aemula laudis.

Arte seu mira dociles monendo

Instruis mentes, acuisve linguas,

Seu pedem, gressus vbi fixit altos

Pindarus, infers.

O nouum saeculi decus : o Latina

Gloria aeternis celebranda chartis ,

Quas ferant olim voluisse doctae

Mittere Athenae .


Perge iam tanto studio tentas

Res dare in vulgus . similis carenti

Est opum parcus . bona liberalis

Perficit vsus .



D E. O B E L I S C O  
Vaticano.

## AD. VRBEM. ROMAM



## O D E. X X

**V**RB*S* ALMA, terras cui Deus e domo  
Late regendas sidera dedit,

Saxoque fundatum vetusto

Imperium sine fine cessit.

**O** et superbis semper honoribus

Aucta et triumphis, magna petentium

Quos duxit ardor, barbarorum

Altior ut fieres ruinis.

**I**am mitte gentis nomen inutile

Iactare priscae, nec solidum decus:

Funesta vix partam per arma

Mitte leuem celebrare laudem.

**N**ouos honores accumulat tibi,

Nouos triumphos asserit optimus

Sixtus



Sixtus MARIAE cura matris

Virginis, atque Dei sacerdos

In orbe summus. Nonne vides prior

Vt cedat illi gloria Caesarum?

Seu ducit alto flumen arcu,

Sive vijs spatia ampla laxat:

Neglecta seu quae delituit diu

Molem extrahit molimine plurimo

In lucem apertam, haerente passim

Atque oculis inbiante vulgo.

Quin & virorum mentis acumine,

Et quisquis alta praenituit fide,

Dum magna fiunt iussa, quantum

Relligio pietasque possunt.

Iubentis, inquit, pectore ab intimo:

Aeterna nostri gloria saeculi

O Sixte, qui Christi trophaeo

Subijcis Aeneadum triumphos:

Et Christianos qui deceat status,

Praescribis, orbem legibus instruis,

Donisque recte facta tollens,

Crimina supplicijs coërces.

Tu Roma, facti quo maneat fides,

Nomenque nullo non memorabile

Auctoris aeuo, incisa Quinti

Adde notis monumenta Sixti.

DE. SANCTO. IACOBO  
Apostolo Hispaniarum patrono.

## HYMNVS. I

**D**EFENSOR alme Hispaniae  
Iacobe, vindex hostium,  
Tonitruum quem filium  
Dei vocavit filius.

Huc caeli ab altis aedibus  
Conuertere dexter lumina,  
Audique laeti debitas  
Grates tibi quas soluimus.

Tu, caeca nox, atque impia  
Nos cum teneret vanitas,  
Lucem salutis primitus  
Oris Iberis impetras.

Freti tuo nos pignore,  
Largum tuo te munere  
Rogamus omnes, ut tuae  
Spe protegas praesentiae.

## DE. EODEM

## HYMNVS. II

**I**ESV salus mortalium  
Nobis ades dum dicimus  
Laudes patrono Hispaniae

Tuam

Tuam canentes gloriam.

Laudandus hic est vnice,

Quod primus in certamine

Apostolis ex omnibus

Pro te profundit sanguinem.

Tui beatus pluribus

Notis amoris maximi,

Quod testis vsque interfuit

Reconditis mysterijs.

Seu vi potentis dexteræ

Surgit lairi filia,

Quando in paternis aedibus

Est excitata ab inferis.

Seu vultus vt Sol splendidus,

Et vestis vt nix candida

Thaboris alto in vertice


Signum tuæ dant gloriæ.

Seu monte oliui confuso

Angoris est index tui

Sudor tuo de corpore

Ceu gutta manans sanguinis.



## IN. TRANSLATIONE. SS.

Abundij &amp; Abundantij, e templo

SS. Cosmae &amp; Damiani, in

aedem nouam Societa-

tis Iesu.

## HYMNVS. III

**P**AR PURPURATVM *martyrum,**Consors beati nominis,**Compos peremnis gaudij,**Exors piandi criminis.**Terrestre sidus aureum**Caeli nitore pulchrius,**Vrbs vnde lumen omnibus**Romana terris dissipat.**Satis vetustum fornicem**Vestris sacrastris osibus,**Templumque raro conscium**Multis teri vestigijs.**Ad vrbs hanc frequentiam**Nouique templi verticem,**Patris vocatu maximi,**Iam, si placet, concedite.**Hic plebi adeste supplici,**Et vota donis vincite,**Precum fruatur commodis**Fusas prius quam sentiat.**Gentem,*

Gentem, patroni, Romulam  
 Apud Deum defendite,  
 Vestro rogantum munere  
 Omni bono circumfluat.

---

IN. TRANSLATIONE. RE-  
 liquiarum S. Sympherusae  
 Tiburtinae.

HYMNVS. IV

**V**RBS clara prisco sanguine,  
 Ipsaque Roma antiquior,  
 Et pace & armis inclyta  
 Ocellus orbis Itali.

Extolle pulchrum verticem,  
 Profunde lymphas largiter,  
 Laetosque pompa nobili  
 Effunde coetus ciuium.

Tuamque cinem maximam,  
 Sponsam Getuli martyris  
 Septem beatam filijs  
 Nunc Sympherusam suscipe.

Haec post pericla plurima,  
 Longumque & atrum carcerem,  
 Ad Christianae ducitur  
 Professionem gloriae.

Moles repente saxea  
 Sacro alligatur vertici:

Christum

*Christum ipsa tollens laudibus  
Amne in profundo mergitur .*

*Statim relicto corpore*

*Ad astra fertur spiritus ,  
Hic palmae adeptus praemia  
Laetis triumphat gaudijs .*

*Vrbs Roma sola est haecenus*

*Gauiosa sanctis ossibus ,  
Orata sed nunc Tiburi  
Partem remisit patriae .*

*Te Sympherusa , & coniugis*

*Felix honore & liberum ,  
Nunc obsecramus , vt tuae  
Semper memor sis patriae .*

## IN. E A D E M

## HYMNVS. V

**R**ECTOR *supreme caelitum ,  
Et dux sacrorum martyrum ,  
Huc ad preces Tiburtium  
Aurem benignus admone .*

*Sit fas tuorum munerum*

*Partem referre paruulam ,  
Vt mente laeta ac supplici  
Grates agamus debitas .*

*A te datore scilicet*

*Vrbis situm pulcherrimum ,  
Caelum salubre agnoscimus ,*

*Solumque*

Solumque frugum fertile .  
Magna haec : sed illa maxima ,  
Ad quae relictis ceteris ,  
Iustis repleti gaudijs ,  
Luce hac canenda pergimus .  
Lux ecce fulsit annua ,  
Qua Sympherusa filijs  
Septem decora vt Solibus  
Auxit choros caelestium .  
Hoc nempe praestat omnibus ,  
Nostris fuisse e ciuibus ,  
Quibus tuo pro nomine  
Vitam dedisti vt funderent .  
Accedit his sollemnijs ,  
Complura quod post saecula  
Delata matris segmina  
Romana ab vrbe visimus .  
Tu nunc tuorum martyrum  
Nostrum rogatu ciuium ,  
Fac esse nos , vt poscimus ,  
Partem tuorum ciuium .





IN. TRANSLATIONE. COR-  
porum sanctorum Zamae & Fau-  
stiniani Bononiae Episco-  
porum.

## HYMNVS. VI.

**O** *QVAE* docendis artibus  
Et disciplinis optimis

Magistra es orbis Itali  
Bononiensis ciuitas,

Mater virorum fortium,

Mater sacrorum praesulum,

Qui Christianam gloriam

Terras per omnes diuidunt.

Vrbs, orbis vnde Pontifex

Ter ortus: vnde vertice

Gemmisque & auro duplicem

Caesar coronam sustulit.

Extolle circum turribus

Vetricibus cinctum caput,

Trans eruditae porticus

Pulchros lacertos porrige

Patrum tuorum corpora,

Quae pompa duci nobilis,

Zamae beati, & supparis

Faustiniani amplectere.

Hi sunt, tibi qui primitus

- Christi extulerunt lumina,

Hi sanctioris dulcia

Vitae attulerunt commoda.

Et hic, & ille, pectora

Soluit malis erroribus:

Et hic, & ille candida

Pietate mentes imbuunt.

His tende palmas supplices,

Hos inuoca in preces tuas,

Horum verere pignora,

Et tolle ad astra nomina.

At vos benigni praesides

Augete vestra munera:

Vobis patronis omnia

Bona affluent Bononiae.

Zama o salutem mentium,

Et sanitatem corporum:

Pacem tuere, & diuitem

Faustinianae copiam.

# IN. TRANSLATIONE. RE-

liquiarum sanctorum Simpliciani,

Benigni, Geruntij, Sisinij,

Alexandri, Martyrij.

## HYMNVS. VII

SANCTI piorum spiritus  
Non parua pars caelestium,

Quorum

Quorum beatis ossibus

Triumphat alma Insubria.

Luc caeli ab axe lumina

Ad membra vestra flectite.

Quae casta supplicatio

Angusta in aede collocat.

Seu vos fidei pectore

Gregi assidentes credito,

Opima fertis pascua,

Furem lupumque auertitis.

Seu caritate feruidi,

Fideque pura, ad aureas

Sedes Olympi semitam

Sparso cruore sternitis.

O qui parem Geruntio,

(Quando sacrum mens integra

Simplexque nomen praetulit)

Es consecutus gloriam.

Tu cui datur diuinitus

Humanitate & moribus

Nomen rei praenuntians

Benci Benigne vincere.

O Martyri, qui martyrum

Es additus consortio,

Sisinni, Alexander simul,

Qui aeterna fertis praemia.

Hic iuncta quando corpora

Iunctis nitent honoribus,

Bene ut sit omni Insubriae

Precemque opemque iungite.

## DE. SANCTO. DIDACO

## HYMNVS. VIII

**R**EGNATOR alme siderum,  
 Pater piorum pauperum,  
 Caelestium quos munerum  
 Tecum potentes efficis.  
 Te, dum beati Didaci  
 Laetos honores annuo  
 Ritu nouamus supplices,  
 Nobis adesse quaesumus  
 Secutus hic vestigia  
 Impressa FRANCISCI pede,  
 Vitaeque amorem simplicis,  
 Caeli potitur gaudijs  
 Haec inter ille iugiter  
 Nostros labores respicit,  
 Tuaque te pro ecclesia  
 Preces profundens inuocat.  
 At tu pias qui pauperum  
 Preces rogantum suscipis  
 Iam te benignum Didaco  
 Mitemque nobis exhibe.



## D. E. E. O. D. E. M.

## HYMNVS. IX

**O** SACRVM caeli decus, o beate  
 Didace, Hispanae noue fulgor orae,  
 Sol ab occasu veniens, vt orbem  
 Lumine lustrēs.  
**O** viros inter numerate, virtus  
 Quos tulit caelo pia, qui secuti  
 Signa FRANCISCI voluerō sanctam  
 Ducere vitam.  
 Caelitum mores imitate semper,  
 Semper irrisor sapiens bonorum,  
 Exequi semper celeri parate  
 Pectore iussa.  
 Te licet, quo te magis in latebras  
 Abdis, humanam fugitasque laudem,  
 Hoc magis tollit Deus, & supremis  
 Inserit astris.  
 Ilicet durae tua membra morti  
 Sunt data, & paruo recubant sub antro,  
 Sed tamen nullum patiuntur atri  
 Funeris ictum.  
 Ergo & integrum sine labe corpus,  
 Vixit vt quondam scelere expeditum,  
 Cen leuem somnum capit, & sepulcrum  
 Turba frequentat.  
 Hinc opem poscit miser, hinc leuamen

Cura quem vexat grauis, hinc salutem,  
Nulla quem sanat medicina, in ipso  
Limine leti.

Vos ego hic testes generosi Iberi  
Inuoco, & late dominans Philippe  
Non minor magno patre, ter potentum  
Maxime regum.

Audit hoc Quinti pia cura Sixti  
Cui replet mentem Deus, & locatum  
Didacum in coetu Superum probante.  
Praedicat orbe.

Supplices nunc te (quia fas) precamur  
Didace, oranti populo benignam  
Dexteram praebe facilis, precesque  
Accipe nostras.

Finis Libri secundi.




119  
FRANCISCI. BENCI

E. SOCIETATE. IESV.

CARMINVM

LIBER. TERTIVS



DE. GREGORIO. TERTIODECIMO

Pont. Maximo Romani Collegij fundatore.

ELEGIA. I.



GREGORIO grates agimus: se-  
cedite curae:  
Gratia cum festo carmine laeta  
veni.

Tota nitens simplexque veni: de-  
cet esse nitentem,  
Terrarum domino siqua placere  
cupit.

Talem te Petro memorant hac vrbe recepto,

Aeterno laudes conciniussē Deo:

Artibus vt Simon magicis delusus ab alto

Decidit, & sparsa sanguine tinxit humum:

Victoremque Petrum casu testatus acerbo,

Quas meruit poenas impia lingua dedit.

H 4

Hactenus




Haecenus angusto tenuit se limite coetus,  
 Qui stetit in parua plurimus ante demo.  
 At nunc prolatis fundatur finibus aedis  
 Amplior, & tecti suspiciendus honor.  
 Aspice congestos lapides, & diruta tecta,  
 Et sola vicino continuata foro.  
 Aspice. iam nostris patet area sedibus illa,  
 Gymnasium fuerit, qua fuit ante via.  
 Atque ubi incundis gaudebunt otia Musis,  
 Pectore anhelanti duxerat aera faber.  
 Hic ubi sub saeuo gemuerunt marmora ferro,  
 Assuescet facilis discere recta puer.  
 Hic ubi formandum ingenium sub voce magistra est,  
 Artifices lignum perpoliere manus.  
 Extruit hic Sophiae & Pietati templa sacerdos,  
 Optimus ille hominum, proximus ille Deo.  
 Proferat ut CHRISTI imperium, terrasq. per omnes  
 Iam leue ne quisquam ferre recuset onus.  
 Hic iuuenum sanctas exercebuntur in artes  
 Denota aeternae pectora militiae.  
 Unde salutaris fidei praecepta ferentes  
 Audiet aduerso cardine vterque polus:  
 Quo matutinus dimittit Lucifer ignes,  
 Quo vespertinus conuocat orbe faces.  
 Nulla fides umquam terris nascetur in illis;  
 Si fidei non sint semina iacta prius.  
 Verba fidem pariunt, animorum haec abdita pandunt.  
 Nec nisi quis doceat, discat ut alter eris.  
 Sponte sua doceat nemo. Mittamur oportet,  
 Qui feriant forti pectora iussa sono:

Captivos rapiant homines, desuetaque corda,  
 Atque iterum errantes sub iuga sacra vocent:  
 Accendantque animos dulci virtutis amore,  
 Ad superos tutam quae parat vna viam.  
 Sed spes destituet, pleno licet extet aceruo  
 Lacta seges, crebro ni renouetur ager.  
 Hic tibi GREGORIUS fecundos conserit agros  
 Omnis ut ex illis fertilis annus eat.  
 Hinc capiet plenis indeficientia sulcis  
 Semina, quae large credita reddet humus.  
 O vtinam longae fungatur munere lucis,  
 Exigat & placidos tempus in omne dies:  
 Laetatusque suis opibus, sanctisque repertis  
 Prospiciat gentes ad sua iura trahi.  
 Quod volumus, Deus ipse dabit. quod possumus, ecce  
 Conamur tenues. & voluisse sat est.  
 Aedibus in medijs solido spectabitur aere  
 Tanti maiestas conspicienda viri.  
 Hic incisa notis hoc reddet littera carmen:  
 GREGORIUS custos, GREGORIUSQ. pater.  
 Ipse suum pastor circumspectabit ouile,  
 Et quae plena ferent vbera lactis oves.



*Carpit & in media nocte viator iter.  
Non iuga Viminiei reticentur deuia collis,  
In varias quae nunc sunt patefacta vias.  
Hinc sacras aedes veneratur turba Quiritum,  
Nec dubiam a superis sedula poscit opem.  
Quin etiam tanto reddit pro munere grates,  
Terrarum quod sit credita cura tibi.  
Et meminisse iuuat, quae circum obsederat oram,  
Depulsam per te protinus esse famem:  
Thesauris per te munitam ingentibus arcem,  
Quos posthac vlli sit tetigisse nefas.  
Illa quidem tam multa canunt: sed plura parantur,  
Pro quibus oratur longa senecta tibi:  
Seu Pontina palus Volscis siccatur in agro,  
Fornice seu longo ducitur amnis aquae:  
Seu potius Turcarum acies, motusque rebelles  
Frangere, & in capto vis dare iura solo.  
Hinc mare nauigijs vndabit, milite campus,  
Et procul auspicijs castra mouenda tuis.  
Rapta dein templo figentur signa vetusto,  
Cui nouus accessit nunc obeliscus honos:  
Aduectus quondam Pharijs obeliscus ab oris,  
Cum mare contextis sensit onus ratibus.  
Quoq. prius firmata loco, stetit ardua moles  
Neglectae in speciem, delituitque diu:  
Hic vbi falsa olim fundebant carmina vates,  
Et media circus valle Neronis erat:  
Hic caelum aspexit, populo cum triste tyrannus  
Exitium insonti suppliciumque parat.  
Quis scit, an & casto fuerit madefacta cruore,*  
*Cum*

Cum pia gens ducta est ad genus omne necis?  
Forsitan & Petri vidit languentia membra  
Ad terram obuerso vertice fixa cruci.  
At modo, quam melius celsam videt area Petri,  
Cum pateat iussis conspicienda tuis?  
Quam melius sublimis apex venerabile signum  
Extulit, vt flectat plebs venerata genu?  
Quam melius conuersus honos, ratioque locorum,  
In medio positam quam decet esse foro?  
Scilicet, huc toto quisquis properabit ab orbe,  
Vt pedibus possit succubuisse tuis:  
Atque auctam vidisse vijs, & fontibus urbem,  
Ornatamque magis quam coluistis aui:  
Omnia collaudans, verba inter singula, Sixtum  
Non intermittere concelebrare patrem.  
Viue diu, repetet, princeps gratissime caelo:  
Ipse Deus coeptis consilijsque fauet.  
At tibi cum superam Christus Deus annuet arcem,  
Et benefactorum praemia digna feres:  
Tunc, veluti caput excelsas obeliscus in auras  
Tollit, & aeternum suspiciendus erit,  
Sic tua, sancte Pater, virtutum nomina tollet  
Gloria, non vlllo deperitura die.



DE SACELLO EXQVILINO  
quod Hieronymus Badesius versu  
heroico scripsit.

## ELEGIA. III

**N**OBILE Pontificis Sixti pia cura sacellum,  
Quo veteres regum vincere tendit opes.  
O praesepe, Dei cunabula, conscia partus  
Virginiei, & Superum concelebrata choris.  
Vos ne ab Idumaea Romanae detulit urbi,  
Longam vos Pietas fecit inire viam?  
Et tandem exquilijs posuit, qua tollitur aedes  
Virginis, & colitur matris in aede Deus.  
Fortunata aedes, cuius formamque modumque,  
Et spatia, & pulchris atria porticibus  
Non hominum potuit sollertia dicere, sed vos  
Quas Deus aestivo misit ab orbe nives.  
Scilicet hanc sedem virgo sibi mater in vrbe  
Legerat, hic primam iusserat esse domum.  
Nec mora, cum Romae violentior incubat aestus,  
Et canis arentes findit hiulcus agros:  
Nocte super media liquido nix plurima caelo  
Labitur, & certo limite signat humum:  
Designatque sacrum paries quem finiat orbem,  
Et queat impositum sustinuisse tholum.  
Conditur hic templum Phrygijs sublime columnis,  
Atque

Atque ebore atque auro tecta superba nitent.  
 Hic praebet pia mater opem, praesensque rogantum  
 Respicit, & castos excipit aure sonos.  
 Confluit huc tota populus simul excitus vrbe,  
 Confluit huc tota fusus ab orbe procul:  
 Confluit huc celebrans diuortia lata viarum:  
 Pontificis iussu nam patuere viae,  
 Nec minus exciso extollit quae flumina monte,  
 Tramite per montem prosiluisse cauo.  
 Quaq. lapis fuerat, trepidantes aspicit vndas,  
 Oraque Felici mergere gestit aqua.  
 Tenditur ad Mariae, cuius prope limina templi  
 Vertice sideream fers obelisce crucem.  
 Hanc simul aspexit, procul adstitit, & noua sumens  
 Gaudia sollicitas concipit ore preces.  
 Quin & iam facilem genibus perrepere collem  
 Laetatur studio femina virque pari:  
 Et cupide ingressi visu mirabile templum,  
 Attoniti subito diriguere metu.  
 Religio facit ipsa metum. Dein pronus ad aram  
 Quilibet aeternum procidit ante Deum.  
 Post paulo, quo quisque abiit, quo lumina vertit,  
 Perfruitur visu mens, capiturque locis.  
 Hic matris capit effigies, quae dicitur olim  
 Pontifici abscissam restituisse manum.  
 Hic, quia marmorea gemini requiescitis arca  
 Consortes, quorum constitit aere domus.  
 Hic, quia sanctorum cineres caelestia dona  
 Ossaque custodit reliquiasque virum.  
 Hic, quia Pontificem candenti marmore reddit,

Gloria

Gloria Picentum qui fuit ante soli :  
Donum Sixte tuum media testudine templi :  
O patriae, o gentis nunc decus omne tuae .  
Nec tamen hic finis . Rapit hinc genitricis imago ,  
Cui Deus in gremio dulce resedit onus .  
Illius exemplum caelo venisse supremo  
Creditur, hoc Lucae docti imitata manus .  
Saepe illinc meminit votis exposcere pacem  
Roma timens, magni dum tumet ira Dei :  
Saepe eadem offensi superatam numinis iram ,  
Nec fusa in cassum vota fuisse refert .  
Seu foret annus inops, seu bellum, seu fera pestis  
Sterneret innumeros Morte furente greges .  
Salve o sancta parens, hominum fidissima custos ,  
Vna salus miseris, praesidiumque malis .  
Cetera praeteream . Tua sed cunabula Christe ,  
Sit modo fas, humili voce animoque colam .  
Huc feror, huc gradibus declinibus ? Hic ego supplex  
Multa feram multis oscula cum lacrimis .  
Hoc ne igitur teneris primum vagitibus antrum  
Ingemuit, dederat quos Deus ore puer ?  
Hic Deus in medio glacialis frigore brumae ,  
Hic nasci voluit nocte silente Deus ?  
Vilibus hic molles pannis circumdatus artus  
Pertulit hoc duro decubuisse toro ?  
Vos ne etiam dominum, vos muta animantia vestrum  
Noscitis, ignoto dum iacet in stabulo ?  
En, video, huc properant stimulis communibus acti  
Pastoresque ovium, caelicolumque chori .  
Hi nitidas festis implent concentibus auras,

Hi



Hi trepidi ad puerum munera parua ferunt:  
 Rustica dona ferunt, agnam, fetumq. capellae,  
 Quiq. breui obrigit lacteus orbe liquor.  
 Aspicit hos virgo, sed custos virginis illa  
 Accipit, ad teneros hi subiere pedes.  
 Fallor? an ex ALTO micuerunt lumina MONTE.  
 Et tremulum pandit STELLA corusca iubar?  
 Nec procul apparent quos fulgens purpura reges  
 Indicat, & comitum magna secuta manus:  
 Et iam thesauros ultro sua dona recludunt,  
 Quas & opes gremio diuite fundit Arabs.  
 Hinc magnum in paruo venerati corpore numen,  
 Qua ventum est, aliam corripuere viam.  
 O ego quam vellem totas hic ducere noctes,  
 Quam vellem hic totos delituisse dies.  
 Non me somnus iners, non me dapis improba cura,  
 Taedia non hinc me longa mouere queant.  
 Iam quid agam? Subiere alij, concedere par est,  
 Et qui me, plures hic Deus vrget amor.  
 Nam velut in fluuio celer vnda superuenit vndae,  
 Altera subsequitur, praeterijtq. prior:  
 Haud aliter veniunt coctus, abeuntq. vicissim,  
 Occupat hic auide, deserit ille locum.  
 Huc pia turba venit, templum miratur, & una  
 In Sixti laudes ambitiosa ruit.  
 Visitur hic facies cultu spectabilis aedis,  
 Aureus hic fornix, marmoreumq. solum:  
 Regis cum memoratur opus, quaeq. arte magistra  
 Picta suis viuunt corpora imaginibus.  
 Maxima pars vna iunctos ueneratur honores

Sixte o Quinte tuos, o Pie Quinte tuos.  
 Namque Pio monumenta videt pulcherrima Quinto,  
 Quae tuus exciuit Sixte peremnis amor.  
 Adde, quod & cultis haec addita cura poëtis,  
 Vt meritas laudes & tua facta canant.  
 Sed licet ingenijs certent ac diuite vena,  
 Materiae quamuis nobile eessit opus.  
 Cerneris hos inter vates operose sacelli  
 Et canis heroo carmina fulta pede.  
 Certe erat illud opus celebrandum carmine: sed tu  
 Qui tali efferres carmine dignus eras.

AD. CAMILLVM. PALAEOTVM  
 De Arientina eius villa.

ELEGIA. IIII

**O** ARIENTINAE sedes placidissima  
 villae  
 Curarum domino portus amice tuo:  
 Seu requiem quaerat, seu caris otia Musis  
 A strepitu longe seposuisse velis.  
 Sapina quam propter tacitis lenissima lymphis  
 Profluit, ut riguo gaudeat amne solum.  
 Hic ubi odorata laurus sese explicat umbra,  
 Et virides mollis ventilat aura comas  
 Ver ubi perpetuum gemmantia prata colore  
 Pingit, & arguto gutture cantat avis:  
 Cantat avis circum omne nemus, silvaeque loquuntur,  
 Et facilis vario flore renidet humus.

Hinc eadem in collem protento vertice surgit,  
Porrigit hinc lato pectore planiciem.  
Hinc tendit spatiosa manus, & plurima caeli  
Accipiens grata munera seruat cpe.  
Hic smilax calyces, edera illic laeta corymbos  
Extulit, hic cilices promituere croci.  
Et frutices ludunt variae sub imagine formae,  
Incertasque ineunt herbida texta vias.  
Hic baccas oleae propius gessere feraces,  
Rideat ut seris fructibus annus iners.  
Nec procul aspicias siluestrem pampinus vuam  
Qui tegit, erranti cum petit alta gradu.  
Illa vident longe Cyparissi brachia tollit  
In metae faciem conspiciendus apex.  
Et piceae pinusque vigent, affixaque ramis  
Pondera non umbra luxuriante ferunt.  
Nec desit folijs, & pomis utilis arbor,  
Quam posito eduxit germine docta manus.  
Siue ea quam proprijs nutriti Felsina in oris,  
Felsina doctorum magna magistra virum.  
Extera siue nouo tellus quam misit ab orbe,  
Dum dominae Italiae cognitus auget opes.  
Sic Argentinae natura indulgit, ut apto  
Semina suscipiat restituenda sinu.  
Haud facile inuenias tam laeti ruris honores,  
Qui segetem tanto senore reddat ager.  
Vnde audis non solum oculis spectacula praebet,  
Scena sit ut nulli pulchrior vlla loco.  
Dona etiam mensis fert exoptata secundis,  
Quas potis & dulci concelebrare mero.

Dum

Dum varijs conuiuiae expleant sermonibus aures,  
Quas tibi dicenti saepe dedisse iuuat.

Docte CAMILLE, acui merito pulcherrima nostri  
Gloria, quam semper postera saecula canent.

Tu sapientum artes, doctrinarumque reperta

Dulciter insigni cum Cicerone refers.

Tu mores multorum hominum, tu digeris vrbes,

Quid tulerit praesens, quidve vetusta dies.

Germanum sic saepe tuum, dum consulit orbi,

Concilio in magno purpura sacra probat.

Verba fluunt illi pleno de pectore, quales

Rupibus ex altis Sale liquante nives,

Scilicet & patres pendent GABRIELIS ab ore,

Et missum aethera sede fuisse putant.

Ille docet, Gallum quae sit pia certa rebellem

Vincere, ne quatias sceptrum superba manu;

Quae ratio vnamines proceres, & sancta iuuandi

Foedera, quae cordi non violata fides.

Quid tibi, iam felix, & diues Gallia quondam,

Nunc misera, atque hosti vel miseranda tuo;

Quid tibi subsidium, quid possit ferre salutem?

Te quia tot circum proelia acerbata sonant.

Quo pietas, quo vera fides, heu Gallia, cessit.

Heu, quo pro meritis cognita Roma tuis.

An ne erit, ut prisca reuocet concordia ritus,

Et sacra, quae pridem castus alebat amor?

Sic o, sic superi videris miserescente regni,

Quod diuersa ferus traxit in arma furor.

131 CARMINVM  
IN. FVNERE. M. ANTONII  
Mureti iunioris.

ELEGIA. V.

**H**OC IGITVR MVRETE minor post  
funera magni  
Iam reliquum vt nobis tu rapereris erat:  
Et tua, nondum etiam patrii post funera, siccis  
Aspectaremus funera luminibus:  
Funera quae ad lacrimas tigres cantesque mouerent,  
Cautibus & si quid durius esse potest?  
Et cui non longo tabescant lumina fletu,  
Quis lacrimas gemino fundere fonte neget,  
Cum iuuenem videat primaeuo in flore iuuentae,  
Cui nondum molles sparserat vmbra genas,  
Ad tumulum efferri, claudī squalentibus vmbis,  
Cum super impositus condidit ossa lapis?  
Heu heu quis tristi non scindat pectore vestem,  
Heu quis luctifico non secet vngue genas?  
Cui pudor intonsum fuerit gest ire capillum,  
Et sparsum in formi puluere habere caput.  
Qui mores Murete tuos sensusque viriles  
Et maturum animi iudicium meminit:  
Et meminit, tibi quae fluerent de pectore dicta,  
Quam super aetatem prouidus ante fores.  
Et cui notus eras, cui non mirabilis esses,  
Quin superet visu colloquioque frui.  
At tu virgineo contingens ora pudore  
Mirus eras, quamuis pauca locutus eras.

Pauca

Paucæ loquebaris, sed quæ pro pluribus essent,  
 Et morum exprimerent ingenijque bona.  
 Diuitias possent vtriusque ostendere linguae,  
 Attica siue tuas, siue Latina tuas.  
 Quid quod & arguta flectebas carmina voce,  
 Et tua Picrius contigit ora lepos?  
 Quod lenibus digitis pulsabas organa, dulcem  
 Auribus vt facerent organa pulsa sonum?  
 Quod puero egregias artes, quas docta Matthesis  
 Traderet, intento discere ludus erat?  
 Nil in te puerile fuit: non otia, non te  
 Ludicra, non blandi detinere ioci.  
 Scilicet hoc animo, tam multa nobilis arte  
 Occidis ante diem, qui sapis ante diem.  
 Sed quid ego ante diem dixi, cui debile quamuis  
 Inficeret nondum cana senectû caput,  
 Nec dum etiam tenera starent lanugine malae,  
 Sed neque adhuc ætas florida ver ageret:  
 Sed tamen & graue iudicium, pietasque senilis,  
 Canaque matura relligione fides,  
 Eximere e iuuenum numero potuere, senemque  
 Dicere, dein superis inseruisse choris?  
 Et meminisse iuuat, pietati vt deditus esses,  
 Sedulus vt castas exequerere preces.  
 Quam Maria, & Christus, quiq. illi proximus vnus  
 Dicitur in sancto procubuisse sinu:  
 Eq. sacro largos recubantem hausisse liquores  
 Pectore, queis veterum proluit ora virum:  
 Quam tuus aligerum e coetu custosque comesque  
 Viscera diuinatangeret usta face.



Quam solitus contemptae inopum miserescere vitae,  
 Quam cuperes illis ferre frequenter opem.  
 Quamquā animum magis obstrinxit priuata parente,  
 Dotis & auxilio siqua puella fuit.  
 Hanc cupere aiebas iusta cum dote marito  
 Iungere in aeterni foedera coniugij:  
 Seu potius deuota sacris, vinclisque soluta,  
 Sanctae ut seruaret iura pudicitiae,  
 Et matutinas iteraret carmine laudes,  
 Solueret & grates nocte dieque Deo.  
 Quin etiam sermo tibi multus in ore locorum  
 Essent virtutis quae monumenta piae:  
 Hic ubi pauperies reperiret languida portum,  
 Mortuae effossae subijceretur humo.  
 Haec animo pietas, haec menti infixae cupido,  
 Plurimus hic circum pectora fulsit amor.  
 Omnibus his certum, si firma adolesteret aetas,  
 Praesidium, & columen grande futurus eras.  
 Haec dedit euenisse Deus, cui grata voluntas  
 Illa, nec in longum tam pia vota tulit.  
 Nam tua eum saeuo languerent corpora morbo,  
 Iam iamque inijceret mors violenta manus:  
 Sponte tua Christique memor melioris & aeni  
 Haec voce extrema testificatus ais.  
 Christe pater, tu sume hanc animā, tibi reddimus illā,  
 Quae quondam est pretio sanguinis emptā tui.  
 Ipsa quidem indignam sese, & peccasse faterur  
 Plurima: perfundit conscius ora rubor.  
 Sed tu qui veniam spondes mitissime iudex,  
 Ne mihi, ne differ ferre rogatus opem.

Per



Per te, per magnum castae genitricis amorem,  
Perque pios coetus, & tua regna, rogo.  
Ne temne hanc venientem animā, miserere precātis,  
Excipe pacato tempus in omne sinu.  
Nec minus ad socios, qui convenere vocati,  
Summo in digressu talia dicta dabas.  
Vos autem exanimū corpus donate sepulcro,  
Ossaque apud patruī condite nostra mei.  
Haec de me volui. Sed nunc disponere restat  
Quae bona mi patruus iure fruenda dedit.  
Iustam horum excipiant partem materque, sororque  
Vtraque, & illarum filius atque nepos.  
Omnia dein varias sollers describis in aedes,  
Quarum esset virtus indubitata tibi.  
Maxima pauperibus pars dicta orbisque puellis,  
Seu cupiant hominum, seu mage vincla Dei.  
Sed postrema mihi a patruo stat tradita cura  
Illius immensus bibliotheca labor.  
Hanc mihi discerpisse nefas. Vnum illa sequatur  
Integra, nec varias sit timuisse vices.  
Sederat hoc patruo, patruī sententia perstet,  
Quodque ipse imposuit sustineatur onus.  
Quis ferat hoc melius, socium quam coetus Iesu,  
Magna ubi tot iuvenes erudiuntur ope?  
Hoc igitur, Patres, donum morientis habento,  
Ne sit quae patrum delectat vlla dies.  
Haec ego, Signatis vos haec mandate tabellis,  
Haec mea mens, vlli quam violasse nefas.  
At vos o comites, vos o mea cura valete,  
Este precor memores, si licet, vsque mei.

Iussisti haec fieri: fuit haec suprema voluntas  
 Marce tibi, haec fieri lex veneranda iubet.  
 Audiet haec quisquis, mirabitur, & simul addet,  
 Tantum in tam tenero corpore mentis erat?  
 Consilij tantum, tantum & caelestis amoris?  
 O venerande magis, quam miserande puer.  
 O felix, magnoque puer dignissime caelo,  
 Quem terra haud meruit continuisse diu.  
 Hoc sperare tuos, qui te deflemus amici,  
 Cum vita mores morsque suprema iubent.  
 Mitto ea quae tecum fuerunt communia multis  
 Omnia Christicolum more peracta pio.  
 Certe intermissus tibi numquam rite precandi  
 Mos fuit, & Christus plurimus ore fuit.  
 Incluta quin etiam Iessaei carmina vatis  
 Dulce erat, & laudes concinuisse Deo.  
 Haec ego persensi, titubantis murmura linguae  
 Vt volui & dubios excipere aure sonos.  
 Nec desunt alij: sensit studiosa iuuentus  
 Cui te non fuerat alter amabilior.  
 Difficiles miserata obitus longumque dolorem  
 Sederat haec circum grata corona torum.  
 Solatrix aderat, sed quae solatia praebet  
 Ipsa suum haud valuit dissimulare malum.  
 Tandem bis senas anima eluctata per horas  
 Deseruit fessi corporis hospitium.  
 Laetior hic subito lux leui in fronte refulsit,  
 Inque serenato pulchrior ore decor.  
 Tum vero & sese lacrimae fudere tepentes,  
 Nec potis est nimius promere verba dolor.

Sed

*Sed postquam tonuere graui suspiria corde ,  
Denique fulminibus vocis aperta via est .  
Lamentis & cuncta sonant , & plena querelis  
Omnia. lugenti verba ministrat amor .  
Felicem sed quisque tamen te nomine clamat,  
Cui patuit tali morte salutis iter :  
Ostensum modo quem terris caelum abstulit , aeno  
Scilicet vt dignum nobiliore frui .  
Spero equidem caelo frueris Murete, pijsque  
Moribus est certus quem meruere locus .  
Et desiderium nobis immane relictum est .  
At tibi perpetuo tempore parta quies .  
Iam te quam dederit serie natura sequemur :  
O isto liceat limite ferre pedes .  
Interea vt memores longum seruemus amorem ,  
Viuat & aeternum nomen honosque tuus :  
Quandoquidē gelido conclusum est marmore corpus ,  
Addetur breuibus littera caesa notis .  
Muretus minor hic situs est . in flore iuuentae  
Mors tulit, vt sensit mente animoque senem .  
Hanc sedem elegit, simul vt condantur eodem  
Patruus & fratris filius in tumulo .*



IN. OBITVM. ALEXANDRI  
Farnesij Cardinalis.

ELEGIA. VI

**C**EDITE iam lacrimae : via iam laxata querelae est :

*Vox properat tardas non bene passa moras :  
Carceris angusti longum indignata recessum ,  
Sat memor officij, non memor ipsa modi .  
Turbida vox properat : septo velut aggere torrens ,  
Ut sibi praecclusum per vada pandit iter ,  
Murmure se rauco primum increpat : impulit vna  
Impetus : & tandem qua data porta ruit :  
Tum strepitu ingenti conantia sistere frangit :  
Fertur : & indomitas in mare portat aquas .  
Magnus ALEXANDER Farnesius occidit : eheu,  
Heu, moriens secum gaudia quanta tulit .  
Non hominum timuit iustis obsistere votis  
Mors fera, & infestas injicere ausa manus .  
Et tacita haec spectem lingua ? nec verba profundat  
Cum sonitu innumeris mens labefacta malis ?  
Hoc bene : non soli querimur . Iacet obsita luctu  
Urbs pia, praereptam quae sibi poscit opem .  
Romulidum iacet omne genus . Causa vna dolendi  
Omnibus : haud vnus prostruit ore dolor .  
Hic dolet, in rebus se quod circumspicit artus :  
Hic, quia subsidio deficiente cadit .  
Hic ruit in gemitus, plenis quod nubilis annis*

*Filia,*

Filia, sedem humilem, progeniemq. grauat.  
Huic lacrimae ex oculis, quem vexat morbus. At illi,  
Est quia pauperiem prodere voce pudor.  
Illa viro mulier, prolesque orbata parente,  
Nunc deserta sibi, visaque sola sibi.  
Pro se quisque suum certat vulgare dolorem,  
Fletibus & mistis omnia maesta madent.  
Pars bona nobilium, Romanae quod decus vrbis  
Occidit, & Latij gloria facta minor.  
Hinc velut indictam communi in clade, recentis,  
Iustitium, & luctus, signa dedere mali.  
Ducitur insigni lugubris funere pompa,  
Per fora, nigranti syrimate, perq. vias.  
Te quoque purpurei inbar immortale Senatus  
Terruit extincta lux radiata face.  
Ordinis ille tui princeps, quem saepe solebas  
Consulere, vt subito decidit interitu.  
Exuit hoc nitidum visu mutata ruborem  
Purpura. Maerentes non decet iste color.  
Sic ferrugineos par est imitari hyacinthos,  
Heu modo funestae tristia signa domus.  
Funerei flores inscripti nomina regum,  
Et gemitus (cheu non latuere) notas.  
Vos ego, vos olim, terrestria sidera: sed nunc  
Lilia in aetherijs sedibus esse putem.  
An quia cognatum repetit sua pignora caelum,  
Et color e summis arcibus ille venit?  
An quod ALEXANDER caelo intulit? Illius auctu  
Plenior est Superum, nobiliorque chorus.  
Despicit hinc longe terrarum lubrica regna,  
Quae

Quae meruisse magis, quam tenuisse iuuat.  
 Nec minus & veteres gaudet spectare clientes,  
 Et diuina illos promptior auclat opē.  
 Hinc precibus iuuat effusis, quas protegit oras,  
 Vtraque quas pelago diuidit Hesperia.  
 Huius & auxilio simul & Germania tuta es,  
 Et plaga frigenti qua micat Vrsa polo.  
 Te quoque, Belgarum domitor, noua gloria belli,  
 Adspiciens propius, qua valet arte, fouet.  
 Tu proauo & patruo laetus cognomine, tendis  
 Fortia Pellaei vineere facta ducis.  
 Ille tibi e celso plaudit sublimis Olympo,  
 Inq. tua aeternum suscitāt arma Deum.  
 Non aliter tibi victori iam plauserat idem,  
 In terris hominum cum pater esse sinit.  
 Illi Christicolum fuerat res publica curae,  
 Vnus & antiquae religionis amor.  
 Haec puero pia cura fuit: dein ordine vires  
 Tempore perpetuas progrediente capit.  
 Carole tu testis fratris Jocer inelytus: ad te  
 Nomine quando adiit conspiciendus ani.  
 Disiectosque tulit secum per fulmina montes,  
 Argumentum ingens nominis, atque rei.  
 Tu testis Francisce animis inuicte, supremi  
 Pontificis subijt cum tua tecta nepos.  
 Cum similis caelestium ori, maioraque visus  
 Est tibi mortali condicione loqui.  
 Namque rudimenta haec iuuenis Farnesius: illas  
 Primitias, regum conciliator habet.  
 Haec tibi ALEXANDER primordia: talis, in vsus  
 Pontifi-

Pontificum, tali praeditus arte venis.  
 Quamquam illi per te, manifesto numine: certe  
 Non sine te, summum corripuere gradum.  
 Adiutor tu tanti operis, tu muneris auspex,  
 Tu bonus auxilio, consilioque bonus.  
 Sen Zephyrus placidū sternat mare: seu tonet Auster  
 Nubilus, & feriant flamina versa ratem:  
 Tu veluti cautes stas imperterrita ventis,  
 Ipsa licet fluctus aspera tollat hyems.  
 Res dubiae mentem non abiecere: secundae  
 Inflauisse aura non potuere leui.  
 Tempus utrumque vno fers pectore. Conscia tantum  
 Ipsa sui Virtus, & benefacta valent.  
 Tu regum magnorum animos curasque gerebas:  
 Quorum etiam, rebus vincere quaeris opes.  
 Dicite vos Cimini colles, fontesque, lacusque,  
 Silvaeque ab inuito iussa virere solo.  
 Dic sedes vicina vrbi, domus hospita regum,  
 Deliciae domini diuitiaeque tui.  
 Hic vbi iucunda solitus confidere in vmbra,  
 Curarum a strepitu cum requiesset henus.  
 Sed cur vos taceam magni de nomine IESU,  
 Vos Capitolinis proxima templa iugis?  
 Vos maiora vocem terris, aut aemula caelo?  
 An formam inspiciam, vel magis artis opus?  
 Vos modo candenti nituistis marmore, & auro:  
 Nam tholus auratis spirat imaginibus.  
 Vos, lapis externus, Phrygijs vos ara columnis,  
 Quaeq. diu admirans limina quisque manet  
 Haec ea iam fuerat visendi causa: Sed, eheu,  
 Altera



*Alter a visendi vos modo maior erit.  
 Venerit huc quisquis, lucentem pronus ad aram  
 Rite simul Superis fuderit ore preces:  
 Cetera contemplans, venerabitur ante sepulcrum  
 Principis, & lacrimans talia dicta dabit.  
 Magnus ALEXANDER iacet hic Farnesius, An ne  
 Vmquam erit, vt similem postera saecula ferant?*

---

## A D. O D O A R D V M

Farnesium.

## ELEGIA VII

**S**AT LACRIMIS ODOARDE datum,  
 iam questibus aures  
 Parce onerare hominum, parce onerare Dei.  
 Tristia sat patrui deslesti funera magni:  
 Funera, queis vestrum est exanimata domus.  
 Funera, quae veluti nec opinum fulminis ictum  
 Pallida ROMA simul sensit, & intremuit.  
 Et capite excussa lauru victrice, cupresso  
 Impedijt passas dilaniata comas.  
 Atque vrbes & regna suo procul excijt orbe.  
 (Perculerat tanti nuntia fama mali)  
 Non aliter, si laeta licet componere maestis,  
 Et conferre vna tempus vtrumque iuvat.  
 Miserat vnden is iam lustris ante, frequentes  
 Dulcia per populos gaudia Christiadam.

Alter

*Alter ALEXANDER sacrum ut Farnesius ostrum  
Extulerat, triplici cinctus honore caput.*

*Tum septem gemino sonuere e vertice plausus,  
A Capitolina sed tamen arce magis.*

*Et grates hominum dictae Superumque parenti,  
Qui talem annuerat gentibus esse patrem.*

*Annuit ille etiam votis communibus, esset  
Ut cui mens sapiens, mors quoque sera foret.*

*At nunc septenis plangens sub vallibus Echo  
Confusos gemitu iactat ad astra sonos.*

*Atque ubi subiecto surgunt Capitolia templo,  
Flebilis huc tota coetus ab urbe ruit.*

*Alter ALEXANDER templi decus, & pius auctor,  
Huc feretro fertur, conditur hic tumulo.*

*Huic vitam breuiorem omnes, mortemque queruntur,  
Ante suum veluti sit properata diem.*

*Debita namque illi terrarum maxima regna,  
Et fuerant facili sceptrum gerenda manu.*

*Haec sibi mortales finxerunt gaudia mentes:  
Gaudia, quae volucres diripuerunt Noti.*

*Caelo aliter visum. Terrarum degener orbis,  
Credo equidem, haud tali munere dignus erat.*

*Ille autem aetherea iamdudum dignior aula:  
Quo sibi munierat per benefacta viam.*

*Quod paruis immensa manent si praemia caelo,  
Et potis huc gelidae ducere potus aquae:*

*Plurima quid riuus indeficientibus addant  
Flumina, in innumeras dona tributae domos?*

*Ergo nunc fruitur centeno fenore, & ampla,  
Quae nullo exciderint tempore, regna subit.*

*Reddit*

Reddit ALEXANDER nouus hunc Farnesius : ille  
 Natus fratre : parens, ille, ODOARDE, tuus.  
 Sed reddit, reddetque virum pietate fideque  
 Nobilis hic armis, nobilis ille toga.  
 Tu reddes ODOARDE toga. Viden' orbis vt in te :  
 In te omnes populi lumina fixa tenent ?  
 Te geminis olim patruis par purpura magnis,  
 Forsitan atque abauo reddet honore parem.  
 Nam veluti generis veneranda insignia vestri,  
 Lilia, in aurato quae micuere solo,  
 Prima cadunt folijs labentibus ; altera ab illis  
 Extant, & simili germine silua viret :  
 Haud secus eximios soboles FARNESIA bello  
 Sufficit & paci tempus in omne viros.  
 Scilicet vt varient alternae munera laudis,  
 Et paribus titulis nomina prisca ferant.  
 Non ego, non repetam vestrorum ex ordine auro-  
 rum,  
 Et decora, & valida rapta trophaea manu.  
 Non ego longus in hoc. Tuus en fraterque paterque  
 Pro multis possunt millibus esse satis.  
 Ille quidem, illustris RANVTI nomine, eundem,  
 Aemulus, ingenio consilioque refert.  
 Iamque manus durat bello: iam praecipit hostem :  
 Iam placida populos sub ditione tenet.  
 Interea genitor regnis dat iura subactis,  
 Quae premit auspicijs, magne PHILIPPE, tuis.  
 Fortis ALEXANDER, cuius nomenque decusque,  
 Perq. pia aeternus proelia partus honor,  
 Et proles augusta, aegram spe sustulit urbem.  
 Quin etiam magnum singula pondus habens.

Magna quidem sunt haec solatia. Nec tamen esse  
 Debit ingenti parua medela malo.  
 Ire sed & lenior tum maeror coeperit, & tum  
 Tristior exitio desinet esse dolor:  
 Cum clavis deducta atavis sacra purpura, & urbis.  
 Et Latij assensu moribus aequa tuis,  
 Patrum concilio, & magnis te iunxerit actis:  
 Inq. tuo rutilus fulserit ore decor.  
 Lumine nam placido si aspexerit exoriens Sol,  
 Et molli aridulum sparserit imbre nemus:  
 Lapsa suum explicito diffundent vertice odorem  
 Lilia, in assiduos semper itura satus.  
 Sic per te reparata domus. Sic inclyta ROMA  
 Affluct in plausus ambitiosa tuos.  
 Et dicet, venerata togam. Spes altera surgit:  
 Et per post hiemem pulchra ministrat humus.

## A. D. CHRISTVM

## ELEGIA. VIII

**C**HRISTE Pater, totum meritis si amplecto-  
 ris orbem,  
 Si vota officijs exuperare iuuat.  
 Huc ades, & precibus placatus leniter affla,  
 Acta per inuitas dum natat alnus aquas:  
 Flumine in aduerso, recto duc flumine, portum  
 Nec nisi cum tenuit, desere nauis iter.  
 Da mentem mihi nosse tuam, cui seruiat vni

Mens mea: cui dicam, Tu mihi sola places:  
 Sis tua nota mihi numquam delusa voluntas,  
 Et mea sint placitis aemula vota tuis.  
 Illi ego me socium concordi foedere iungam,  
 Foedere, quod numquam soluerit vlla dies.  
 Quod cupis, hoc cupia: spernum quod spernis: amemq.  
 Quicquid amas: aliud nec potuisse velim.  
 Iam mihi terrarum pereat quod sustinet orbis,  
 Iam mihi vel regum despiciantur opes.  
 Dummodo sim tecum, cunctis ignobilis aeuum  
 Traducam, & quamuis vilis inopsque vocer.  
 Sic ego sim, rerum ne turba interstrepit: in te  
 Sed placida immotus pace quiescat amor.  
 Tu mihi laeta quies, tu pax optata: solutis  
 Spes curis, in te tuta reponit onus.  
 Te sine, victa malo ingenti mens fluctuat amens:  
 Omnia dura mihi: tristeque diffidium est.  
 Tu fesso laeuum capiti substerne lacertum,  
 Et mihi det circum dextera colla manus:  
 Inq. tuo amplexu velabit lumina sompnus,  
 Vltima nec facient classica pulsa metum.

---

## A D. D E V M

## ELEGIA. IX.

**S**VMME parens hominum, celsi regnator  
 Olympi:  
 Cui, cuncta ut fierent, sat voluisse fuit.  
 Afficis,

*Aspicis, ille tuis offert qui vultibus ora,  
Ille tui indignus numinis ore fuit.  
Amissæ toties memor, acceptæque salutis,  
Nec miseros audet tollere ad astra oculos.  
Ille ego sum, nimium infelix. Ignosce fatenti.  
Ille ego sum. Tingit conscius ora rubor.  
Nam male ego ut factis, bene tu, certamus utrinque;  
Crimina ab officijs sunt mea victa tuis.  
Diffugiam procul. Ah ne me tuus ignis adurat,  
Neu soluar mutos protinus in cineres.  
Et facerem, tua ni bonitas solatia ferret,  
Quam fore perpetuam spes mihi semper ait.  
Quin etiam, tibi qui placeam mens anxia curat,  
Si dabitur suavi subdere colla iugo.  
Hinc metuens acti, venturi nescius ævi,  
Ut malefacta bonis oculuisse queam:  
Virginis ante oculos felicitis & ora parentis,  
Cui Deus e collo dulce pependit onus:  
Aligerum densa ac procerum inspectante corona,  
Attonita laudes quæ tibi mente canit:  
Me tibi dedo iterum sollemnibus ordine votis,  
Ut iuuet in me ipso iam nihil esse meum.  
Quin volo contentus tenui iam vivere cultu,  
Ditemque amplecti pectore pauperiem.  
Et nitar, decoris custos, ut corpore casto,  
Et niueus casta stet mihi mente pudor.  
Nomine dura tpo nec erunt quaecumque iubebor:  
(Mollia sic faciet iussa, iubentis amor.)  
Sed nec opes inopes, nec vani nominis umbram,  
Atque ea quæ falso gaudia vulgus amat,*

Non ego, non faciam tanti, dum vita manebit,

Sanctaque diuinus vincula nectet amor.

Talibus auxilijs, ad pugnam fortis, & armis,

Queis sine, quam subito victus inermis eram,

Castra sequar, tua signa sequar victricia, IESV,

Certior ante animam, quam posuisse fidem.

Iamque sacramentum, linguaque & mente, fidele,

Iuratus dico, deuoneoque caput.

Sic mihi, sic adsit, tua quae clementia summa est,

Et cui par pietas nescit habere modum.

CHRISTI te per ego effluxit qui e corpore sanguis,

Vnde illi saeuae mortis aperta via est:

Vnde mihi quoduis patuit via lata petendi,

Quam possum enixe, suppliciterque rogo.

Accipe, candentes qui stat sater agnus ad aras,

Vt nullus gladio, sed prece sanguis eat.

O, tibi mactatus talem si spiret odorem,

Qualem vbi purpureo vere renidet humus.

Dexter ades, timidisque faue pater optime votis:

Victima ne in cassum, verba, cruorque, cadant.

Spero equidem, vt pius es, nostris placabere donis,

Si quod velle iubes, hoc quoque posse dabis.

Euentura precor. tacita dulcedine sensus

Nescio quae tangens, vox mihi reddit, Amen.





## A D. E V M D E M

## ELEGIA. X

**O**MNIPOTENS audi genitor pia verba  
rogantis,

Quem referunt audi sidera pulsa sonum.

Te precor: aduerte huc numen suprema potestas:

Namque alius quis sit, quem super ipse rogem?

Ipse tibi terras cum primo accendet eous

Lumine, cum primo lumine vota feram.

Tu mihi demittes caelo placabilis imbrem,

Et facili accipies supplicis aure preces.

Ipse tuas sistam me matutinus ad aras,

Soluerit ut sensus pectore pulsa quies.

Quam tua sit sceleri furtoque auersa voluntas,

Aspiciam: iubeas si prope ferre gradum.

Este procul pestes, ingratum auertite visum,

Parcite diuinis, parcite luminibus.

Non aequis Deus ille oculis aspectat iniquos.

Neglecta violant qui pietate fidem.

Odisti, pater, iniustos, & fallere doctos.

Et blanda hostiles contegere arte dolos.

Hi sibi iam domini mentem auertere benignam.

Atque ea perinris quam sit acerba docent.

Nec se contingi patitur Deus ore nocentis,

Cuius adhuc multo sanguine dextra rubet.

At mihi tu adspira facilis: tu lumine amico,

Ingrediar cupidus cum tua templa, faue.

Atque ego te supplex sancta venerabor in aede:  
 Ossa pius curret per tremefacta metus.  
 Tu mihi duxq. comesq. bonus: tu dirige gressum:  
 Ne vager incertus, da bene ferre pedem.  
 Te monstrante viam, insidias struat inuidus hostis,  
 Insidias hominum nil timuisse decet.  
 O vanum & fallax hominum genus: ora malignae  
 Fraudis, & occulti pectora plena doli.  
 Guttur adest illis patulum, deforme sepulcrum,  
 Et lingua instabiles vincere certa Notos.  
 Tu mala, tu fallacum hominum mendacia perde,  
 Impia dum poena vindice facta luant.  
 Quae cupiere, tui quando mens excidit illis,  
 In celerēs ventos irrita vota cadant.  
 Scilicet agnoscent, quam laesi numinis ardor  
 Saeniat, & domini quam gravis ira tonet.  
 At parte ex alia, vos o quibus una voluptas  
 Spesque Deus: vos o gaudia quanta manent:  
 Gaudia vera manent, quae nulla infecerit aetas:  
 Vos eritis magno maxima cura Deo.  
 Gloria vnique Deus. te qui miretur ametque  
 Semper erit: iusto nam bene semper erit.  
 Ille tuo, clypeo velut obtendente coronam,  
 Ibit praesidio, quam inuēt ire viam.

## ELEGIA. XI

**Q**UID TOT sollicitum vexas mens anxie  
 curis?  
 Et toties frustra vana timere inbes?

Nil

Nil mihi, nil deerit: Deus est qui pectora curis

**L**iberat, & lactos qui iubet ire dies,

Me Deus ipse regit, me in pascua ducit opima,

Plena ubi distendunt vbera lactis oues.

Me gelida reficit lymphæ, fluuioque salubri,

Hic ubi perpetuo gramine vernat humus.

Denius errabam solis in montibus: at me

**V**ertit, & intuitum pastor ouile tulit.

Ille mihi præpandit iter, quæ semita monstrat,

Ille vacillantes dat bene ferre pedes.

Ut cingant tenebrae, ut mortis circumuolet umbra,

Et vetet in media fidere nocte timor.

Tu me, nec tenebrae, nec mortis territet umbra:

Ibo ego securus, ni comes ire neges.

Tramite de recto flectentem virga coercet:

Lapsantem baculus firmat, & addit opem.

Quin etiam fesso conuiuia laeta parantur,

Largaque multiplici mensa referta dape.

Ut videat mala, qui nobis intendere tentat,

Vratuzque mala perfidus inuidia.

Iamque mihi c nitido stillant unguenta capillo,

Et veteri spumant pocula plena mero.

Haec tua me pietas non tempore deferet ullo,

Dum mihi mors auidas inferat atra manus:

Quæ simul ac veniet, breuioris tempora lucis

Permensus, sedes ducar in aetherias.

Et procul hinc absunt luctus, curaeque nocentes:

Nec vetat aeternum nox inimica diem.

A D. C H R I S T V M  
In die Salutationis Angelicae.

ELEGIA. XII.

**P**ACIFERAM canimus lucem. Bone Pacis  
amator  
Huc ades, & Pacis munera prisca refer.  
Huc ades illustri matris diademate vinctus,  
Non secus ac fulsit cum tibi laeta dies.  
Cum sponsam thalamo socians noua foedera Pacis.  
Tempore non vlllo dissoluenda feris.  
Sic libuit placare patrem, qui iustus in iras  
Arserat, indignans vota precesque virum.  
Dira lues totum maculis obduxerat orbem,  
Traxerat & culpa traduce poena comes.  
Inq. omnes scelus effusum peruasferat omnes,  
Nec quisquam patrio crimine liber erat.  
Tabida non aliter corrupto ex aëre pestis  
Robur ab occulto tempore maius habet.  
Et primum infecitq. greges, armenta q. tabo,  
Mox etiam miseris gentibus incubuit.  
Nil purum est sceleris, Deus inquit, vt omnia lustret,  
Stat culpam vlcisci, materiemque mali.  
Hand mora, corripuit pharetram, cornuq. tetendit,  
Et parat adducta mittere tela manu.  
Et faceret: sed tu pacem veniamque precatus,  
Efficis irarum ne memor esse velit.

Tu paci medium te offers dulcissime Iesu,  
 Inq. tuum recipis spicula versa caput.  
 Tu mortem auertis nobis, cum nube coactum  
 Virginea corpus sustinuisse iuuat.  
 Scinderet ut nubem contorto fulmine nimbus,  
 Dum tonat, ut magni detonet ira patris:  
 Hinc toto fluit irriguus de corpore sanguis,  
 Et tepidum multo prouit imbre solum.  
 Vim dicas sensisse solum, sic flore recenti  
 Sentibus e medijs emicuere rosae.  
 Vnde simul dulcesq. animis afflantur odores,  
 Sunt & honoratis mollia ferta comis.  
 Sunt ea, sunt veris, sanctaeque insignia Pacis,  
 Ipsaque laetitiae sunt bona signa nouae.  
 Namque velut, cum fugit hiems, imberq. recessit,  
 Sol melior picto gramine vestit humum.  
 Sic etiam, ut sacro placuit tibi sanguine, sacra  
 Hostia fulmineum conciliare Deum:  
 Scilicet infractique arcus, versaeque sagittae,  
 Lapsaeque parentis sunt patris arma manu.  
 Nec tantum abstinuit bello: Pax aurea terras  
 Munifica e caeli sedibus auxit ope.  
 Nec clypeus gladijve sonant: concessit aratro  
 Ille, sed in saltem ferrea cuspis abiit.  
 Huc ferri decessit honos. Ite horrida tela,  
 Ite procul trepidos sub styga ferte metus.  
 Tu quoque iam felix hominum genus, aethere ab alto  
 Est cui cum placida reddita pace salus.  
 Nunc saeuas dedisce artes, fera bella quiescant,  
 Et graue securo corpore cesset onus.

Tu Pacem ante alios, IGNATI mystica proles,  
 Patris ad exemplum cur venereris, habes.  
 Ille quidem, iussitque tubas, atque arma valere.  
 Et sese Pacia misit in arbitrium.  
 Huc animum simul intendit: tuq. optime Iesu.  
 Sub tua signa illum patre monente vocas.  
 Mons ubi Serratus prisco dat nomina templo,  
 Supplicibusque Dei fert pia mater opem.  
 Ante diem lucemq. sacram, celebrare quotannis.  
 Terra sibi oblatae qua bona Pacia amat.  
 Serica permutans sacco, tum fune relictus,  
 Peruigilem noctem duxit ad usque diem.  
 Nec prius abscessit, quam se tibi CHRISTE sacrarit,  
 Et sua sub templi fixerit arma tholo.

---

## I . N . D . I . E . N . A . T . A . L . I . D . O . M . I . N . I .

### E . L . E . G . I . A . X . L I I .

**E**ST DEUS, in terris mortales induit artus.  
 Eligerunt e caelo candida turba veni.  
 Spectatum pia turba venit: mihi credite, nil est  
 Lumina quod possit vestra tenere magis.  
 Pandite nunc tandem reuoluto cardine postes.  
 E caelo ad terras peruia facta via est.  
 Nec vos poeniteat manibus permutua nexis.  
 Aëra per nitidum conseruisse choros.  
 Ipse Deus terrae iam nunc migravit in orbem.



Non caelum est vobis deseruisse pudor.  
Hoc bene, lactifico quod curritis vndique plausu,  
Funditis & dulces ore sonante modos.  
Gloria, Paxq. canae referunt ad sidera vall :  
Aurea pax homini : gloria summa Deo.  
Peruigil haec pastor suspensa percipit aure,  
Et stupet in media fulgere nocte diem.  
Et metuat, nisi vestra vetent promissa : timore  
Dempto, laetitiae vos bona signa datis.  
Ille autem accelerat tanta ad spectacula gressum,  
Est ubi cum sancta virgine matre puer.  
Ipse reclinatus puer ad praesepia, vili  
Membra ferens panno vix adoperta, iacet.  
Nec bouis obsequium, nec dedignatur aselli :  
Inter & attonitum parvus utrumque tremit.  
Hic tremit, hi patulis efflant de naribus auram  
Egelidam, hac pueri frigida membra fouent.  
Ipsa parens in nato inhiat pulcherrima visus,  
Et longum aspiciens pascit amore oculos.  
Ignem etiam admirans haurit : nam lampadis instar  
Exit, & e pueri plurimus ore micat.  
Nec minus haec custos miratur virginis, ille  
Dignatus sacri nomine connubij.  
Stat cubito ad spondam presto, barbamq. reflectens  
Ipse cana ad mentum sustinet vsque manu.  
Paruum otulis videt, ingentem sed mente veretur,  
Inq. homine agnoscit delituisse Deum.  
Aspicit haec propius pastorum rustica pubes,  
Vixque tenet lacrimas, dirigitque metu.  
Et tandem venerata Deum, venerata parentem,  
Lanigeras



Lanigeras media valle reuisit oues.  
 Bethlemio caeli regem natum esse sub antro  
 Praedicat, & socijs singula visa refert.  
 Nec mora, festinant illi, sedemq. requirunt,  
 Vilis vbi aetherio risit odore domus.  
 Dona ferunt ouium fetus, & limina sertis,  
 Et viridi certant fronde operire solum.  
 Mox puerum aspeclant, qui matre in virgine totus  
 Haeret, & ambrosium spirat ab ore decus.  
 Hic vident, vt matri blandis arridet ocellis,  
 Vtq. daret, si non brachia vincla forent.  
 Hinc narrant digressi alijs. stupet inscia turba,  
 Perq. dies multos itque reditque viam:  
 Donec parua super labentem culmina tecti  
 Stellam cum multa luce sedere vident.  
 Atque nouum terris mirati surgere Solem,  
 Tollunt opposita lumina fulta manu.  
 Interea aspiciunt vndantes agmine campos,  
 Et circum innumera feruere gente vias.  
 Plurima terram operit quadrupes: collum eminet illi  
 Longius, & curuo tergo gestat onus.  
 Visetiam, prae turba equitum, decedere montes,  
 Et visum in pedites protinus ire solum.  
 Maximus auditur fremitus pecudumq. virumque  
 Vrgentum celeres appropere gradus.  
 Hinc simul ignota cernunt in veste nitentes  
 Aurorae populos, Aethiopumq. manus.  
 Hos inter Nabathea cohors, comitesq. Sabaei,  
 Multus & assiduo Sole perustus Arabs.  
 Vt ventum specus ad patulum, cui sideris ardor

Cum face submissum visus habere caput :  
 Suppliciter perculsa nouus per pectora cunctis  
 It pauor, & terram cominus ore petunt .  
 Tres tamen egregij : queis, regum insignia, dextram  
 Sceptra manum decorant, celsa tiara caput :  
 Myrrhae, auri, turis, recludunt dona : futura  
 Illa homini, haec regi, tertia dona Deo .  
 Accipit haec puer arridens pulcherrimus ore ,  
 Quasq. potest, visus fronte referre vices .  
 O ego si possem famulantum accedere turbae ,  
 Donaue supposita sustinuisse manu .  
 Vt puerum aspicerem supplex , vt plurima plantis  
 Laetitia & lacrimis oscula mista darem .  
 Sed nequit elapsi reuocari temporis aetas ,  
 Et semel effugit non reditura dies .  
 Et tamen ipsa etiam mihi nunc cunabula fingo ,  
 Et inuat ad teneros procubuisse pedes .  
 Hic inopem voueo , hic castam sine crimine vitam ,  
 Hic & promptum animum iussa aliena pati .  
 Haec tibi magne puer regalibus aemula donis ,  
 Turi, auro, myrrhae, mystica dona fero .  
 Parua quidem fateor , sed quae nec parua videri  
 Fecerit baud paruus parua ferentis amor .



DE. CHRISTI. DOMINI  
preccatione in horto eiusque su-  
dore sanguineo.

## ELEGIA. XIV

**G**ETHSEMANI colles, olea mons consti-  
te, & o tu

Hortule cum domino facite cruenta meo.

Vos ego, vos video? mihi vos renouatis acerbum

Qui timor humenti duxit in ore notam:

Ad vos suprema cum venit nocte, granique

Pectora tristitiae corripienda dedit.

Nec quisquam est hominum, dictis lenire dolentem

Qui velit, aut vigili peruigil assideat.

Omnia dant gemitum, fletum omnia; & omnia luctū,

Praescia mens, pallor, nox, loca sola, metus.

Omnia nec terrent tantum, quantum ira parentis:

Hanc timet, ut valida tela vibranda manu.

Ergo ubi maerentes socios, somnoq. grauatos,

Et prouisam animo cernit adesse necem:

Submissis genibus, tendens ad sidera palmas,

Edidit haec maestis tristia verba modis.

O pater, o genitor, proiectum hic aspice natum,

Accipe quas humilis fertq. refertq. preccs.

Hunc mihi, si sis est, oro, defende dolorem,

Et quae mors odijs saeua parata venit.

O ego, ne succos quos pridem infecit amaror,

O ne mista acri pocula felle bibam.

Iam morior curis, languentes occupat artus  
 Iam tremor, & vultu frigidus horror inest.  
 Flebilis hic iaceo. Parce o non digna ferenti.  
 Mens videt, & visis ingemit aegra malis.  
 En trahor ad vincla, & plagas; mortemq. crucemq.  
 Inq. haesura meo tela micant latere?  
 Ah ego quid merui, caelesti vt tangar ab igne  
 Fulminis accensi, dum tonat ira patris  
 Nam neque mens vlli nostra est obnoxia facto,  
 Exijt & nostro nullus ab ore dolus.  
 Quam mihi sunt durae leges: Aliena repellam  
 Crimina, & immeritum culpa aliena premat?  
 Parce pater, si iusta peto: potes omnia: nec tu  
 Asper es: & natus sum tamen ipse tuus.  
 Si sedet hoc animo, & precibus non flectere nostris,  
 Non ego me vinclis supplicijq. negein.  
 Et patiar quodcumque voles. Te propter obibo.  
 Dixit, & in lacrimas vltima verba cadunt.  
 Plurimus haec inter toto de corpore sudor  
 Liquitur, & guttae sanguinis instar eunt.  
 It sanguis, terramq. nouo velut influit imbres:  
 Nec solitus pulchro fulsit in ore color.  
 Quisquis vt informemq. comam, vultumq. cruentum  
 Aspiceret, Christi quaceret ille decus.  
 Talis vbi induxit crustas, & membra peredit,  
 Inficit horrentem pustula nigra cutem.  
 Horruit aspectu caelum: vos aethere in ipso  
 Fama est pallidulas obriguisse faces.  
 At tellus bibit infusum venerata cruorem,  
 Et speciem grates dicere auentis habet.


Fortunata

Fortunata mihi tellus, ubi fertur aperte  
 Procidere aeternum non puduisse Deum :  
 Et lacrimas fudisse patri, veniamque rogasse,  
 Albaque sanguineis ora rigasse notis.  
 Ora natant lacrimis, & sanguine : corpore sanguis  
 Emicat, & maduit sanguinis amne solum,  
 Imbuit hic herbas sanguis, glebamq. iacentem,  
 Sentibus e medijs erubuerunt rosae.  
 Erubuerunt rosae, ut domini testentur amorem,  
 Dicere sic visae. Nos ita pinxit amor.  
 Acer amor. Tantos ne Deum sentire dolores,  
 Nec quemquam alloquijs posse leuare malum?  
 Aspicit haec pater ex alto sublimis Olympo,  
 Atque ira in silentium quam sit acerbata monet.  
 Ira sed in fontes aequa est. Nihil iste, nec egit  
 Nec meruit. Iam non dicere vera piget.  
 Ipse ego sum turpis, fateor, iustissime index :  
 Et mea fraus omnis, crimen & omne meum est.  
 Ipse ego te laesi, infelix. Mibi culpa luenda,  
 Insideat capiti iam precor illa meo.  
 Tu gnato modo parce tuo. Nam viuere dignus  
 Unus, in exitium totus ut orbis eat.  
 Parce precor nato. quod si mutabile non est  
 Consilium, & prolem stat tibi velle mori :  
 Parua tamen dentur solatia. Promptior ibit,  
 Ni solamen abest, mortis in omne genus.  
 Audijt, an fallor? lux caelo missa repente,  
 Et iuuenis dominum constitit ante suum.  
 Constitit, & tristes abstergit pectore curas,  
 Celsaque sublimis sidera rursus abit.

Finis libri tertij.

161  
FRANCISCI. BENCII  
E. SOCIETATE. IESV  
CARMINVM

LIBER. QVARTVS



EPIGRAMMATA

I

De Roma Vetere.



OMNIA VETVS, totum mani-  
bus quae amplecteris orbem,  
Seu dare vis terris, seu dare iura  
mari.

Vna triumphali diademate cinge-  
ris: vna

Omnia Tarpeij cernis ab arce iugi.

Te caput ad caelum tollentem suspicit Atlas,

Te sibi substitui pondere fessus auet.

Salve magna parens virtutum, magna virorum,

Qui titulos armis, qui peperere toga.

Nil tantis certet tibi laudibus: omnia vincis,

O decus, o hominum gloria, Roma Vetus.

## DE. ROMA. NOVA

**R**OMA NOVA immenso lucem quae diuidis  
orbi,

Seu tua das terris; seu tua sacra mari.

Tota salutifera fulges cruce: tota triumphas:

Et Vaticana maxima in arce sedes.

Te dominam rerum, caeloque Ereboque potentem

Sentit, & e Stygijs horruit Orcus aquis.

Salve dia parens, salve domus alma piorum,

Morte quibus domita pandis ad astra viam.

O sola, o summo felix a principe princeps,

O quae mortales vna beare potes.

A D. GREGORIVM. XIII

Pont. max. qui reliquias sanctorum

Abundij & Abundantij trans-

ferri iussit in aedem no-

uam Societatis Iesu

ab Alexandro Farnesio Cardinale

aedificatam.

**S**TRUXIT Alexander regali munere tem-  
plum.

Compositum niueo marmore fulget opus.

Corpus



Corpus erat, nec erat qui animaret spiritus. At tu  
 Verbo infers animum, quod potes, alme pater.  
 Sunt animarum instar sanctorum corpora templis.  
 Non contendam, vtri gloria maior erit.  
 Sed sileat quicumque tamen, res ipsa loquetur  
 Illa fuisse hominis dona, sed ista Dei.

## I V

AD. EVMD. EM  
 Reguli Iaponij.

SANCTE parens, quo nil melius Sol spectat  
 ab alto  
 Aethere, nil maius maximus orbis habet.  
 Adsumus extremis disiuncti ab Iaponis oris.  
 Dulce fuit longam corripuisse viam.  
 Huc pia religio, tua nos huc fama vocauit,  
 Pandit vbi e sacro vertice Roma facem:  
 Cuius & aspectum par sit vel morte pacisci,  
 Dum inuuet ante tuos procubuisse pedes.



AD. SIXTVM. V. PONT. MAX.

De obelisco Vaticano.

**T**RANSLATVM sede ex humili quod no-  
bile saxum

Sancte pater statuis nobiliore loco :

Non equidem temere , & Christi sine nomine factum

Esse putem, cuius munera magna geris .

Virtutis monumenta piae sunt. aspera moles

Tollitur humana vix fabrefacta manu .

Infima quadrato pars nixa est marmore : surgit

Ordine decrescens suspiciendus apex .

Nec pila, nec radius, sed mons in vertice, & astrum,

Et super impositae sunt sacra signa crucis .

Haud aliter terras paulatim deserit imas

Religio, & caeli sidera celsa petit.

V I

D E. E O D E M

**O** QUI suspensis oculis & mente tueris  
Ardua quae moles tollit in astra caput .

Hanc repete e Pharia quondam regione petitam ,

Cum genuit vasto pondere pressa ratis .

Edita multiugis hanc machina ferramentis

Caesare sub Caio vix statuisse potest .

Immota ex illis hodierna ad tempora mansit .

Quisque, licet cupiens, grande reliquit opus ,

Haec tibi Quinte olim seruata est gloria Sixte .

Translata auspicijs constitit illa tuis .

Tu sacris tandem imperijs seruire coactam

Iusta lege aufers, restituisque Deo .

A D.

## V I I

AD. FRANCISCVM. BENCIVM  
parentem meum, & praeceptorem  
optimum, cum ad eum misi  
variorum poëtarum car-  
mina de Sixto V.

**E**T PATER, & doctor, tibi debita munera  
sume.

*Filius haec mitto discipulusque tuus.*

*Carmina praestantum sunt hic illustria vatum,*

*Cura quibus Sixti dicere facta fuit.*

*Pellege, & haec olim si quid numeraueris inter*

*Quod factum a nobis forte placere queat :*

*Gaude animo, fructumq. tui ne temne laboris,*

*Cuius & hoc, paruum quamlibet, extat opus.*

*Agricolae sic saepe suo quam conserit arbos,*

*Qualiacumque tulit, dulcia poma tulit.*

## V I I I

AD. SIXTVM. V. PONT. MAX.  
Quo die inuisit aedem S. Hierony-  
mi Illyricorum.

**I**PSE tuum dum visis opus ter maxime pastor,

*Haec supera visus dicere ab arce Deus.*

*Caelitibus pia templa locas : ut plurima possis,*

*Quae numquam intereant, ponere, viue diu.*

I X

## EPITAPHIVM. HELENÆ...

quae in ipso partu mortua est.

**H**IC HELENÆ iacet, in partu quae concidit ipso,

Non secus ac pomis arbor onusta suis.

Concidit, & casu fetum concussit eodem.

Ille patrem moriens perculit, illa virum.

Vir miser, & pater infelix. vixisset vterque:

Aut saltē haec, soboli quae foret apta nouae.

Mortua tu quamquam non es dulcissima coniux

O mea, cui caeli ianua celsa patet.

Quod si aeterna tibi nostro quaerenda dolore

Gaudia erant, tanti nos doluisse fuit.

X

## EPITAPHIVM. BERNARDINI

Rosci.

**H**IC ILLE Bernardinus extinctus iacet.

Cognomine & re Roscius. quando fuit

Vtraque lingua, & carminis cultu potens

Pollensque praeter ceteros. fuit, fuit,

Eheu, fuit, non est. nisi esse dixeris.

Quem mortuum vix omnis aetas efferet.

Requiem precare lector, & felix abi.

X I

IN. ITVM VLO


cuiusdam.

**I**NTER mortales vixi moriturus, at inter  
 Caelestes aeno nunc meliore fruor.  
 Cuncta istic celeri labi pede concita vidi,  
 Hic fixo intueor firma manere gradu.

X I I

**AD. ANDREAM. BENCIVM**  
 germanum fratrem ex eadem So-  
 cietate Iesu vita functum.

**C**VM TIBI vita foret, frater carissime,  
 tecum  
 Optabam longas, & sine nocte, dies.  
 Ut mihi te nihil eriperet, non somnus, & esset  
 Terminus ut nullis dulcibus alloquijs.  
 Nunc contra incipiunt tacitae dulcescere noctes,  
 Quae mihi te reddunt luminibusq. meis.  
 Noui equidem. Mors te rapuit germana Soporis,  
 Et mihi germanus fert miseratus opem.



## XIII

IN. FVNERE. IACOBI. SABELLI  
Cardinalis.

OBIIT. IACOBVS. SABELVS. CARDINALIS  
Anagrammatismus

IDEO. VRBS. SANCTA. COLLABI. SIBI. VISA

**O**BIIT Sabellus Cardinalis optimus:  
Ideoq. visa vrbs sancta collabi sibi.

## XIV

In argumenta eiusdem illustriora duo,  
quorum alterum naus erat iactata  
fluctibus, cum hoc titulo. AGOR.  
NON. OBRVOR. alterum volans co-  
lumba, cum hoc.

VOLABO. ET. REQVIESCAM

**C**RMB A. volat pelago, volucris natat aethere  
in alto.

Vtraque caeruleum, qua pote, radit iter.  
Haec remorum alis fluctu supereminet, illa  
Remigio alarum nubila celsa secatur.

Nunc avis & naus requiescite: portus utrique  
Obtigit, & dubiae meta reperta viae est.

XV

De eiusdem columba  
VOLABO. ET. REQVIESCAM

Anagrammatismus  
CAELO. BEATORVM. QVIES

**R**EQVIESCE iam Sabelle, iam caelum  
tenes  
Caelo beatorum quies.

XVI

AD. INSIGNIA. F. HVGONIS  
magni magistri militiae Meliten-  
sis, & Cardinalis.

**H**INC Tyrius vertex, illinc argenteus ensis:  
Dat Petrus hoc, illud Paulus habere decus.  
Hoc belli insigne, hoc pacis: complexus vtrūque est  
Vnicus integrae religionis amor.

XVII

A. D. EFFIGIEM  
S. Hieronymi.

**R**VPE sub exesa curis confectus & annis  
Mollia contorto verberare membra domit.  
Tantum amor, & tuba, quae cineres animabie, & ossa  
Exciet ad summi indicis ora, valet.

D E



X V I I I

DE. IMAGINE. DEIPARAE

Ad Titianum pictorem.

**P**OLLICITVS fueras conspectu ponere in  
vno

Quae bona habet tellus, quae bona Olympus habet.  
Pinxisti Mariam, diuini & pignora ventris.

Soluisi pactam iam Titiane fidem.

X I X

DE. BEATISSIMA. VIRGINE

ex illis verbis Psalmi cxliij.

Domine inclina caelos tuos, & descende.

**O**RNARE insigni Mariam Deus ardet ho-  
nore:

Tanto oneri virgo se negat esse parem.

Hinc lis iucunda: an summis magis efferat ille

Laudibus, an de se sentiat illa minus.

Hic illam extollit, donisque ingentibus auge:

At se parte alia deprimit illa magis.

Maiorem facit hic, sese gerit illa minorem.

Certat, nec paribus certat vterque modis.

Hic trahit, haec rursus fundo se condit in imo,

Et sese innumeris despicit vsque modis.

In se tota abiit, penitusq. abstrusa recessit.

Hanc Deus ut vincas, vna relicta via est.

Si vis namque potes sublimem extollere, caelum

Inclina, caelo labere, victor eris.

D E.

X X

DE. EADEM. IN. CAELVM  
ascendente.

**A**LM A parens nato in caelum laetante rece-  
pta est.

Terra dolet, frustra: sed dolet illa tamen.

Non fuerat virgo terrae data, credita tantum.

Quae inuidia est reddi, cum repetita fuit?

Terrea debentur terrae, caelestia caelo.

Ill a quid in sancta virgine iuris habet?

X X I

DE. SS. BARPTOLEMAEO  
& Ludouico.

Quorum sollemnia Romae in  
eundem diem incurrunt.

**H**O S, quorum lux vna hymnos & gaudia iungit,  
Vna simul iungit gloria, & vna domus:

Vnica diuerso properata est tramite sedes:

Huic regnum, huic pellis fecit ad astra gradum.

Grande tulit pretium, si mentem expendis, vterque

Grandius at pretio munus vterque tulit.

Sideream nudo pellem caelum explicat illi,

Regnum illi melius dat sine fine Deus.

A D.

## XXII

AD. IMAGINEM. CONVIVII  
nuptialis in Cana Galilaeae.

**S**PRIMANTES veteri pateras haurite  
Falerno,

Quas aqua dat melius fundere iussa merum.  
Annuit oranti matri Deus: haud pote quicquam  
Non fieri, haec verbo si petat, ille iubet.

## XXIII

A.D. MAXENTIVM. MARTYREM  
cuius qualis mors fuerit ignoratur.

**I**GNOTVM est, per quae posuisti vulnera vitam,  
Dum Christum intrepida morte professus obis.  
Sed tamen & positam ferro, victumq. tyrannum,  
Et pictricem animam conscia fama refert.  
Martyr es. hoc satis est praestans tua nomine virtus,  
Nec martyr, qui non dura tulisset, erat.

## XXIV

A.D. EFFIGIEM. S. HAGNAE  
ex illis verbis Cant. cap. v.

Dilectus meus candidus & rubicundus.

**C**ASTVM casta agnū castae cōplectitur Hagnae  
Dextera, sed palmam laeua cruenta tenet.

Aspice ut amplexu fruitur pulcherrimus agnus  
Virginis, ut gaudet martyris esse sinu.

Lac illum & cruor oblectat: nam virginis atque  
Martyris est sponsus candidus atque rubens.

A. D.

X X V

## AD. EFFIGIEM. S. FRANCISCI

**T**E NE EGO Francisce aspicio, vel Chrifte?  
*tabella*

*Vna tuam effigiem reddit, & vna tuam.*

*Quod si Franciscus: nostrae monumenta salutis*

*Vulnera cur palmas, corq. pedesq. premunt?*

*Si Christus, quid vult onerosa lacerna, nec altam*

*Dulce crucem pondus pendula membra grauant?*

*Induit, vt video, Christi Franciscus, & ille*

*Francisci vultus: alter vtrumque refert.*

*Quid non mortales cogat diuinus? in vnum,*

*Non animos tantum, corpora conflat amor.*

X X V I

## A L I V D

**S**ANCTE patrum, spirans Christi expirantis  
*imago,*

*Tempore quam nullo deleat vlla dies.*

*Quas etenim fers ipse manus, fers ipse pedesq.,*

*Has tulit ille manus, hos tulit ille pedes.*

*Nec minus & tali transfixum cuspide pectus,*

*Quale tibi patulo vulnere pectus hiat.*

*Cuncta estis similes. illum qui forte verentur*

*Reddere, te saltem cur imitentur habent.*

## XXVII

DE. S. MARIA. MAGDALENE  
ad Domini sepulcrum Dialogismus.

**Q**UIDNAM hoc est? mulier. quid agit?  
sibi quaerit Iesum.

Quaerit? ubi? in tumulo. sed quid apertus? abit.  
Vivus abit? vivus. mulier sed mortua? sic est.

Cur? ubi non vitam repperit, emoritur.  
Spiritus aufugit? certe. quis reddet? Iesus.

Quando autem? cerni se simul ipse volet.  
Perfer adhuc mulier; tibi mortuus ecce renixit,  
Nec feret ut propter se moriari diu.

## XXVIII

De martyribus emblema.  
SILEX. FERRO. PERCVSSA

**I**CTA silex differt scintillas, & iacit ignem:  
Si non ista foret, frigida & atra foret.  
Dia fides vexata odijs, iactata periclis,  
Quae latuere pio pectore prodit opes.

## XXIX

TVS. INCENSVM

**T**VS honor est superis, odor est mortalibus, ut se  
Leniter in ventos explicuisse potest.  
Irrita sed spes sit tenues evadere in auras,  
Flamma nisi in nubem soluit odoriferam.

Castia

*Castâ fides terris grata est, gratissima caelo:*

*Hoc animos, illae fortia facta vident.*

*Nec memoranda aequae, quam cum pietatis amore*

*Splendet in accensis inuiolata rogis:*

*Laetus & in medijs martyr canit ignibus, Vror,*

*Vror, vt hoc Christi fragret odore domus.*

## D I S T I C H A

I

*Ad effigiem Christi redimiti spinis.*

**S***TAT* roseo, e spinis, capiti intertextâ coronâ,  
*Cur metuis spinas eliciture rosas?*

I I

*Ad Christum, dum cruci affigitur.*

**C***HRISTE* meus, cruce dum suffigere, crux  
*utinam sim,*  
*Vt mihi te numquam diuidat vlla dies.*

I I I

*De rupe Caietana, quae dirupta dicitur  
in domini nostri nece.*

**V***N**A* erat haec quondam rupes, nunc dissita,  
*montes*

*Interitum domini cum gemuere sui.*

I V

*Ad effigiem Christi domini, & B. Io.  
Baptistae puerorum colludentium.*

**L***V**D**E**N**T**V**M* speciem referunt puerilibus  
*annis,*

*Quos iuuenes morti dedere ludus erit.*

A D.

## V

Ad effigiem S. Petri.

**P**ANDE fidem chartis, caelū qui clauibus: ante  
Non patet hoc, rectam quam parat illa viam.

## VI

Ad effigiem S. Ioannis Euangelistae.

**A**LT A petit celeri penna, propiorq, tonanti  
Fulminat, innocuo fert aconita calix.

## VII

Ad effigiem S. Gregorij Magni.

**Q**VAE vigilata, Deo scribis dictante, legenda,  
Atque eadem nobis da facienda pater.

## VIII

Ad effigiem S. Francisci.

**V**ITA mihi est Christus, tulerunt cui vulnere  
mortem:

Horum ego perfosso corpore signa gero.

## IX

Ad imaginem B. Catharinae Senensis coram  
Christo cruci affixo.

**C**HRISTE ignis, signumque: ego cera: emol-  
lit ignis:

Cera dabit speciem signo inigente tuam.

## X

Ad vas aquae lustralis.

**H**AC quoties sacra frontem consperseris vnda,  
Fac subeat Christi quam dedit vnda latus.



## X I

Ad solarium matutinum.

**A**SPICIS hic primas orientis luminis oras  
Nescius occidui sera quid hora ferat.

## X I I

Ad effigiem S. Iuliani, cuius singuli vitae gradus  
circumiectis imaginibus exprimebantur.

Cervus saucius vaticinatur.

**T**EMPVS erit, ne accerse, tuo cū vulnere (mirum)  
Cervus ait, vitam fundet vterque parens.

## X I I I

Deiparam deprecatur.

**P**OPLITIBVS flexis, scelus hoc auerte, rogantem  
Audijt alma parens, admonuitq. fugae.

## X I V

Migrat e patria.

**C**ARPIT iter venator eques, patriāq. parentesq.  
Ignaros (pietas sic monet ipsa) fugit.

## X V

Excipitur a rege.

**E**XTERA regna subit profugus, regemq. salutat,  
Nec fore se indecorem datq. petitq. fidem.

## X V I

Ducit vxorem.

**V**XOREM ducit formaq. fideq. potentem,  
Quam Deus aeterno foedere rite iugat.

## X V I I

Eius parentes ad vxorem illo absente diuertuntur.

**E**XCIPIT hospitio soceros absente marito,  
Et thalamo coniux interiore locat.

M

De-

Decipitur a daemone.

**I** N V N C, crede tuae, coniux incaute, puellae :  
Dum procul es, iuuenem flagitiosa fouet.

X I X

Parentes interficit.

**A** H Q V I D agis? cur ignotū sine crimine (dudum  
Quod fugis) obruncas cum genitrice patrem?

X X

Poenitet parricidij.

**C** O N I V X, admisi facinus, renocabile non est :  
Sed tamen hanc culpam debita poena luet.

X X I

Trans flumen viatores humeris portat.

**S** T A T prope fluctifoni stagnantes fluminis vndas  
Trañciens pedites, inuvalidosq. leuans.

X X I I

Angelus Iulianum alloquitur.

**S** A T lacrimis poenaeq. datum : tibi culpa recessit.  
Haec Deus aligerum verba referre iubet.

X X I I I

Moritur.

**P** O S T varios casus caelestes peruolat auras  
Spiritus, in terris corpus inane iacet.

Finis libri quarti.

179  
FRANCISCI  
BENCII

E. SOCIETATE. IESV

ERGASTVS

D R A M A

*Ante distributionem praemiorum,  
in Gymnasio eiusdem  
Societatis.*

ROMAE, 11 I. Kal. Nouembris.

CIO. IO. LXXXVII



## DRAMATIS. PERSONAE

## PROLOGVS

---

 ROMANVS.      HOSPES

TROPHIMVS. HONOR

ERGASTVS.    VIRTVS

ARISTVS.      FAMA

PANVRGVS. GLORIA

CHORVS.       IVSTITIA

## P O E S I S

*EPILOGVS*



---

 PVER.      FAMVLVS. GLORIAE



# PROLOGVS

ROMANVS. HOSPES



ACRIS ENATVS lumina,  
 Illustrissimi  
 Saluete Patres. Principum clarum  
 genus  
 Saluete. Vosque ceteri, nostram  
 quibus,

Quaecumque sit dicenda, non visum est graue  
 Ornare vestra fabulam praesentia,  
 Et ludicris res serias postponere.  
 Nam ludicra audietis, ut moneam prius,  
 Ne forte quisquam conqueratur postea,  
 Nec digna vestris eruditis auribus.  
 Sed quis per hoc proscenium affectat viam?  
 Descende. HOS. Iuuenis, ne peregrinum aduenans  
 Hominem repelle, ne sit eiecto pudor.  
 ROM. Loquitur Latina lingua. HOS. Etruscum nescio  
 Nouitus hospes. ROM. At ista confidentia est,  
 Huc ire, & impedire rerum exordia.

M 3 HOS. Vbi

- HOS. Vbi irrita est modestia, interdum est opus  
Audacia. RO. Bona verba. HOS. Ne clama obsecro.  
ROM. Quis tu? quid hic negotij est tandem tibi?  
HOS. Audi parumper. RO. Audiam. Sed tu interim,  
Quaeso, hospes, id quod commodo fiat tuo,  
Descende. HOS. Nam quae humanitas? an nō vides?  
Nullus sedendi, nullus est standi locus.  
Ut reperem huc, vix tantulum inueni viae.  
ROM. Quid igitur hic facturus? HOS. Vt cūque audiā  
Tragoediā, quae est danda. RO. Nunc hospes, potes  
Abire. HOS. Cur? RO. Tragoediam nullam audies.  
HOS. At rumor est. ROM. Id Roma curat scilicet.  
HOS. Magnū agmen hodie vestium & clamydū ferūt  
Huc isse. ROM. Quippe pedibus incessit suis.  
Vbi hoc, quo operta est scena, sipparium rude  
Ponetur, ibi sese esse falsos sentient  
Multi, ut verendum, saepe ne explorent fugam.  
HOS. At quicquid est, tu temere ne extenuēs vide.  
ROM. Certe est tragoedia nulla, iam nunc desine  
Sperare. HOS. sed comoedia. RO. at ne istaec quidē.  
Ne quaere: numquā inueneris. HO. iam quod super  
Drama esse possit? quod? tragicocomoedia  
Commista vtrisque. ROM. Amicus es Plauto satis.  
Quasi alterum haud queat esse sermonum genus  
Aptum theatro. HOS. Satyra, Lucilius velut  
Varroq. Iambis scripsit olim taetritis  
Ad insequenda vitia propositum genus  
Comoediae priscae? RO. Hospes, antiquus nimis.  
Simplexq. mi videris: hos quisquam audeat  
Aut debeat reprehendere? HOS. At Mimos datis.  
ROM. Ca-

ROM. Capietur vt ne risus? haud mimi sumus,

Nec agimus histrioniam, quod tu putas.

HOS. Bucolica? RO. iam nunc maxime Italissas: meis

Me tectius saltem artibus circumueni.

HOS. Osci ne ludi quos celebret planipes?

ROM. Bona es memoria: instructus huc isti satis.

Scis fabularum nomina, & nostram tamen

Non repperisti. HOS. Querito. RO. Interea caput

Sic scalpe. HOS. Quid me ludis? an habendus diu

Suspensus esse videor? hic mihi rem explica.

ROM. Quam? HOS. quam rogabo. ROM. tu ordine  
vt rogitas, vide.

Praeter rogatum nil tibi respondero.

HOS. Quid hodie agetur hic? RO. dabuntur praemia.

HOS. Quibus obsecro? ROM. victoribus. HOS. Qui-  
bus artibus?

ROM. Quibus student: seu sit soluta oratio

Latina, siue vincta metrorum modis,

Siue Attica. HOS. at vicisse quos debent? RO. suos

Quique aemulos. HOS. Quo stadio? ROM. in hoc  
Collegio.

HOS. Etiam seuerioribus qui clasibus

Theologiae, Dialecticae, Philosophiae

Dant operam? ROM. at hi diuina poscunt praemia.

Et est labore quilibet laetus suo.

HOS. Quibus igitur? ROM. Praecepta qui primum  
hauriunt

Grammatica, & his, qui perpoliri litteris

Quae ab homine ducunt nomen, attenti student.

Et queis supremam rhetor imposuit manum.

M 4 HOS. Quod



HOS. Quod pace fiat omnium, qui nos vident,  
Et audiunt, doce alia, si vero placet:  
Cuncta haec sciendi iniectus est ardor mihi.

ROM. At tu tamen, quod pace dicatur tua,  
Es curiosus: ista tam subtiliter  
Fastidiosèq. excutis. Romam quasi  
Haec vna fuerit causa veniendi tibi.  
Aliena curas, vereor, excussus tuis.

HOS. Tu curiosum utcumque me vocites licet:  
Nō sum maleuolus. RO. audio. HOS. deinde est bona  
Nonnulla curiositas. ROM. quidam hoc ferunt:  
Et curiosos esse dicunt garrulos.  
Quicquid rogabis, expedi. at paucis roga.

HOS. In quot videntur esse qui munus petunt.  
Classes tribui? ROM. cuncta me scire haec putas?  
Sex septem. at haec tibi esse debebunt satis.

HOS. Nisi grauari, addatur hoc vnum super.

ROM. Age obsequar. HOS. quae praemia parantur?  
ROM. libri,

Et sumptuosi HOS. gaudeo. ROM. Quorsum rogas?

HOS. Domum ut reuersus cuncta narrem sedulo.

ROM. Nunc arbitror tibi prorsus est factum satis.

HOS. Satis. tibiq. maximas grates ago.

Manere liceat. ROM. liceat. HOS. Expectatio  
Me magna vestrae fabulae, ut fatear, tenet.

ROM. Huc vade, post aulaea tum tacitus sede.

Tibi, ut redibo, forsitan orabo locum.

Quid hic agendum, quidve dicendum foret,

Procefferam dicturus: at nostro hospiti,

Dum vellicatim singula requirit, modo

Dixi

Dixi omnia, vt superesse iam possit nihil,  
 Praescisse quod vos deceat. hic omnes precor,  
 Quando quid hoc sit fabulae cognoscitis,  
 Maiora quoniam haud licuit in praesens dari,  
 His, quae, vt fatemur, parua sunt, ignoscite.  
 Quod si placere haec ipsa non possunt, tamen  
 Placeat placendi studium. at increpuit rudens.  
 Velum arbitror demittitur, & exit foras  
 Qui narret argumentum. adeste, attendite.



## ACTVS PRIMVS

TROPHIMVS. ERGASTVS

ARISTVS



*ETA caeli templa, fidereas  
domos,  
Quo pandit animi robur, ac Pie-  
tas, viam,  
Dudum relinquens, has colens  
terrae plagas,*

*Quas Mors Laborq. sorte communi tenent,  
Adsum minister fidus aeterni Patris:  
Illa e cohorte, quae triumphantum choris  
Permissa laetis, gaudet, & sacrum Dei,  
Ebria tuendo, & ipsa vix compos sui,  
Lumen tuetur semper, & semper canit  
Laudes Parentis ore ter geminas pio.  
Mox iussa praestolatur, vt curet frequens  
Igne impotente citius, ac volucris Noto.*

Caelestia

Caelestis adsum spiritus, cuius leuem  
Nemo adspiceret imaginem, aliena forem  
Ni crassiore amictus : hoc circumdedi  
Aptum videri corpus, & tangi manu,  
Hominum saluti ac dignitati seruiens.  
Neque hoc pudendum, nec recusandum mihi,  
Aut Haelitum cuicumque : cum mentem subit  
Memoranda vis amoris, exemplo & modo  
Votoque maior, illa, quam natus Deo,  
Deus ipse, caeli genitor, ac terrae sator  
Ostendit, vltro amplexus humanum genus :  
Hui ne insita animo pestis, & patrium scelus  
Instar veneni diditum, mortem daret,  
Indutus hominis ora, quae numquam exuat,  
Sanguine medelam peperit, & vitam nece :  
Hominemque, quem condiderat, vt paruo gradu  
Nostro ordine minor esset, excelsum supra  
Omnia, locauit in poli fastigio,  
Quod nostra mens defixa, ne attingit quidem.  
Ergo, quod auctor omnium, & rector Deus,  
Qui capite caelum superat, & terram premit  
Pedibus trementem, appetijt, hoc famulus sibi  
Neget decorum, nec magis rapere occupet?  
Quod ille quondam corpus adsciuit semel,  
Numquam relinquet : ipse tam spatio breui  
Nube hac caua grauabor? O vtinam mihi  
Liceret etiam sanguinem, & vitam super,  
Per tela & ignes, fundere : imitarer meum  
Vtrumque regem. nunc enim tantum bona  
Superest voluntas: sed voluntati comes

Desit

Desit facultas: illud haud fieri potest:  
 Hoc quod potest, debetq. per me ipsum geri.  
 Geratur usque: debita vt soli Deo  
 Deus offeratur gloria, & castas beet  
 Pax alma terras, plausus accedat recens  
 Superum theatro, si quis infami iugo  
 Tyranni, & atro carcere, immundo & luto  
 Emersus alte, vindicet sese sibi,  
 Soluatq. vincla, & lacrimis culpas luat,  
 Veterem perosus, ordiens vitam nouam.  
 Haec nostra cura est omnium, hic omnes habet  
 Iucundus ardor, quotquot e caelo Deus  
 Hominum ministros voluit, & fidos viae  
 Comites, ducesq. dum per obstantes dolos,  
 Per falsa rerum gaudia, & inanes metus,  
 Hereditatis commoda, & iura occupent  
 Salutis almae, vt filij, si quos Pater  
 Dilexit aequus, antequam Solis iubar  
 Iussas per umbras orbe fulgeret nouo,  
 Quem stupuit alta e nocte disclusum Chaos.  
 Instamus omnes muneri, & prouinciam  
 Quam quisque nactus, quisque procurat libens;  
 Hoc laetius, quod iussa dum summi Patris  
 Haurimus omnes, ille sese singulis,  
 Qualis videri & quantus in caelo solet,  
 Offerit videndum. Munus hoc cessit mihi:  
 Permissus olim, lumen vt vidit, puer,  
 Stemmate parentum nobili, & claro satus,  
 Est primo ab ortu Ille ipse nunc exit foras.  
 Abibit, vt me hic esse primum senserit.

ERG. Alios.

ERG. *Alios, vt aiunt, vxor exturbat domo,  
Fumus alios, me frater: hic lacrimas ciet,  
Quam fumus acer, acrius: querulus magis  
Nausistrata quacumque, vel si quam vetus  
Descripsit olim fabula: vt satius putem  
Vel auribus carere, vel certe domo,  
Ne obtundar vsque iurgio. Ecce autem alterum.  
Vitasse fumum credidi, in flammam incidi.  
Vbiuis manere est melius.* TRO. *Haud aliter fugie  
Trepidus pauensque, quisquis horrentem iubis,  
Offendit anguem. Certus huic custos datus  
Assiduus haesi, & sedula vt nutrix, dies  
Noctesq. foui, reppuli, si quod malum  
Ipsi imminebat noxium. Saepe vt solene  
Multa imminere nescijs mortalibus.  
Morbos abegi plurimos, casus videns  
Caecos, ne obsessent, arcui: & menti, & manu,  
Nec cogitanti plura suggessi bona.  
Quando ille monitis paruit, quae clam dabam,  
Annis tenellis, laetus instinctu meo  
Vincebat alios indole, & terrae velut  
Purus serenum Lucifer spondet diem,  
Prope vitae in ipso limine, ingenti suis  
Spe praenitebat posteris, aetas simul  
Firmata vires ferret, ac faceret virum.  
O vana mens mortalium. O numquam grauis,  
Auraq. semper leuior, & Ponti freto,  
Quod feruet aestu, & turbine, exundans magis.  
Res magna, quam narrare non quisquam queat,  
Ventos laceffens aquila, per caelum citis*

*Euecta*

*Eucta pennis : coluber incedens leui  
 Per saxa lapsu, marmore in leui, sui  
 Nullum relinquens corporis vestigium :  
 Denique, per vndas pinus & spumas ruens  
 Pelagi tumentis. Sed quid haec tandem tria  
 Vnam ad latentem, & penitus ignotam viam  
 Iuuenis procacis, cuius occipiens modo  
 Ver molle, non dum flore vestierit genas?  
 Difficile quantum est regere iuuenilem impetum.  
 Ut ventum ad annos, esse quos iuris sui  
 Putant iuueni, & ruere certatim student,  
 Nullo parentum, vel magistrorum metu,  
 Plerumque, qua facilior & praeceps via  
 Trahit volentes, consili expertes boni :  
 Nisi opprimatur illico existens malum,  
 Ne longiore robur accipiat mora :  
 Primum esse tardus coepit ad monitus meos,  
 Mox insolens, dein surdus : atque alias agens  
 Res, nostra temnit verba : nec quidquam magis  
 Timere videor, quam malos hostis dolos,  
 Qui simplicem vsque captat adolescentiam,  
 Ut in barathrum, & Mortis imperium trahat :  
 Id ipse metuens, & hominum moris memora,  
 Qui sensibus persaepe se duci sinunt,  
 Velut oculis sit habenda, non menti, fides :  
 Hominis figura tectus, vltro me obtuli  
 Huius parenti, liberorum ceu ducem,  
 Quos ipse geminos vnice caros habet,  
 Non aequae amandos : vnus mentem tenet  
 Virtutis ardor inclytæ. En ipse huc venit :*

*Germanum*



Germanum opinor quaeritat. ARIS. Quo te miser,  
Quo te abdidisti frater? has quaeram via?

An hac? an illa? TRO. Ariste fratrem quaeritas?

ARIS. Ipsum magister, aedibus dudum exijt

Iratus. TRO. Age iam redijt: inuenies domi.

Sed temperatius agito. ARIS. Faciam vt mones.

TRO. Hunc ipsa Virtus compede aurata tenet

Arcte reuinctum: iuuenis hanc vnā piē

Amat colitque. haud fertur affectu pari

Meus alter. hunc monere germanus solet

Habere cupiens aemulum, exemplo, & prece:

Sed lentus ille, praepete & pleno gradu

Refugit rogantem, & antecedentem sequi.

Virtutis hanc esse arduam clamat viam,

Notamque paucis, asperam, angustam, horridam,

Imperuiam, & feris inexuperabilem:

Contra, hanc dolosae quam Voluptatis videt,

Mollem, expeditam, plurium vestigijs

Tritam, ac patentem. Caecus obstruxit furor

Aures iuuentae: hunc pēllere vrgemus duo;

Nec vincimus. Tu summe cunctorum Pater,

Qui iusta numquam vota frustraris virum,

Ades rogate, vtriusque conatum iuua:

Ne gaudeat praeda hostis, & caelum nouis

Auctum triumphis, gratiae sensum nouae

Testante mente, gratias dicat nouas,

Similesq. menti vocis ingeminet sonos.

## C H O R V S.

**I**NCLYTVM Caeli genus, o beati  
Principes, summi Patris administri,  
O quibus mentem Deus ipse claro

Lumine complet.

Sive conatum furialis hostis,

Qui Deo sese similem ferebat,

Pellitis regno, Michaelis almi

Signa secuti.

Sive ter circum triplici corona

Sistitis regem dominantis aulae,

Exequi ardenti subito parati

Pectore iussa.

Sive compressis reuerenter alia

Sacro ab obtutu faciem tegentes,

Ter iuuat cantu geminante easdem

Dicere laudes.

Seu magis terram, miserosq. terrae

Incolas, prompti studijs fouetis,

Et manu prensos comites ad altas

Ducitis arces.

Estе felices, memoresq. nostri:

Supplices sic vos homines precamur,

Vno vt exemplo polus atque tellus

Seruiat vni.

Tu potens rerum sator, atque custos,

Qui supra celsum resides Olympum,


Caelitum coetus hominumque firmo

Foedere vinci.


ACTVS



# ACTVS SECVNDVS



ERGASTVS. ARISTVS



**S**EMPER ne eandem fabulam

surdo canes ,

Semper molestus , semper infestus  
mibi ?

Numquam ne , per te , vtrique mi-  
nuetur labor

Iterata toties verba fundendi tibi ,

Mihi audiendi ? Tolle consilium ac preces .

Mitte ista tandem dicta . ARIS. Quin frater magis

Mitte ista tandem facta . Si menti est graue

Audire me , te respice : haud dignus tuae

Pueritiae exitu hic orsus adolescentiae .

Quis te puer modestior ? de quo fuit

Spes maior vnumquam ? cuius incensum magis

Ardore honesti pectus ? vnde istaec tibi ,

N

Et

*Et tam repens mutatio? Ad te ipsum redi.*

**ERG.** *Redeam: quasi abierim ad alios: nuper fui  
Iuris alieni, timidus & caecus puer,  
Horrensque nutum, & nomen irati patris.  
Iam tandem aperta lumina: & catulis licet  
Late euagari qualibet. factum est diu  
Quod suasit aetas illa: nunc aetas mihi  
Mensque alia: quaero seria, abieci nuces:  
Parere par est tempori. puerum metus  
Pudorque, iuuenem pulchra libertas de cet.*

**ARIS.** *Quaeruntur ecquae seria? apricae plagae,  
Campi virentes, fontium dulcis liquor,  
Colles amoeni, floribus ridens nemus,  
Equi, canesque: haec illa libertas tua.  
Quin ea magis curanda: doctorum scholae,  
Praecepta vitae, dicta sapientum virum,  
Quibus paratur gloria, & verum decus.  
Longam iuuentam iuuenis & vitam cupis?  
Viuas senectae oportet ac mortis memor.*

**ERG.** *Cane ista sapiens grandibus, longa viris  
Aetate fessis: hi senectutis malum  
Sermone vario leniant totos dies;  
Quibus voluptas omnis aeuo evanuit  
Dilapsa ad aures. Alia sunt iuuenum bona,  
Quibus fruendum iugiter. Quisquis sapit  
Diem ante, desipit.* **ARIS.** *Et tamen dulcis mihi  
Aetate in hac (habenda Superis gratia)  
Sapientiae amor & cultus.* **ERG.** *Haud mirum, tibi  
Si dulcis est: de ventre materno, ut ferunt,  
Tyrrhenus alter, Cycnus alter Troicus,*

*Canum*

Canum extulisti verticem. Es natus senex  
 Ariste: nobis, antequam simus senes,  
 Iuuenibus esse contigit. ARIS. Vereor, senex  
 Ut sis, miselle: neve, ni facti pudet,  
 Ferare praeceps, vnde prolapsum pedem  
 Extrahere nequeas, mersus in vasto specu.  
 Videor videre, Ergaste, nec longa est mora,  
 Cum meque, teque, saepe, frustra que, & diu,  
 Clamabis: heu, te mentis expertem bonae,  
 Et me malorum, quae tibi impendent, miser,  
 Verum augurem fuisse. Iam crede haec mihi.  
 Non veriora Pythia. ERG. Ecquando tibi  
 Tripodi insidere licuit? Ecquando specu  
 E Delphico es progressus? O vatem nouum.

ARIS. Etiam ne rides? fascinauit te, reor,  
 Malignus aliquis, frater. ERG. Ad laudem tibi  
 Praefiscine addebatur: haud potuit mala  
 Vmquam nocere lingua. ARIS. Nam cur te, rogo,  
 Vitae prioris poenitet? ERG. Vitam vocas  
 Plenam laboris anxij, & curae, & metus?  
 ARIS. Merces decorae iusta Virtutis labor.  
 Virtus beatae Glorïae & Honoris parens.

ERG. Vmbram esse quamdā gloriā, & honorē, leuē  
 Auram, magister docuit. Haud istaec moror  
 Ventosa, nihili nomina, & nugas meras.

ARIS. Haec, scilicet, quam nebula nubifero tulit  
 Inflata partu, & vulgus ignarum fouet.  
 Ast alia solida est Gloria, & Honoris soror,  
 Virtute nata: cuius effigiem semel  
 Si fas tueri, frater, oreretur statim

De visu amor, de amore potiendi bono  
 Ingens cupido. Quin & obstaret nihil,  
 Quo minus ad alti montis erectum iugum  
 Celer euolares. ERG. Euolem? est alis opus.

AR. Amor addet. ERG. At tu Persea inuenias licet,  
 Me terret Icarus. Adde quod tardum gero  
 Nec volucre corpus. ARIS. Tollet elatum velut  
 Quadrupes superbus, certus & patiens labor.

ERG. Quidni? futurus ipse Bellerophon eques:  
 Metuo Chimaeram. ARIS. Tute quam fingis tibi.  
 Quid fabulas eloqueris? ERG. Est par pro pari  
 Nempe referendum. ARI. Fabulā pulchrū putas  
 Virtutis almae verticem, & mentis bona?

ERG. Haec quippe non est fabula: haec lenis via,  
 Opaca, facilis, quae vel aspectu queat  
 Hilarare mentes. Cernis, ut spirant leues  
 Fauonij, ut viridem arborum sensim comam  
 Auibus canentum ventilant? flores vident?  
 Et hinc, & hinc, ut dulce certatim croco  
 Tyriae colorem purpurae, ut purae niui,  
 Quam cana pandunt lilia, rubentes rosas,  
 Violas ligustris, aureas ferrugini  
 Miscere gaudent stellulas? rursus vident?  
 Ut laxat hinc, hinc colligit tellus sinum,  
 Hac tollit, illa parte demittit caput  
 Redimita cultis collibus? vident? ut vires  
 Nemus omne, & illa e rupe montana cadit  
 Fons obstrepens, ipsoq. lucidior vitro?  
 Ut ad lapillos molliter frangens aquam,  
 Flexu recuruo, gramine in picto vocat

Placidum

Placidum soporem? sensui vt semper sua  
 Omni est voluptas? ARIS. Qualis hac specie latet  
 Et quanta pestis. ERG. Sed voluptatem palam  
 Hic conspicio: de peste, si quando caput  
 Forte efferet, tunc videro. Haud deerit malo  
 Medicina aperto. Stultus est certus timor,  
 Ni certa paret causa. Cur metuis rosas,  
 Timorque nullus sentibus ab istis tuis,  
 Qui se offerunt videntibus? ARIS. Nescis boni  
 Sit quantum in illis. ERG. Nescio: at acutis rubi  
 Vepribus teguntur: densa tribulorum seges  
 Custodit aditum: & sicut immitis canis,  
 Quam saeva rabies improba instigat fame,  
 Hiante semper rictu, & exerta gula,  
 Vulnus minatur dentibus. At vni tibi,  
 Credo, hospiti, notoque, non parceret modo,  
 Sed lambet etiam crura: sudabit statim,  
 Vbi te te adesse senserit, tellus, recens  
 Cum melle amomum: fiet extemplo rosa,  
 Quacumque laetum fixeris felix pedem.  
 ARIS. Vin tu periculum facere? Mihi certū est viam,  
 Quamquam ardua est, tentare. Vin frater ducem  
 Me consequi? vel praeire? ductorem sequar.  
 Heroēs hac iere. ERG. Nos numerus sumus.  
 Tu maior es. Praeire maiorem decet.  
 Premenda sunt consilia. Magne heros vale.  
 Caue, ne vbi alte ascenderis, & alte cadas.  
 ARIS. Solus relinquer. Adiuvā audentem Deus.



## ARISTVS. PANVRGVVS

**Q**UID hoc? labascit animus, & pigrum gelu  
 Per ima currit ossa: properantem gradum  
 Quis prohibet vltra ferre? cur torpent pedes,  
 Tremuntq. genua, & corpus ignauum stupet?  
 Quae me vmbra, quae me pellit inuitum retro  
 Infesta dextra? quis horror arrexerit comas?  
 An est loci relligio? an antiquus dolos  
 Intentat hostis, fingit & vanos metus,  
 Vt arceat tyronem in ipso limine?  
 Sic est. Magistri dicta nunc repeto memor,  
 Quae fixa mente semper haeserunt mea.  
 Quandoque Ariste ad summa Virtutis iuga  
 Tentabis aditum, prouide & caute tuam  
 Rem perage, te ad pericula & pugnam para.  
 Haec ille. Mecum haec ipse voluebam, malo  
 Non cedere vlli certus: haud coepti piget.  
 Nunc nunc parato pectore atque animis opus.  
 Nihil agis amens vmbra: me nullus labor,  
 Me nulla terrent monstra: sunt dudum mihi  
 Prouisa cuncta. Persequi hanc certum viam,  
 Qua me (rogo equidem) ducit, & firmat Deus.  
 Duce hoc, per ignes ibo, & horrentes nigrae  
 Mortis per vmbra, vlla nec metuam mala.  
 Per horrida & inaccessa mihi pandam exitum.  
 Sed quis, per haec dumeta, per spissam nemus  
 Ingressus est? Per inuium nulla est via.  
 Heu sentibus conuulneror: sanguis fluit.

Quam

Quam paene pes immersus euelli nequit.

*PA.* Sine adiunē te *Ariste.* *AR.* Quae vox hinc sonat?

Quis nominat? quid hominis ignotum mihi?

*PAN.* Socius parentis, hospes antiqui laris.

*AR.* Nomē? *PA.* Panurgus. *AR.* Omē auertat Deus.

Numquam ante visus. *PAN.* Visus at fratri tuo,

Et saepe. Nam quae vulnera absterges manu?

*AR.* Statui subire ad verticem. sed me truces

Spinae repellunt primo in aggressu. Tamen

Semel est eundū. *PA.* Stulte, quo adscensū paras?

An ad ruinam? Fallit incautum tua

Te mens amice: septus est omnis rubis,

Per crebra saxa, & inuias rupes, locus:

Et quo magis processeris, clausus magis,

Sese inter implicantibus nexu graui

Caecoque siluis: laqueus inicitur pedi

Capitique, tortu vbique multiplicabili:

Praeceptsq. lapsus vndique & Mors imminet.

Nam paululum si erraris, aut fallat gradus,

Actum est: peristi. Cernere hinc certe licet

Campos sepultos insepultis ossibus

Iuuenum, senumque, & magna cupientum virum,

Amentiae dedere qui poenam suae.

*AR.* Perinde loqueris, atque lustrata haec diu

Oculis fuissent omnia. Ecquando pedem

Tute intulisti? eloquere. *PAN.* Men casus iubet

Renouare acerbos? *AR.* te rogo. *PA.* Et possim tibi

Quicquam roganti deesse? *AR.* Sed quorsum pedes

Talos ad imos veste deducta regis?

*PAN.* Fui, fui: nec quispiam ex illis fuit,

N 4 Quibus

*Quibus manere, aut scandere exin contigit,  
Sedere sede celsiori dignior.*

*Verum repente exturbor: & fractus pedes,*

*Laesusq. membra, & ora turpatus luto,*

*Vallem sub imam decidi, & nigrum lacum,*

*Vno impetu: quoq. altior vertex erat,*

*Grauiora sensi. Parce causam quaerere,*

*Aliena sed te exempla quid doceant vide.*

*Fruere luventae commodis: aetas fugit*

*Amni fluenti similis, atque umbrae leui,*

*Reditura numquam. Viue, dum viuus, memor*

*Mortis ruentis. Vnus est vitae dies,*

*Neque ille longus: sequitur aeternus sopor,*

*Noxque una Mortis. Multa quid caecus breui*

*Iacularis aeuo? carpe praesentem diem:*

*Rosisq. frontem incinge, ne arescant prius.*

*Incerta certis, crastina hodiernis, bonis*

*Mala anteferre, vanus & stultus labor.*

*Gaudere tantum est hominis: hoc potuit suum*

*Dixisse, quod laetata mens hausit semel.*

*Vigeat Voluptas cetera, & curae, & dolor.*

*ARIS. Hei compta timeo verba. Blanda oratio*

*Dulce est venenū. PAN. Temere nil metui decet,*

*Ni sis probando expertus. AR. Haud tutū est malū*

*In se experiri. PAN. Quicquid ignoras bonum*

*An sit, malum ne dixeris. AR. Quicquid malum*

*Ne sit timebo, haud fecerim. PAN. Experto fides*

*Seni est habenda, o iuuenis. ARIS. Ignoto fides*

*Panurge nulla habenda. PAN. Tu ignotum vocas*

*Socium parentis? ARIS. Ante non visus, mihi*

*Ignotus*

Ignotus est. PAN. Consilia quae dedimus modo  
 Probant amorem. ARIS. Nulla peiora inuidus  
 Dedisset hostis. PAN. Consulo vitae tuae.

ARIS. Ego dignitati. PAN. Iure ne irascar vide.

ARIS. Timenda non est ira, qua infirmus timet.

PAN. Infirmitatem stulte ne obiecta mihi.

ARIS. Laesisse verbis, foede, non rebus potes.

PAN. Sed foedus, atque infirmus, experiar minas.

ARIS. Frustra tonabunt virium expertes minae.

PAN. O si quid hoc sit roboris, scires puer.

ARIS. Ut ista temnam cuncta, si scires senex.

PAN. Nihil timere, aetatis est vitium tuae.

ARIS. Tuae, minas iactare, cum frigent preces.

PAN. Es solus, & per sola nil metuis loca?

ARIS. Qui me adiuuat, facit esse securum Deus.

PAN. Sequere hac inepte. ARIS. Ten ducem in-  
 cautus sequar?

PAN. Manu prehensum traxero. ARIS. Haerebo tamē.

PAN. Cogere. ARIS. Frustra. PAN. Quid agis?

ARIS. Iratum intueor.

PAN. Rides? ARIS. Dolentem. PAN. Quis tibi  
 hos animos? ARIS. Deus.

PAN. Iam poenitebit. ARIS. Ferte caelestes opem.

## TROPHIMVS. ARISTVS

**Q**UIS hic? quis hic tumultus? o facinus ferum.  
 Propera proterue in Noctis aeternae Chaos,  
 Mergere profundo in carcere, assiduus mali  
 Auctor, reusque, & ultor: hic iusta preme  
 Poena nocentes, poena tu sceleris tui.

Quis

*Quis iste Ariste pallor infecit genas ?*

*Quis horror? animum recipe: quid cessas loqui?*

*ARIS. O quam mihi opportunus aduentus tuus,*

*O dux, comes, magister, & custos meus.*

*Sed quo ille? TRO. Saeuas Orcus eructans faces*

*Repente mersum gutture abripuit nigro.*

*Quid ille te? quae rixa? quis clamor fuit?*

*ARIS. Is me beatæ celsa Virtutis iuga*

*Petere parantem, iamque nitentem gradu,*

*Amicum simulans, voce, consilio, ac prece*

*Avertere est conatus. Vbi demum videt*

*Coepti tenacem, offensus, intentat minas*

*Toruum intuens: haud terreor. Tandem truci*

*Flammatus ira, inijcere tentavit manus,*

*Vt me retractum ad ima præcipitem daret.*

*Sed me benignus ille respexit Deus,*

*Qui velle me, quod voluit, vt possim dabit.*

*TROPH. Huic gratias age maximas summa fide,*

*Semel tributi muneris semper memor.*

*Quando his periculis vitæ, & his anfractibus*

*Mortalis æui, senta per tenebris loca,*

*Menti coruscum prætulit lumen tuæ.*

*Quodque inchoatur, quodque perficitur, boni*

*Ipse inchoator, ipse perfectior Deus.*

*Bonum omne ab illo. Sed vbi germanus tuus?*

*ARIS. Vbi me paratum vidit haud dubio gradu*

*Superare montem, abscessit: atque illud suum*

*Tenet obstinate, vt dulcius ducat nihil,*

*Quam quod Voluptas monstrat ignavis iter.*

*TRO. Tu perge, cui mens melior. & coeptum graue*

*Ne*

Ne desere: & saxeta, & horrentes rubos

Peruince fortis: laxior sensim tibi

Minusque dura fiet instanti via.

Grauis insolenti, leuior assueto est labor,

Et ferre semper gaudia exhaustus solet:

Qualisque nubes Libyca discursu leui,

Fugat timentes improbe, audentes fugit.

Quamquam ipsa Virtus quamlibet magno est peti

Labore digna: cetera vt desint, sibi

Se digna merces. Perage quod certum est iter,

Nec cede retro inglorius. Turpe hoc quidem

Iactasse verbo, dura sit quamuis via,

Velle ire, nec redire voti compotem.

Ne rideat te frater, & vanum vocet:

Cui debeas ne turpe ludibrium caue.

ARIS. Memorem mones magister. Ast illum tamen

Mallam incitatum. TRO. Forsitan doctus malo

Consilia referet in melius: & te sequi

Optabit ultro. Aerumna frangit spiritus.

ARIS. Vtinam Deus ita faxit. errantem rege.

TROPH. Labor iste meus Ariste. Tu feliciter

Hoc age, quod agis. haud metue confisus Deo,

Qui pulchra semper molientes adiuuat,

Nec deserit, nisi antea desertus est.

Precare, & aude. Numen in dubijs voca:

Aderit vocanti. ARIS. Funge tu nostris tuas

Preces magister, optimo rerum Patri

Hoc gratior, quo melior. TRO. I fausto pede

Quo mens vocat Deusque. non paruum feres

Parui laboris praemium. Virtus viden

Quam

Quam gloriosa decora praetendit manu?  
 Quocumque vocitat illa, conuerte huc gradum  
 Celer, & vocanti obsequere: nec durum puta  
 Per confragosa nemora & anfractus sequi.  
 Spes praemij laboris est solatium.  
 Extende gressus strenuos, lumen retro  
 Numquam reflectens: spatia quae restant, modo  
 Superare disce. Nil volenti est arduum.  
 Conare. Prima aggressio est acerrima.

## A R I S T V S

**R** V R S V M inuocote Rex Superum, & homi-  
 num Parens.

Durum. at ferendum. pungit. urgendum est magis.  
 Eheu premor. non opprimar. densa hic seges  
 Est veprium. calcentur. e plantis cruor,  
 E fronte sudor liquitur. sudor, cruor,  
 Labor, pericla, pulchri honoris praemium.  
 Quamquam ille paruo constitit. nec caro emi  
 Aeterna possunt. Morte venale est decus,  
 Quo petitur Immortalitas. Clausum est iter,  
 Omnisq. septus aditus. emergam. via  
 Vi fiet. Inuia nulla Virtuti est via.  
 Hic est vorago abrupta, & in praeceps patens,  
 Vix transitum dat. Quam prope a casu abfui?  
 Sed quanta moles restat? enitar diu  
 Multumque, quod fecisse si detur semel,  
 Semper iuuabit. Iamque deficiunt pedes,  
 Vigorque. Vincit animus. At tandem tamen  
 Defessus



*Defessus hoc in rupis exesae cauo,  
Medius labores inter exhaustos modo,  
Et hauriendos proxime, paruum moram  
Traham sedendo. Vt dulcis est fesso quies.*


## CHORVS|

**D**<sup>V</sup>LCIS malarum solitudinum,  
O Somne, portus, perfugium, & quies,  
Qui fessa viuentum labore  
Membra leuas, animosq. curis.  
O fluctuantis murmura pectoris  
Aurae benignae munere qui premis,  
Et sensibus vincolo ligatis,  
Corda hominum resoluta laxas.  
Frater quietae Mortis, & Otij  
Felix minister, quem fugiunt truces  
Morbi medentem, aequantem egenos  
Diuitibus sequitur Voluptas.  
Huc lenis, huc te fer tacito pede  
Obliuiosis abdite nubibus,  
Et irriga blande natantes  
Sensim oculos, operique nocte.  
Mox excitatus deinde negotia  
Ad ipsa surget strenuus, & viam  
Insistet inceptam, a labore  
Artubus atque animis refectionis.





# ACTVS TERTIVS



## ERGASTVS



*XCIVSSA tandem fratris im-  
portunitas.*

*Equidem verebar saepe, ne op-  
pressum diu*

*Non mitteret, ni traheret in ma-  
gnum malum.*

*Non secus hirudo corpori admoto tenax*

*Haeret, premitque bibula, nec prensam semel,*

*Cruore ni sit ebria, amittit cutem.*

*Et ille forsan prodigus vitae suae,*

*Nubes honoris, & poetarum sequens*

*Nugas canoras, se per angustam viam,*

*Per senticeta & saxa coniecit; miser.*

*Gustanda in ipso flore tibi dulcis fuit*

*Vitae voluptas; frater. At tu desipis,*

*Malumque curis addis, & curas malo.*

*O misera sors mortalium. O hominum genus*

*Rerum*

Rerum miserrimum, & miseriarum vltimum.  
 Quae pars dolore vacua? quae cura caret  
 Pars vitae acerba? Nascimur: ab ipsis statim  
 Vitam auspicamur lacrimis & fletibus.  
 Et est nouum mirumve, si qualis fuit  
 Ingressus, idem reliquus est aevi tenor?  
 Lugemus, hoc Natura nos primum docet.  
 Quae culpa porro nostra? quia nati sumus.  
 Mox vincla nexu corpus astringunt, recens,  
 Tenerum, caducum, aliena ni firmet manus.  
 Tandem labore plurimo emergit suae  
 Ad sensa mentis voce propemodum, puer,  
 Casus per omnes. Hinc magistro tradimur  
 Tristi, seuero, duro, inexorabili,  
 Chirona qualem est Aeaci nactus nepos.  
 Neque hoc sat est: assiduus accedit comes  
 Custosque, saeuus, toruus, attentus, sagax,  
 Et supicax, & perspicax. Argum putes,  
 Centena cui stent lumina, & oculo caput.  
 Quid iurgia hic minasque? quid virgas truces,  
 Crudelius, quam Tantalo saxum improbum,  
 Dicam imminentes? Omnia expertus loquor.  
 Est temporis nunc tantulum, vt possim meo  
 Saltem arbitrato viuere abiecto metu.  
 Dum se Iuuenta pandit, & pingit rosas.  
 Aestas sequetur proxime, & (ventus nisi  
 Afflarit ante messem, & interfecerit)  
 Erit opibus danda opera, nec deerunt graues  
 Aestus laborum, & laeta quae numquam fuit,  
 Nox ambitus, & aula curarum ferax.

Nam

Nam quod Senectae bruma, quod capitis rines  
 Frigus ferunt, geluque? quam noctes nigras,  
 Quam nube tectos, Sole viduatos dies?  
 Natura sequitur dira, morborum feris  
 Succincta monstros, fertq. terrificum manu  
 Vltrix flagellum, & aëris alieni admonet.  
 Quod ni receptet illico, fenus petit.  
 Hinc luminum, illinc aurium, sensum exigit,  
 Illinc vtrumque: & saepe quos dudum dedit,  
 Artus reposcit, donec vmbra mortui,  
 Vivum cadauer, reddat exanguem senem.  
 Haec illa lux mortalium: hic vitae dies  
 Inter sonora nubila, & avaros Notos.  
 Haec me vicissim sorte partita premunt.  
 Sed nimbus hinc detonuit: hinc alter legit  
 Ventos, vt imbre laeta prosternat sata.  
 Neque hoc sereno, & tempore oblato fruar?  
 Fruar. decet, libetque: nec quisquam vetat.

## T R O P H I M V S . E R G A S T V S

**E** R G A S T E, quo te, Ergaste? E R G. Quis re-  
 uocat? (malum)

Magister est. Incommodum semper virum.

Mirabar hoc si abiret, vt possem mihi

Vacare. Salue. T R O. Det Deus mentem bonam.

E R G. Non alia diceretur amenti salus.

T R O. Quid solus hic? E R G. Nunc esse, nunc solus mihi

Videbor, ante non fui. T R O. Quis tecum erat?

E R G. Ego ipse. T R O. Fac vir iste sit saltem bonus.

E R G. Talem

ERG. Talem esse semper credidi. TRO. Raram fidem.

Ante tibi esse cognitum, adolescens, putas?

Nihil est magis difficile. ERG. Tu Sapientia,

Etiam ne verba funditas? TRO. Nimium es serus

Ergaste factus. ERG. Esse me talem decet.

TRO. Non tamen oportet. ERG. Ista iam pridem puer

Satis tuli, timuique. TRO. Nunc vero es senex.

ERG. Quicquid sit, aetas postulat mores novos.

TRO. Aetate in omni est moribus sanctis locus.

ERG. Numquam ne vocum fuerit istarum modus?

TRO. Cum feceris quod admonent. ERG. Toties piget

Eadem moneri. TRO. Id accidit culpa tua:

Pare monenti. ERG. Odiosus es tandem mihi.

Quid paream? TRO. Fecisse quod semper bene est.

ERG. Sat haecenus, sat parui. TRO. Non est satis,

Ni fiat etiam semper. ERG. At satias capit

Rerum omnium. TRO. Quas animus inuitus facit:

Non quas volens, libensque. ERG. Quid mecum tibi?

Te, dum magistrum nostra prima aetas tulit,

Tuli magistrum. De magisterio tuo

Haec iam migravit. TRO. Disciplinam qui fugit,

Odit sciendi gloriam. ERG. Istam nil moror

Emptam labore gloriam. Dulcis mihi

Vna est Voluptas. TRO. Heu Voluptatem fuge

Matrem dolorum. Vis Voluptatem meram?

Stude labori. ERG. Aduersus est illi labor.

TRO. Deo iubente aduersa de aduersis fluunt.

Hinc & doloris fons voluptas blandior,

Laborque honestus est voluptatis caput.

Sic herba ab acri dulcis interdum liquor,

- Spinisq. ab aspris mollis existit rosa.  
 ERG. Haec vera sint, ab igne prodibunt niues,  
 Et flamma ab undis: terra se in caelum feret,  
 Caelumque terra sidet inferius pigra:  
 E Sole tenebrae, e nocte nascetur dies.  
 Omniaq. erunt ab omnibus. TRO. Iam non ego  
 Has te docebam, peior has argutias,  
 Peior magister docuit. ERG. Haud magno fuit  
 Opus magistro. Sensus huc duxit manu.  
 TRO. Dux brutus est, & monstrat obliquam viam:  
 Sensus futuri incautus, ad praesens modo  
 Se accommodat. ERG. Futurum in incerto latet,  
 Praesens tenetur: illud in Superum manu est.  
 TRO. Immo in manu cuiusque. Nam quales dies  
 Quicumque ducit hosce, quos vivens agit,  
 Talia sequentur saecula, queis nullum dabunt  
 Saecula vlla finem. Haec vita momentum est breve,  
 Sed pendet inde aeternitas. Tantum venit  
 Et tantulo. ERG. Nihil audio: frustra mones.  
 Futura quae sunt, tu gubernabis Deus:  
 Ego capior praesentibus. Tu, istas minas,  
 Stimulosq. germano admoue. TRO. Nec me quidē,  
 Quantum est peractum, poenitet: quamquā indiget  
 Freno ipse, tu calcaribus. ERG. Cupio meo  
 Animo obsequi. Is Virtutis affectet viam,  
 Auceps honoris, recta cui pectus sapit.  
 Inglorius ego, & stultus, hanc facilem sequar.  
 TRO. Est facilis aditus, exitus ad Orcum trahit.  
 ERG. Sedes ad Orci pallidas non est iter  
 Quale hoc, virens, nitensque. Non flores vides,  
 Gramenq.

Gramenq. pictum? TRO. Gramine sub alto latet.  
 Letalis anguis. decidunt flores cito  
 Arentque molles. gratus hic oculis color  
 Imponit vltro, & sponte captatum venit  
 Mendace vultu. talis aduerso nitet  
 Imbrifera nubes Sole, nec solido polum  
 Fulgore pingit. Quicquid hic rerum vides,  
 Vana est imago, fumus, vmbra, & somnium.  
 ERG. Experiar hodie, haec stat mihi sententia.  
 TRO. Tamen. ERG. Tamen molestus es nimium mihi.  
 Non hac mouebor mente, si caelum ruat.  
 Tu sequere, vel discede. TRO. Discedo, at breui  
 Meam vocabis precibus implorans opem.  
 Vt peruicax mens hominis, & prona ad malum.  
 Ego hinc videbo, coepta quo tandem cadant.

## CHORVS INTERIOR.

**H**VC ades, quisquis per amoena tendis,  
 Grata per Nymphis nemora, & recessus,  
 Hic vbi sedem sibi fixit olim  
 Alma Voluptas.  
 Ver vbi aeternum, viridiq. campos  
 Gramine apricos, varijsq. laetum  
 Floribus gramen, proprioq. flores  
 Spargit odore.  
 Cernis, vt sese tibi festa silua  
 Compfit, & qualem, cupiens teneri,  
 Hospes, vt dulci recreeris aura,  
 Explicat vmbra?



*Sensit aduentum simul ipsa tellus,  
Sensit & caelum: simul ipsa eunti  
Subycit flores, nitidoque ridet  
Lumine caelum.*

TROPHIMVS. ERGASTVS  
PANVRGVS

**C**ANTV hospitem Sirenes ad casum vocant.  
 ERG. O vox amica, o carmen, o liquidū melos.  
*Vt vos libenter audio? vt blandus mouet  
 Imas medullas sensus, & venas fluit  
 Riguus per omnes: scilicet regnum hic habet  
 Aurea Voluptas. Mente iam tota diu  
 Sedes cupitae, denique inuentae modo,  
 Saluete. Vester hospes accedo nouus:  
 O si & futurus incola. Vt noster iuuat  
 Aduentus, vt me vester aspectus iuuat,  
 Cantusq. dulcis? Cuncta nunc animo meo  
 Deleta sunt. Gloria & Virtus vale.  
 Tibi me Voluptas domina in aeternum dico.*  
 TRO. Et stulta sunt promissa, nec votum tenet.  
 ERG. O si videndum se aliquis hic nobis daret.  
*En cum corona iuuenis & cithara venit.  
 Aetas mihi ipsa, & habitus, & cultus placet.*  
 PAN. Salue Mundi opifex, & custos, dia Voluptas,  
*Quae pulchrum vario semine corpus alis.  
 Salue o cunctarum genitrix dulcissima rerum,  
 Vnde ioci, & cantus, lenis & aptus amor.  
 Quā pecudesq. feracq. omnes, quā pōtus, et aether,  
 Quam*

Quam celebrat tellus mille reuincta modis.

Te propter viret omne nemus, te propter eandem,

Fundit odoratas arbor adulta comas.

Salue iterum atque iterũ, comes o dilecta iuuentae,

Quae iuga, quae fluuios, quae loca leta colis.

TRQ. Sic captat auceps fistula alliciens auem.

ERG. O te beatum, laeta quem sedes tenet

Semper vagantem libere, & semper nouo

Modulata chordis verba flectentem sono.

Certum est adire: & certus, ut spero, comes

Adiungar illi, vota nec spernet mea.

TRQ. Alludit hamo piscis, ut laqueum voret.

ERG. O quisquis es, frondosa quem circum iuga,

Paene alterum Orphea, flumina, & pecudes ferae

Audire certant, dulce dicentem melos:

Aeterna sic iuuenta contingat tibi,

Si iusta posco, scire nec cuiquam nefas,

Dic quas in oras venerim. Hic laetas habes

Sedes Voluptas? Pectore huc toto feror.

PAN. Venisti amice Ergaste, venisti diu

Optate nobis: fallit an visus meos

Ingens cupido? Nomen est nobis tuum,

Ne metue, notum. Frontis insignes notas

Vestisq. noui. Saepe praedixit parens

Nobis Voluptas ipsa, dum numerat dies,

Teq. impotenter expetit. Quanto putas

Pectus replebis gaudio? ERG. Ut felix iter,

Paruaeq. fructus constitit magnus morae.

PAN. Vides vireta haec? illa disponi tibi

Mira arte voluit. Cernis herbarum toros

Viridanti in vmbra, texta quam myrtus facit,  
 Affletur & quam mollis ex illis odor ?  
 Hos, vt sederes, dextera instruxit sua.  
 Audin susurros fluminum, & blandas aues  
 Varia remotum voce mulcentes nemus ?  
 Sic erudinit ipsa, quo gratus sopor  
 Summa quiete obreperet pulchris genis.  
 Iam quot choreas, suauē cantantum choros  
 Quot comparauit ? vocibus quales sonos,  
 Carmenq. quale attemperat ? Veteri mero,  
 Lectaq. toto ab orbe regifica dape  
 Mensam refertam, mille famulantum manus  
 Vni vt ministrent, sedula insterni iubet.  
 Super omnia haec, quod maximum in magnis reor,  
 Ad ipsa facta vultus accedet bonus.  
 Quid plura ? me nunc misit aduersum tibi,  
 Missura plures obuiam, aduentum simul  
 Certum esse norit. Propter hanc ripam sede,  
 Longaq. corpus pone defessum via.  
 Interea ad illam laetus ibo nuntius,  
 Laturus ingens praemium. ERG. Duc nos cito,  
 Duc nos ad illam. Quodque punctum temporis  
 Spatio videtur annuo longinquius.  
 TRO. En capta misera praeda ad ignem ducitur.  
 PAN. Morem libenter gesserō: & quando hoc sedet,  
 Iter docebo breuius hac prona via.  
 ERG. I prae, sequar, signisq. in impressis tuis  
 Ponam pedum vestigia haud lento gradu.  
 PAN. At tu interim quas Daedala effinxit manus,  
 Vt se patentes vndique ostentent opes,

Per

*Per cuncta passim lumina intendens, lege.*

*Natura nusquam melius indulgit sibi.*

**ERG.** *O blanda nemora, o limpidi semper lacus,*

*O grata Tempe, o montium viridissimi*

*Mihi apparatus, nulla quos spoliet dies.*

*O scena siluis imminens, semper virens*

*Semper coruscis. O canentes, arborum,*

*Lenique motae flaminis pulsu, comae.*

*Oculos videndo defatigavi, & tamen*

*Adhuc videre mens inexpletum cupit.*

*Cerno hinc cauata saxa, & horrentes specus.*

*Vere haec beata, & sola Nympharum loca.*

**TRO.** *Illae est barathri ianua. O clemens Pater,*

*Stultae Iuuentae parce, ne noceant doli.*

**ERG.** *Audire videor dulce ridentes simul.*

*Quid? se videri forsitan a nobis cauent?*

**ECHO.** *Auent. ERG.* *An ut cōcesserim propius, libet?*

**ECH.** *Libet. ER.* *Quid ergo huc aliqua nō uestrū uenit?*

**ECH.** *It. ERG.* *Cur moraris hospitem errantem? Veni.*

**ECHO.** *Veni. ERG.* *At prior nos edoce incertā viam.*

**ECHO.** *Iam. ERG.* *Gradiar istuc? ECHO.* *Huc. ERG.*

*Aliquis an tecum adest?*

**ECH.** *Adest. ER.* *Puellarū cohors? ECH.* *Harū cohors.*

**ER.** *Fore me libēter reris? ECH.* *Eris. ER.* *Eheu miser.*

*Deus cadentem subleua. Heu perij miser.*

*Miserere. TRO.* *Quid agis? abstine infelix manum.*

*Scelerate. PAN.* *Nostre est praeda. TRO.* *Iam*

*iuuenem est satis*

*Tentasse fraude. Saeva vis absit procul.*

**PA.** *Haec nēpe vis. TRO.* *I perfide in Stygias domos.*

*Reliquit animus: membra contraxit rigor:*

*Vnamq. gelidus sanguis in sedem coit.*

*Attolle corpus: tolle iam vultus mihi.*

*Ergaste: quid adhuc metuis? hic adsum tuus*

*Magister ipso in tempore. Abscedat timor.*

*Ergaste. ERG. Quis me suscitatur? quis fert opem?*

*TRO. Iam me aspice. ER. Heu magister, ingratum sine,*

*Visuq. caeli & lucis indignum frui,*

*Sine me perire: monita qui temnens tua,*

*Me perdidit. Absque te fuisset, non forem.*

*Inuenta mors est, dum Voluptas quaeritur.*

*Mitte immerentem, mitte commeritum mori.*

*TRO. Nihil verere. Propter hoc dignum reor*

*Vita esse, quod te indicas dignum nece.*

*Spes magna veniae, & grande solamen mali,*

*Culpam fateri. Est innocenti proximus,*

*Quem poenitet peccasse. Nec mortem Deus*

*Cupit nocentum. Sceleris admissi dolor*

*Vitam impetrat. Tum portus erranti optimus*

*Est consili mutatio. Poenae est satis,*

*Si te facinoris ante commissi pudet.*

*ERG. Me cepit aetas: hostis accessit malus,*

*Fallaxq. fandi fictor: hic mentem abstulit.*

*TRO. Haec ipsa vidi, & nota iam pridem mihi*

*Pellacis ars, & pectus instructum dolis.*

*ERG. Sed, te volente, magne Regnator poli,*

*Qui te potentem maxime, clementia*

*Et fontibus salute donanda, probas,*

*Vitium obtegam virtute, malefactum bono.*

*Nunc parce Genitor, parce. Peccaui miser.*

*TRO. Er-*

TRO. Ergaste, si mutanda mens olim tua  
In melius, vnam ob criminis culpam, fuit :  
Tanti fuit peccasse. Placatur Deus  
Precibus nocentum . Facta condemnas tua ?  
Condonat ille. Agnoscis ? ignoscit malo .

ERG. Tu, qui mihi spem veniae & indulgentiae  
Facis benignè, & rebus afflictum leuas ,  
Imponè quacuis onera : perpetiar, feram.  
Nec me grauabit vllus in vita labor .  
Ego, te iubente, vel per Arctoas niues ,  
Per orbis hieme & nocte damnatas plagas ,  
Vel per perustas igne, & aestu feruido  
Nimium propinquae semper aetheriae facis ,  
Intrepidus ibo, & offeram morti caput .

Quocumque placeat, nulla parendi est mora.

TRO. Sic polliceris. ERG. Ipsa res faciet fidem .

TRO. Non est necesse, vt sicca glacialis poli  
Tranetur Vrsa, aut Solis ardescens via .  
Hoc per iugum Virtutis audacem gradum  
Molire promptus : nec refer retro pedem ,  
Ni fueris ante victor, & voti reus .  
Frater praeiuit, sequere : tunc duplex erit  
Vtrique causa vtriusque laetandi bono .  
Quid fluctuare ? & lumina in montem iacis ?  
Sunt multa, quae si graua cum coepes, tibi  
Primo videntur, leuia successus facit .

ERG. Iubes ne ? Fiat. TRO. Inuoca vt debes Deum .

ERG. Ego vero, Olympi Reçtor, excelsum supra  
Qui verticem altus ponis adscensum tuum,  
Prostratus ad te supplices tendo manus .

Fac,

*Fac, si prioris culpaes es oblitus meae,  
 Ut spero, & opto, ad montis enitar iugum.  
 Difficile opus, magnumque. Sed fretus tuo,  
 Pater, benigno numine, effectum dabo.*

**TRO.** *Audiuisti vota, iam surge, & viam  
 Insiste prorsus, nec malis cede obuijs:  
 Contra sed ito audentior. Facti cupis  
 Dimidium habere protinus: recte incipe.  
 Quod si qua rupes, si quis impenetrabilis  
 Sinus, aut crepido montis, aut ramis frequens  
 Negarit aditum silua: ne fletu, ut puer,  
 Sed pertinaciter aude. In hoc sunt omnia.  
 Stultus dolorem vulgat, & flendo integrat.  
 Sapiens premit silentio, ac vulnus tegit.*

**ERG.** *Me non, ut obstant Pontici fauces freti,  
 Et gemina pandens hinc & hinc vastas manus  
 Symplegas arctet maria concursu nouo,  
 Iterumq. fluctus saxaq. in caelum exprimat,  
 Non, dubia Syrtis Barbaro exultans salo,  
 Terrebit vnamquam. Valeat hortandi labor.  
 Addis citato calcar, incenso facem.  
 Ego deferam vitam ante, quam iussam viam.*

**TRO.** *Iam perge, perduc vota ad optatum exitum.  
 Est auctor operis, & erit adiutor Deus.*

## ERGASTVS. ARISTVS

**QVI** *stultus hic est terror, & caecus timor?  
 Etiam ne vatum fabulae occurrant mihi?  
 Mibi non Chimaerae spiritus flammam vomens,  
 Lernaee*



Lernaee pestis caede pubescens sua,  
 Non nemoris ille excubitor aurati draco,  
 Non aeripes & flammæum Aetææ pecus,  
 Non quicquid vñquam vanâ finxit Graecia,  
 Quot se Orcus in monstra induit, & atras feras,  
 Cogent retrorsum ferre constantem gradum:  
 Cunctis subactis verticem ad summum ferar.  
 Vt cuncta sunt facilia, ni inuitus facis.  
 Quis hic sopore membra deuinctus iacet,  
 Alta & quiete mersus? An frater meus?  
 Is est. an erro? an excito? At dulcem graue est  
 Turbare somnum. Visus audire est: sua  
 Sponte ipse sese colligit, & ad se redit.

ARIS. Ergaste. ERG. Ariste. ARIS. Vera ne hæc  
 facies tua?

Verus mihi tu nuntius? an etiam, vt prius,  
 Per leuia mentem visa deludit sopor?

ERG. Ariste vigilas. Vera mi frater vides.

Ergastus adsum. ARIS. O nuntium optatum mihi.

Quod somniabam cernere videnti datur.

Audit præces benignus e caelo Deus.

At fessus es: quiescere hic mecum potes.

Hinc, vt laborem parua releuarit quies,

Pergemus vna: longa non restat via.

ERG. Audis ne cantum? An fallit incertus sonus.



CHORVS

## C H O R V S


**F**ELICES, quibus arduae  
 Virtutis teritur iam pedibus via.  
 Per vepres, per & aspera,  
 Et per lubrica saxeta, crepidinem  
 Per montis procul auj  
 Vix ipsis capreis exuperabilem.  
 O quos Laudis amor tenet,  
 Quis vrget Stimulis Gloria pectora,  
 Et calcaribus incitat  
 Virtutis rigidum scandere verticem.  
 Ne frangant animos iugi  
 Non molles aditus, semper & obuia  
 Quae tardant celeres gradus,  
 Quae praerupta viarum, impediunt iter.  
 Duris cedere nescia,  
 Instantesq. metus vincere pertinax,  
 Atque inuicta laboribus,  
 Mens est, cui decoris fulsit honos boni.  
 Laeti opponite fortia,  
 Qui sese obijciunt, pectora, casibus.  
 Obstant omnia. Rumpite.  
 Quod pulchrum est, petitur difficili via.



ACTVS



# ACTVS QVARTVS



ARISTVS. ERGASTVS



*AM SVRGE* frater, surge :  
 quid lentus sedes ,  
 Stupesque , cantu vt ebrius ?  
*ERG.* Liquidum bibi,  
 Et dulce carmen : sensu vt abstra-  
 cta e suo

*Mens ierit illuc, vnde tam laetum mihi  
 Acroama fluxit : nec reuertisset diu ,  
 Nisi reuocasses . Ipsa nondum etiam meas  
 Vox praeter aures vecta , miranti sedet  
 Infixa penitus animo. Abite, absistite ,  
 Valet, Musae turpium morum illices,  
 Escae malorum . Tuq. luctificum malum  
 Fallax Poësis, blanda perniciēs viram .  
 Quae vestra sint Circaea tamquam pharmaca ,  
 Pandam nouus Mercurius, expertus tamen :  
 Ne quispiam fallatur ignarus doli .*

*Vos*

Vos audiendo, est aliqua, nec vehemens quidens  
 Sensus voluptas: sed voluptatem grauis  
 Maeror dolorq. sequitur: haec praeteruolat:  
 Desixus animo inhaeret aeternum dolor.  
 Quam paene, per vos, vasta tenebrarum loca,  
 Et quo trahabar Tartari vidi specus?  
 Quam paene in Orci limen intulimus pedem?  
 Quam paene non extulimus? En horret, miser,  
 Reuolutus horret animus in saeuos metus.  
 ARIS. Quis horror est Ergaste, quos narras metus?  
 ERG. Vix tantum ab ipsa Morte, & atris abfui  
 Antris, Ariste. ARI. Hoc illud est, quod te modo,  
 Cum fessa placidus membra leniret sopor,  
 Cernere videbar, fauce correptum fera  
 Diri draconis: missa nunc caelo manus  
 Seruasset haec intacta translatum loca.  
 ERG. Ita est. Opem mihi attulit ab alto Deus:  
 Ipse est mei misertus. ARIS. At nos, hoc duce  
 Et auspice, hanc sequamur inceptam viam.  
 En iam minusq. accliuus, & lenis magis  
 Se pandit ipsa. ERG. Et longa sat visa est quies.  
 ARIS. Eamus ambo: & triste si quid se offeret,  
 Pias vterque transferens fratri vices  
 Inuabit alterum. ER. Heu cado. AR. Ah medium tene  
 Ergaste, quo te coniicis? quid agas vide.  
 ERG. Nunc quoque ruentem sustine. ARIS. At ni-  
 mium es celer  
 Praeceptorq. lente, frater, appropera gradum.  
 Ipsa sibi festinatio nec lit moras.  
 Est ambulandum, non volandum. Sat cito  
 Si sat

*Si sat bene. ERG. En iam prendimus sacrum iugum  
Post tot pericla, & casuum discrimina.*

*Loca haec licebit iam salutare. ARIS. Et Dei*

*Celebrare laudes. ERG. Montis alti culmina*

*Vicina caelo, florem, & castum nemus,*

*Saluete. ARIS. Frater, nos ne perduxit Deus*

*Tot per salebras, tot per anfractus viae,*

*Ad haec amoena, & summa terrarum loca?*

*Nos immerentes? Magne Caelestium Pater*

*Hominumq. Rex, o dulcis, o patiens amor,*

*Quae causa, quae te causa, tanto perpulit*

*Vt me beares munere, & fratrem mihi,*

*Fatriq. me coniungeres? ambos, tua,*

*Qua cuncta torques, mira qua patras, manu,*

*Dicam ne sorde an faece secretos, humi?*

*Huc transfulisti, ad proximam caelo domum.*

*Munus, fatemur, munus, hoc totum tuum est.*

*Scintilla nos huc ignis abripuit tui,*

*Demissa caelo. Vterque grates dicimus,*

*Et firmitatem oramus, & constantiam.*

*ERG. Germane, ceu sint nubila e visu mihi*

*Detersa, quaedam vallis infra cernitur*

*Angusta sane, & vuida. ARI. Est terrae, vt vides,*

*Orbis, pusillus ille, & in media latet*

*Caligine. Viden mole sub quanta iacet*

*Molestiarum, quicquid in terra iacet?*

*Quantae tenebrae, quantus est error, putas,*

*Mortalium? quam leuibus a rebus gerunt*

*Pugnas miselli, more taurorum, truces,*

*Pro pascuis, potuque nec puri lacus,*

In vulnera, atque in funera ruentum? Nefas.  
 Heu digna caelo pectora, heu Superum genus,  
 Terrae inquilini, & hospites. Quin iam caput  
 Mentemq. in altum tollitis, ut abiectam humum,  
 Et quae creatur inde materiem mali,  
 Ratio repellat? Valeat, ah, Sensus, precor,  
 Corruptus, & corruptor. An caeno iuuat  
 Turpare caelum? An spiritum, terrae iuuat  
 Clauo subactum affigere? En sedes vocat,  
 Et patria. Hic est cura figenda, hic modum:  
 Hic omnibus metam esse votorum, decet.  
 Est inquit mens hominis, immensi capax:  
 Hanc sedat vnus, vnus hanc explet Deus.

ERG, Sed quid videtur ipse iam vertex, diu  
 Formidolosus? aequa planicies sedet,  
 Campiq. se longe explicant. Nam quae hic patet  
 Amoenitas ac splendor? Haud illic magis,  
 Stellante caelo accensa cum ducit faces  
 Phoebe minores, siderum effulget chorus:  
 Ut fulgor hic scintillat, & varie micat,  
 Florum, hic & illic. Tale tessellatum opus  
 Nec iactet vmquam culta regnantum domus,  
 Nec reddat vmquam docta pingentum manus,  
 Auro, smaragdo, purpura, argento, croco.  
 Inspice quis ordo? Ut cuncta diuisa in suas  
 Sunt areas, puluinulos, sulcos, sinus?  
 Quis hic nitor decorque? Quae florum agmina,  
 Quae copiae? Hic consistite, tum cerne hunc mihi  
 Ut gemma profert, trudit ut geminum calyx,  
 Ut calathus alterum? Ille vagina e sua,

E cuspidē

E cuspide hic sese exerit, Qualis meas  
 Vndique laceffit ebrias nares odor,  
 Præ quo Sabaeum germen, & Cilicum seges,  
 Arabumq. messis, nautea & putor grauis?  
 His capior, immo his pascor: hic viuam libens:  
 Nec sit molestum inemori hoc spectaculo.  
 Ariste quo nunc raperis, obtutu & files.  
 Defixus vno? AR. Pulchra sunt, pulchra haec tibi  
 Germane, sunt & suauia: at quantum putas  
 Et pulcher est, & suauis horum auctor. Deus?  
 Opera magistrum visa nec visum indicant.

## ERGASTVS. HONOR. ARISTVS

**Q**VIS strepitus ille? Nam quis huc vertit gradū?  
 Quis ille comitum numerus obsedit virum?  
 Regalis ipsa in fronte maiestas sedet.  
 Quem se ore fert? & qualis incessu venit?  
 Ardet salutare animus, at vox deficit.

**HON.** Par iuuentum amicū cuncta moderanti Deo,  
 Qui vestra solus rexit huc vestigia,  
 Venistis huc feliciter: felix vbi  
 Deo propinquam regiam Virtus tenet.  
 Ego ipse vos excipio, & amplector libens.

**ARIS.** At quisquis es, seu terra te talem tulit,  
 Siue ales es caelestis, & iuuenem nouo  
 Imitatus ore, nostrum in occursum venis,  
 Non absque mente & numine aeterni Patris:  
 Vterque, cum beatus hanc sedem colas  
 Virtutis almae, & pulchra sit tecum cohors,



*Iam te veremur supplices. Tu nos tuam,  
Si iusta petimus, accipe in certam fidem.*

*HON. Ne petite meritis ante quod vestris datum est,  
Et ipsa Virtus praecipit. Non desum Honor,  
Ego ille, eodem pulchra quem partu tulit  
Labori amicum cum pudica Gloria,  
Virtus, ab ipsis orbis incunabulis,  
Sed nec queam, nec deesse si possim, velim,  
His, quos amicus ipse commendat Labor,  
Et qui sacrae parentis affectu calent.  
Laboris & Virtutis est merces honos,  
Virtus honores & voluptatem parit  
Doctis viris, & fortibus: quorum decus  
Celebresq. laudes, tempus ut nullum obruat  
Oblivione ac nocte, sed claro die  
Visantur usque, & consecrentur posteris:  
Hae, quas videtis sponte sese artes mihi  
Innixisse socias libero dignas viro,  
Tristi e silentio eximunt: seu marmore  
Atque aere viuas ducere effigies velint,  
Seu liquidis coloribus: nec abest vetus  
Historia, nec Memoria saeculorum tenax:  
Nec Suada dulcis, & venusta Oratio:  
Nec quae modisq. & carmine, in caelum ferunt,  
Nomina potentum, & facta sapientum virum,  
Et Musica & Poësis. ERG. Hei metuo dolos  
Ariste: nomen hoc Voluptatis mihi,  
Poëseosq. & Musicae, baud quaquam placet.  
Sat est semel peccasse: sat frater semel  
Modo non perisse. Iam suo doctus malo*

*Piscator*

Piscator ictus sapiet. HON. At iuuenis metum

Pone, & moueri absiste. Non ulli hic doli,

Non ullus hic opertus insidijs locus.

Hic casta cuncta, nempe quae Superis placent.

ERG. Numquam timere nocuit. HO. In rebus malis.

ERG. Qui falsus est, & ipsa permetuit bona.

Semelq. captus saepe captari timet.

HO. Quid vana terrent? ER. Qui pauet vanos metus,

Veros tunc. Plerumque tempestas fera

Caelo sereno oppressit ac mersit ratem.

HO. Nil audeat qui metuit. ER. At ne erret quidem.

Timor est pater Prudentiae. HO. Est idem comes

Inertiae & Languoris. & par est malum

Nihil timere, & omnia. In medio est sita

Diuina Virtus: arcta cui placuit via.

Eademq. recta: laeua ne errantem auferat,

Nec dextra rursus, limite vt recto nihil

Excedat, aut recedat. Vtroque in loco

Tu nimius es, iustoq. nunc maior metus

Est iste, fuerit ille cum iusto minor.

Iniquus es, si regna Virtutis times.

Iter huc negata paene tentasti via.

Erroris error vt esset alterius gradus?

Confide iuuenis, comprime affectum leuem.

ERG. Tandem ista cunctum verba dempserunt metum.

Et me doceri decuit, & dedo manus.

Vbi ipsa Virtus? HON. In penetrati sedet

Intenta rebus, digna dum mortalibus

Praemia laborum dat sorori Gloriam

Tribuenda, & ipsis addita est dudum comes,

Quae cuncta lance pensat, & libra pari,  
Iustitia: sed mox aderit. ARIS. Hic quiddam cupit  
Scire animus, at retardat inuitum pudor.

HON. Rubens pudoris vultus est signum tui,  
Et te tacente loquitur. Haud metuas licet,  
Eloquere. AR. Tu verba accipe in partem bonam,  
Nec curiosum dixeris. HON. Dic quod lubet,  
Libens petenti quodque responsum dabo.

ARIS. Semper ne Virtus dat labori praemia?

HON. Quando est honestus, semper. Interdum tamen  
Ut sit labor praecclarus, & notus magis

Pleno theatro, & merita magnorum virum  
Spectata crescant, tempus in paruum volens  
Differt, nec aufert. AR. Omnium expertos habet  
Semper labores? HON. Omnium. Et in vnum refert  
Volumen omnes, laude quos dignos probat,  
Ut par labori praemium respondeat,  
Amplaeque merces gloriae: seu sint fenes,

Iuvenes, viri, puerive. AR. Per scriptum ne habet  
Etiam laborem ac praemia adolescentium,  
Qui corda thyrso Laudis ac Sapientiae  
Percussi, amare decora certatim student,  
Et litterarum studia? HON. Nec sane modo

Vulgari: habet praescripta & horum nomina,  
Et quisque qua sit laurea, quo munere,

Prae ceteris donandus. ERG. Et quando dari  
Istaec iubebit munera? HON. Hoc prudens agit:  
Hoc scilicet deliberat: & vna potens

Disceptat hoc Iustitia: tum Famam vagam,  
Quae feri per orbem facta vestrorum ducum,

Qui gloriam vicere prisca temporis,  
 Huc euocari voluit, vt clara ciet  
 Voce meliorum nomina: & libros parat,  
 Minioque, & auro, puro & argento illitos,  
 Quos muneretur splendide, in clarissimo  
 Praestantium virtute, & illustri nota,  
 Ac dignitate principum, coetu virum.  
 ERG. Sapienter ista, & digna quae repetat frequens.  
 Paulum sepultae inertiae distat diu  
 Celata virtus. HON. Fallere, haud Virtus eget  
 Praecone, per se clara: sed tamen in loco,  
 Vicina qualis arbor irriguis aquis,  
 Laudata crescit. ER. Gaudeo. HO. En Virtus adest.  
 Hinc Gloria, hinc Iustitia, cinxerunt latus.  
 AR. Vbi nā? Procūbo ad genua? HO. Ne faxis caue.  
 Vestros honores negligit: se ipsa est satis  
 Contenta. ARIS. Quae paremus illi exordia?

VIRTVS. ARISTVS. HONOR  
ERGASTVS

NON metus, amici. Dexteram nostram obsidem  
 Accipite fidei. Vester aduentus mihi  
 Hoc gratior, quo durior vobis fuit.  
 Non facilis iste, sed fuit felix labor.  
 Videte qualis exitus fuerit viae.  
 Hic semper aura dulcis, hic aeni tenor  
 Sine nube semper: nulla vt existat lues,  
 Vapor serenum nullus infuscet diem.  
 Hic summa Pax, & nullus exterrēt metus,

Nec fluminum, nec fulminum : quamuis polo  
 Effusa nigro saeva tempestas tonet ,  
 Tegatq. terras imber , & nimbus mare .  
 Sublime mons se tollit , & pulchrum erigit  
 Supra procellas , & Notorum turbines ,  
 Fulgente semper luce vestitus , caput .

**ARIS.** Salve piorum caelitem antiquum genus,  
 Felix beatae Glorïae & Honoris parens .  
 O sola, certae per necis discrimina  
 Peti labore digna, cui Mundus nihil  
 Par finxit umquam : turpe quae quamquam scelus  
 Exosa terrae, hunc arduum montem colis ,  
 Tamen relicto tramite adscensum haud vetas.  
 Quas, non referre, aut agere, nos grates tibi,  
 Sed quas habere possumus ? Non hoc queant  
 Quotcumque Sol prospexit , ex quo subditas  
 Lustravit oras, vnus vt cunctos agat  
 Incensus animos ardor . Hoc non virium  
 Mortalium esse nouimus. Te vnâ modo  
 Permite nobis colere. De te pendeat  
 Vterque : quamuis magna poscamus , tamen  
 Et magna sunt, donare quae magnos decet .

**HON.** Recipe volentes mater in nostrum chorum .  
 Rogant, & ipse nomine amborum rogo ,  
 Iunctae rogantum fortius pugnant preces .  
 Et quod negatum est singulis, multi impetrant .  
**VR.** Amo petentes: iusta quae petitis dabo .  
 Sed remigrandum est, vnde venistis modo ,  
 Alijsque, quae sit recta, monstranda est via .  
 Hoc esse nihil honestius, maius nihil ,

Nihil

Nihil esse propius muneri caelestium,  
 Summo esse nihil acceptius possit Patri.  
 Qui adiutum it hominem, proxime accedit Deum.  
 Vos ite tandem cara pars nostri gregis,  
 Memoresq. semper quid nouus poscat status,  
 Probate vita & moribus, lecta e manu  
 Vos esse, amicos ipsa quos Virtus habet.  
 Ego longiorem trahere non patiar moram.

ERG. At cum feremus alta Virtutis iuga.  
 Penetrasse gressu, nulla si habeatur fides,  
 Qualia docebunt signa? VIR. Correctum genus  
 Viuendi, & illi mentis humanae indices,  
 Orationis veritas, oris pudor.  
 Addam alia, & ipsa magna: miniatos libros  
 Argento & auro fulgidos, quos Gloria,  
 Ut quisque meritus fuerit, adolescentibus,  
 Romana quos gymnasia formant litteris  
 Caeloq. dignis moribus, dono dabis:  
 Tu, si placet, Iustitia, deposita hac libra  
 Ad tempus, his te iunge, & ut visum modo est,  
 Effare, quo sit quisque dignus munere.  
 Honos, corollas dextera nectes tua  
 Semper virenti ex arbore, e nostra domo,  
 Victoribusq. illustre velabis caput.  
 At tu Poësis, quae virorum nomina  
 Orco eripis, vetasq. defunctos mori,  
 Praescribe versus, quos nouis concentibus  
 Virgo canendi docta modulari queat.  
 Iamque aderit ipsa Fama: non aberit diu.  
 Iussi euocari: longe & audita tuba,

Qua suscitatur Laudis excellens amor ,  
Pronuntiabit nomina adolescentium ,  
Qui inter sodales , aemulos inter suos ,  
Scientiaeq. & ingenij primas ferunt .  
Ea dum parantur , grata si vobis quies ,  
Huc ite iuvenes : nostra vobis limina  
Fas tangere . Hinc descensus haud longa via  
Facilique vos restituet in planum locum ,  
Vnde intulistis huc per adscensum gradus .





## CHORVS


**S**VDATVM satis est: iam iuuenes modus,  
 Iam finis positus difficili viae:  
 Iam cessere metus, & labor inquires  
 Pulchri perpetuus comes.

*Iam desiderijs meta fidelibus,  
 Vestris & studijs ex animo obigit  
 Felix curriculum. Nunc capite obuia  
 Pleno gaudia pectore.*

*Miles non aliter post graue proelium,  
 Saeui post obitus mille pericula,  
 Lætus victor ouat, cum posito metu  
 Victis imperat hostibus.*


*Cautus non aliter post mare naufragum,  
 Ereptamq. feris nauem Aquilonibus,  
 E portu tumidi nauita iam minas  
 Diues prospicit æquoris.*

*En Virtus geminos in penetralibus  
 Cum coetu comitum lætior excipit:  
 Aula hic perpetuis carminibus sonat,  
 Vestra non sine gloria.*





# ACTVS QVINTVS



ERGASTVS. ARISTVS



NOS BEATOS FRATER  
O faustum, ac bonum,  
Quo nullus vmquam pulchrior  
fulsit dies.  
O laeta mentis gaudia . O donum  
supra

*Humana felix vota. Virtutem sacram,  
Virtutis aedem splendidam, sanctum nemus  
Vulgo auium; videre fas nobis fuit?  
Nos dexteram tetigimus, vnde hominum decus  
Dependet omne? His pedibus auratum solum.  
Pressimus, humumq. caelo & astris aemulam?  
Nobis opes, profana quas numquam manus  
Contrectat vlla, attingere, & nostras velut  
Saponere datum est? Caelitum veras opes,  
Prae*

Prae quibus, inopia haec omnis, hoc nostro patet  
Quaecumque in orbe copia, ut in vnum locum  
Congesta sint, dispersa quae tellus colit.

Etiā ne laetos cuncta per miracula  
Visus referre licuit, & gratum melos  
Audire, & illos aethere infusos suo  
Haurire odoris spiritus? Aeni dies  
Haec prima, primus carcer hic vitae mihi,  
Aut meta potius: Summa votorum attingi.

ARIS. Sunt ista. Sed quid marmora in vultus virum  
Conuersa? quidque imagines sapientium  
Et fortium, quos nostra siue actas tulit,  
Seu priscae? Sed quid verba ni malis prius  
Oracula appellare, quae fudit domi  
Plenissima pictatis, & prudentiae,  
Regina, quando os, quale & augustum & sacrum  
Templum, quod ipse implere dignatur Deus,  
Coepit aperire, & sensa casti pectoris,  
Ceu sacra signa, ex abditis penetralibus  
Proferre, cum mens nostra paulatim sui  
Oblita, caelum scandere, & propius Deum  
Visa est videre, & figere obtutum sacro  
In lumine: ut futura vita omnis mihi  
Sit mors acerba, & carceris duri loco  
Hoc corpus ipsum, iussa ni faciam pia,  
Affirmet & Spes certior, cursu hoc breui  
Vitae peracto, me reuisurum domos,  
Vbi quiete detur aeterna frui.  
Vos o beati, tanta queis semper sedet  
Animo voluptas: siue Reginam licet

Spectare

*Speſtare, ſine audire praesentem loqui .*

*At nos, quibus res obtigit, qua non queat*

*Esſe vlla melior, anima dum corpus reget ,*

*Eſt quicquid aevi, quicquid hoc vitae ſuper,*

*Quod quale ſit, neſcimus (haud longum quidem*

*Illud futurum eſt) rebus in cunctis, bonum ,*

*Qui cautus eſt magiſter officiij, metum*

*Semper tueri oportet, vt conſtet ſalus.*

*Hoc eſſe quemque gratiorem conuenit ,*

*Quo plus recepit munerum . Cui plus datum eſt ,*

*Et plus ab illo exigitur . ERG. Haud aliter reor.*

*ARIS. O ſi magiſter noſtra gaudens gaudia*

*Hic eſſet, vt laboris hunc fructum ſui*

*Percipere tandem poſſet . Hic noſtrae modo,*

*Hic, frater, vnus deeſt voluptati locus .*

*ER. Ipſe euocem. At quaero vnde. Quā inſiſtā viam?*

*ARIS. Pietas vetat diſcedere. Hic ſtandum eſt tibi .*

*ERG. Eadem magiſtrum adeſſe quaesitum inbet .*

*O implicatum tempus. O animos, duo*

*Quos diſtrabunt conſilia . Pietatem fugat*

*Aduerſa pietas. Iuſſa Virtutis ſacrae*

*Si tantulum contemnimus, magnum neſas :*

*Neſcire rursus , noſtra quae ſint gaudia ,*

*Qui monitor, auctor, ſuaſor, impulſor fuit ,*

*Non eſt ferendum . Mens in obſcuro iacet ,*

*Vt terra in vmbra media, cum ceſſit dies .*

*ARIS. Tu qui tenebras dimoues e pectore ,*

*Vt Sol opaco ab orbe, cum redijt dies ,*

*Et nox receſſit iuſſa. Tu ſons luminis*

*Praetende lucem hac nocte curarum Deus .*

TROPHIMVS. ERGASTVS  
ARISTVS

**N**E VANVS labor, o iuuenes. Men quæ-  
ritis? Adsum

Vester ego, hic adsum. Nec me communia fallunt  
Gaudia quæ fuerint. Ego vos per caeca viarum,  
Per durum Virtutis iter, per deuia montis,  
Adduxi, supera q. ambos ex arce reduxi.  
Quamais nulla meos penetrarint lumina vultus.  
Non mortalis ego, Ergaste, o mea maxima cura.  
Namque tibi e coetu aligerum me rector Olympi  
Custodemq. ducemq. dedit, cum matris ab aluo  
Egrediens, primum visisti luminis oras.  
Ipse autem, errantem, & vitæ per iniqua vagantē  
Ut regerem melius, mortalia corpora sumpsi,  
Et lucem ætheriam nubes obduxit amictu.  
Nunc autem, Deus ipse pium succedere votum  
Quod dedit oranti, pulchroq. cupidine captos  
Virtutis vos tangit amor, nec longius ora  
Est mihi fas hominum tectæ sub imagine formæ  
Induere, in tenues dilabar protinus auras.  
Nec tamen abscedens, solum te Ergaste relinquo.  
Haerebo assiduus, fidusq. per omnia custos.  
Quæquæ oculi haud poterunt comitē spectare sequētē.  
Nusquā abero, & caeli tandē te in limine sistam.  
Vos, quibus e nostro nuper lux fulsit Olympo,  
Muneris accepti memores, dum vita manebit,  
Este viri, & celebrate Dei immortalis honorem.

ERG. Quo

ERG. Quo fugis? & comes, o meus arbiter  
 Vitae, quo fugis? & me in imagine  
 Formae humanae, tempore decipis  
 Tam longo? Heu miser, heu quibus artibus,  
 Moribus heu quibus, infelix, tua  
 Laesi lumina, & aures. Heu miser.  
 Urbis sidereae o vetus incola,  
 Cuius & inclyte, parce precor precor,  
 Inspira bone tu mentem optimam,  
 Et quicquid cupio, affer opem, ut queam.  
 Sordet humus mihi: mens inhiat polum.  
 Tu te aspectu e nostro subtrahis.  
 Sed properanti porridge dexteram,  
 Nec me, quamvis dignum, desere.  
 Hoc tua te pietas & amor iubet.

ARIS. Ingrata terra, o gentis humanae status  
 Amens, miserque, & immemor honoris tui:  
 Est summa ab arce singulis custos datus,  
 Ut quisque iniuit prima vitae limina,  
 Caelestium illo ex ordine, & sacra manu,  
 Quae laeta dum perfruitur adpectu Dei,  
 Oculosq. pascit lumine, ac mentem replet.  
 Ante ora semper cuius aetherij sumus:  
 Ille arbiter testisque, non factis modo,  
 Prope cogitatis interest. Ecquis timet  
 Ne tam pudicis mentibus labis nigrae  
 Et inquinatae fiat adpectu grauis,  
 Nec potius atra sorde se contaminat?  
 Atque his tibi blandiris, his caelum putas  
 Superare pennis? Ardua ad caelum est via:

Caeli

*Caeli aemulare studia, qui caelum petis.*

*ERG. Audis? Etruscae sonitus increpuit tubae.*

*Quis inflat aera? gestit hic animus mihi,*

*Et gloriae praesumit egregium decus.*

*ARIS. Nisi fallor, ipsa huc Fama molitur gradus.*

*ERG. Ipsa est. Viden quot lumina, quot aures habet?*

## F A M A.

**I**LLA SVM, quae per remotas Fama terras  
explico.

*Fessa numquam alas volucres, orsa praestantum  
virum*

*Nuntians: ut sint ubique, & audiant semper bene*

*Toto in orbe, mente recta, & laude laetati bona.*

*Huc vocor Virtutis imperio, & rogatu Gloriae,*

*Quae sequetur cum Poësi & fratre germano suo*

*Ac sodali Honore, & una splendidos libros feret,*

*Quos statim virtutis ergo, & muneris donet loco.*


*Hinc ego laudabo bonorum nomina adolescentium,*

*E libello, nuper ipsa quem dedit Virtutis mihi.*

*O beatum qui laboris praemium excellens feret,*

*Cuius & laudes Poësis carmine extollet suo, &*

*Musice reddet canendo carminum auditos sonos.*



GLORIA.



GLORIA. HONOR  
F A M A

**A**DES huc frater, qui nobilium  
 Celebras semper facta virorum  
 Incluta semper : numquamque decus,  
 Nomina numquam tacita esse sinis.  
 Ades huc nobis expers senij,  
 Versuque potens, casta Poësis :  
 Neu vos pigeat paruum ad tempus  
 Esse his terris, monte relicto.  
 Iubet hoc Virtus, praesensque rogat,  
 Vtrique sacer, carus virique,  
 Iuuenum coetus, coetusque virum.  
 Erit hic aliquid nostri officij  
 Comites esse,  
 Vestrumque simul munus obire.  
 Stimulis iuuenum impellenda nouis  
 Corda per altum Virtutis iter,  
 Corda impulsu concita laudis.  
 Ferte huc pueri munera, ferte  
 Munera doctae grata iuuentae,  
 Quam commendat Labor & Virtus.  
 Ferte huc libros, ferte coronas,  
 Pretia ingenij, praemia palmae,  
 Bona Virtutis dona egregio  
 Hoc confessu donanda virum.  
 O te nimium super aequales  
 Fortis

Quem laudatum Fama vocabit,  
 Partum vt sumas victrice manus  
 Hoc tam insignis pignus honoris.  
 Cui pulcher Honor laeta virenti  
 Tempora cinget rite corona.  
 Cuius amabit dicere laudes  
 Casta Poësis: cuius laudes  
 Decus ingeminans nomenque, frequens  
 Aula sonabit.

HON. Nisi iam molestum est, Fama, da signum tuba,  
 Et clara iuuenum nomina e scripto cita.

FAM. Quod sit bonum felixq. pulchris litteris,  
 Collegio Romano, & alijs omnibus.





# P R A E M I A



M. TVLLII Ciceronis opera omnia.

*Egregium munus, septena volumina Tylli.*

*Numquam alias quisquam talia dona tulit.*

C. PLINII Naturalis historia.

*Discere multa cupis, multosque evolvere libros?*

*Unum hoc pro multis multa docebit opus.*

PLVTARCHI vitae Latine redditae.

*Pellege Romanas, Graecasque ex ordine vitas.*

*Qui melius possit tradere, nullus erit.*

P. VIRGILIUS Maro, & Statius,

*Carminis sit species Latini*

*Tangit, hunc versa studiose, & istum:*

*Hunc magis. Solus facit hic disertos*

*Esse poëtas.*

SILIVS Italicus, & Senecae tragoediae.

*En tibi, victor, geminos poëtas:*

*Silium effusum, Senecamque doctum.*

*Hic tubam dextra gerit: ille vincit*

*Crura cothurnis.*

C. VA.

C. VALERIVS Flaccus, & Lucanus.

*Atticas vna Latiasque pugnas*

*Carminē expressas dabit hoc volumen.*

*Has legē, atque illas : meliora vtrunque*

*Sed tamen hauri.*

HOMER I Ilias & Odissea.

*Princeps sonori carminis, & virum*

*Praeco inuidendus, dum fera proelia,*

*Et cantat errores Plixi,*

*Mentem acuit simul, atque linguam.*

EV RIPIDIS tragoediae.

*Prodesse vates si solet optimus,*

*Delectat idem : quem Sapiētia,*

*Et mater effinxit Poësis,*

*Fecerit Euripides vtrumque.*

PINDARI carmina Graeca Latine code  
uersa.

*Laudes virorum factaque fortium*

*Late sonanti si celebras lyra,*

*Quos nulla delebit vetustas*

*Pindaricos imitare cantus.*

M. TVLLII orationes tribus volumini-  
bus.

*Lumina Romanae vt referas & fulmina linguae,*

*Affidua hunc versa nocte dieque manu.*

M. TVLLII libri omnes ad Rhetoricam  
pertinentes.

*Rhetoricae praecepta artis meditare? Magister.*

*En tibi Romani Tullius eloquij.*

**PETRI** Ioannis Perpiniani orationes.  
*Quae rhetor praecepta tibi, quae exempla daturus,  
 Expressa hic Petrus Perpinianus habet.*

**PEFRI** Angelij Bargaei poemata omnia.  
*Quaeis armis volucres, quaeis capias feras,  
 Quaeis suscepta animis sine pla proelia,  
 Vix vno Angelius Virgilio minor,  
 Dicit carmine nobili.*

**CL. CLAVDIANI** opera.  
*Et cultum & lepidum carminis accipo  
 Auctorem: hic nitidis floribus, ut caput  
 Ornes conspicuo munere Principum,  
 Nectes ferta virgentia.*

**PRVDENTII** Iuueni Aratoris & Se-  
 dulij carmina.  
*Auditis varijs nominibus stupet?  
 Non hic monstra deum turpia, sed leges  
 Sanctas historias, sacraque carmina  
 Vno iuncta volumine.*

**TESTAMENTVM** Nouum Graece.  
*Doctrina & Pietas sacro ligantur  
 Vinclo: nec poterunt suas obire  
 Partes, si dirimas. Dei hinc amorem  
 Fac discas simul Atticamque linguam.*

**EVRIPIDIS** tragoediae.  
*En ridet rutilo liber colore,  
 Arrides oculis, manumque tendis,  
 Subrident alij, tibi que plaudunt.  
 Hos fructus peperere tot labores.*

• 150 SOPHOCLES tragoediae.

Doctarum Sophocles comes sororum,

Et princeps tragicae locutionis,

Quo nil est grauius disertius ve,

Scribas vt bene fabulam, docebit.

P. CORNELIVS Tacitus.

Ipse quidem Tacitus loquitur nullo ore tacendus:

Sed tamen est visus saepe tacenda loqui.

M. ANTONII Mureti orationes.

Disce hinc quid Pietas, quid possit Copia linguae,

Post sua Muretus funera, nullus obit.

APPIANI Alexandrini historia.

Historiae pars magna urbis, patrumque,

Et palmae, & elades, vnde petantur habes.

M. MANILIVS & Boëtius, de conso-

latione.

En qui lucida sidera,

En qui mentem auidam quod regat, admonet.

Est mole exigua liber,

Immensi sed opus ponderis est loco.

HIERONYMVS Vida, & Sannazarius.

Quid praesentia saecula

Frustra deprimimus turpiter inuidi.

Est hoc nobile par virum,

Quos laudent etiam pristina saecula.

Sententiae poetarum.

Ex hortis Sapientiae

Flôres auricomos, quos tulit optima

Vatum Romulidum manus,

Hic textos modicus fasciculus dabit.

IIIIVT.M

Q 3

P I N.

PINDARVS cum reliquis Lyricis octo.

Hic mel Mopsopium fert apud Attica.

Hic large bibitur Pindaricum melos.

Hinc disces varij carminis artifex.

Cantus Pieria quos socias lyra.

AESOPUS Phrygis fabulae.

Subinuolucro fabulae abdit Aesopus.

Res serias, humanae & utiles vitae.

Vt litterarum exordia hinc forent priscis.

Crede. Hoc eris prudentior libro lecto.

HEROCLIS commentarius in aurea

carmina Pythagorae.

Scriptor magnanimi proposui tenax.

Versus Pythagorae detegit aureos.

Plusque omni facit auro.

Clarum, ac magnanimum virum.

PAULI Manutij epistolae.

Paulus adest Tulli sapiens imitator.

Cum legis hunc, teneas. addubitare queas.

C. CAESARIS commentarij.

Caius Iulus hic est, nouit qui maxima quondam

Scribereque, & facere.

Tu quoque confidisse hinc, possis ut maxima quondam

Scribereque, & facere.

C. SALLUSTIUS Crispus.

Thucydidi oppone, Herodoto feliciter aequa.

Fabi aemulum Sallustium.

Hic neutro minor est. Iuuenis cape. tresque libello

Iunctos in vno pellege.

M. TVLLII



M. TVLLII epistolae ad Atticum.

*Quae via, quae ratio, ad carum cum scribis amicum  
Optima sit, scribens Tullius ipse dabit.*

A. GELLII noctium Atticarum libri.

*Aulus ne Gellius, an Agellius, quaerunt,  
Dicatur is, qui scripsit Atticas noctes.*

*Hic ille. Sane pulcher. Hunc libens sime.*

*Cum res datur fruenda, nil moror nomen.*

I. V. S. TANI historia.

*Quas scripsere alij per multa volumina, terras,*

*Et extraxerunt regna, & arma gentium.*

*Iustinus librum egregie contraxit in vnum,*

*Vt sculptor Orbem marmore effingit breui.*

LACTANTIUS Firmianus.

*Accipe Lactanti quod tractes saepe volumen:*

*Hic Latias voces, ac pia dicta leges.*

M. TVLLII epistolae ad familiares.

*Cui dono aureolum nouum libellum?*

*An vero tibi, qui tuos sodales*

*Vicisti ingenio, elegantijque?*

P. OVIDII Fastorum, Tristium, & de  
Ponto.

*Et facile, & castum hoc carmen ne sperne poëtae.*

*Nullum aliud pueris aptius esse queat.*

M. TVLLII epistolae ad familiares.

*Hic auctor recte scribendi Tullius, hic est.*

*Nil magis egregium Romula lingua tulit.*

**Q. CURTIVS** de rebus gestis Alexandri  
Magni.

*Fortia Alexandri commendat proelia Magni,*

*Magnus & idem Curtius auctor.*

*Sic currit similis fonti, fluuioque liquenti,*

*Saepe hac te te prolue lymphæ.*

**VALERIVS** Maximus.

*Cur te praeteream Valeri? Tu maximus ille es,*

*Qui externam & nostram scribendo commemo-  
ras rem.*

*Tu cape, & his lectis, puer, oblectabere chartis.*



# EPILOGVS

PVER. & FAMVLVS GLORIAE



IRTVS, Poësis, Gloria,  
Voluptas, Honor,  
Iustitia, Aristus, Trophi-  
mus, Ergastus, duplex  
Panurgus, adde Musicam,  
& Famam leuem.  
Et quidquid aliud fabu-  
lae haec species tulit:  
Venere cuncta huc deni-  
que: ad summam, data

Sunt dona paucis, pauca: cum multis ego

Expers, & expes munerum, atque inglorius,

Quod gratius est, relinquo. Haud culpa mea.

Saltem addidissent, aleam certaminis

Tentare noluisse: nec tantum hiscerem.

Non victus est, qui caruit aduersario.

Nunc prouocandi ad iudices nullus locus,

Nullum

Nullum

Nullumve tempus. Ista si scissem prius,  
 Extrema sane imposita non esset mihi  
 Persona, tantum vt more soltemini, ac modo  
 Hoc iam recepto, Vos valete & plaudite,  
 Nec aliud vltra dicerem. Verba heu data,  
 Mihiq; fucus factus. Oratos velim  
 Vos Principes amplissimi, vt vestra bona  
 Cum gratia, illis gratiam referam parem.  
 Lufere me, ludantur. Ignoscunt, puto,  
 Aliqui: probabunt plurimi: saltem quibus  
 Nullum est tributum praemium: & socios iuuat  
 Poenarum habere: vt est vetus prouerbiū.  
 Stomachum mihi haec fecere. Sed puerum statim  
 Credo vocabunt. Scilicet. Quid postea?  
 Ringantur, ora contrahant. Ego me vtrum  
 Ostendam: & animum explebo: & vlciscar probe.  
 Exilius quid culice? formica minus?  
 Formicae inest sua bilis, & culici sua.  
 Qui gesserit se pro ouicula, hunc mandet lūpus.  
 Etiam hoc fatebor. Verba, sed communia,  
 Quibus agerentur gratiae, quae iam diu  
 Magno labore edidici, abisse intelligo:  
 Fugere cuncta: iustus excussit dolor.  
 Ego quoque abibo. Neminem vestram moror.  
 FAMVL. Mane, mane: Hoc te Gloria ornat munere.  
 Quamuisq; paruum, vt consulat aequi & boni.  
 Orat. PVER. Benigne. FAM. Hoc addit, adden-  
 dum quoque id manens par: spūlon vltimo  
 Aliud merenti, immo alia; post paucos dies.  
 Vt ista & animi, & ingeni clara indoles,  
 Atanisiq.

Atauisq; digna illustribus poscit tuis.

PVER. Tu, si placet, age gratias verbis meis  
Quam maximas. Ego nitar (& spero Deo  
Iuuante) vt eius dono, & istis laudibus  
Inueniar esse dignus. FAM. Ita fiet. Vale.

PVER. O quanta vis est munerum. Placant Deum  
Hominesque. Ad aegrimoniam certe meam  
Nullum admoueri lena sumentum magis,  
Magisve potuit sumentum efficax.  
Nubes vt attras diffat acer spiritus,  
Sic numera iras pectore abstergunt graues.  
Iam nunc rexixi: redijt ad notam domum  
Fugitiua mens. Mandata nunc tandem exequar,  
Vosque alloquit, & exordio sumpto nouo.  
Nulla alia danda causa sabellae fuit,  
Nisi vt darentur praemia. Et quamquam fuit  
Fortasse grauior illa, dum sententias  
Quasdam disertas alligat Iambo pedes.  
Vt mentibus inhaerere possent alius,  
Tenerumque pectus erudiretur magis.  
Voluere factum. Consili non poenitet.  
Nota est imago, qua Cleanthes dicitur  
Esse vsus olim: audire non fuerit leue.  
Vt noster, inquit, spiritus iactat sonum  
Tunc clariorem, longa quando illum tuba  
Angustiore duxerit tractum tubo,  
Patentiore vt exitu inueniat viam,  
Grauiusq; mentem suscitaret, & aures ferit:  
Haud aliter hominum sensa perspectissima  
Versus facit necessitas. Quae oratio

Soluta

Soluta promit, illico audita excidunt,  
 Et audiuntur segnius. Numeri simul  
 Pedesq. pulchram vinxerint sententiam,  
 Penetrabit illa, torta ceu neruo sonet,  
 Saueo & lacerto excussa. Sic inuit simul  
 Miscere dulce & vile. Hac iuuenes via,  
 Quo vera Virtus, quo Voluptas subdola,  
 Ducat, docere libuit: exemplo ut queant  
 Ficto moneri, & quicquid faciant, veline  
 Spectare finem. Hoc est opus Prudentiae.  
 Quis suscipit rem temere, post factum sapit.  
 Vos factum, & ipsa causa quae facti fuit,  
 Habetis omnes. Si quid auribus accidit  
 Animisq. gratum, gratulamur, gratias  
 Agimus, habituri semper. Ingratum accidit,  
 Nollemus esse factum. At est factum tamen:  
 Vestrum omnium est ignoscere, & veniam dare,  
 Duplicemque nostram promereri gratiam.  
 Sed, hoc, an illud fuerit, illustrissimi  
 Patres, virique Principes, Plausum date.

F I N I S.




---

R O M A E,  
 Apud Iacobum Ruffinellum.  
 M. D. X C.

# Errata sic corrige.

Pagina	versu	errata	lege
3	18	attollis	astollis
5	23	galeaeque	galeaeque
13	23	videns	viden
17	21	emula	aemula
19	16	rituque	rituque
20	21	queritur	queritur
21	29	vinens	vinens
34	7	Kal.	Non.
46	7	legendum	regendum
	18	seu	cen
64	14	aëre	aere
85	5	ser	ser
93	7	sepulchris	sepulcris
	30	vitur	vitur
95	22	Kaue	Haue
97	19	Tarentum	Tridentum
120	18	Iam	Tam
122	16	Solis	solis
141	9	hyems	hiems
155	24	presso	presso
161	9	Sensit	Sensit
164	7	nomine	numine
182	13	clamydum	chlamydum
187	7	Haelitum	Caelitum
	12	Hui	Cui
201	20	intueor	intuor
202	20	periculis	periclis
203	26	Funge	Lunge
207	12	propemodum	promendum
208	6	aëris	aeris
228	24	praescripta	perscripta
239	19	Virtutis	Virtus



# List of names.

John	1	1
James	2	2
William	3	3
Robert	4	4
Thomas	5	5
Richard	6	6
Henry	7	7
George	8	8
Edward	9	9
Charles	10	10
John	11	11
James	12	12
William	13	13
Robert	14	14
Thomas	15	15
Richard	16	16
Henry	17	17
George	18	18
Edward	19	19
Charles	20	20
John	21	21
James	22	22
William	23	23
Robert	24	24
Thomas	25	25
Richard	26	26
Henry	27	27
George	28	28
Edward	29	29
Charles	30	30
John	31	31
James	32	32
William	33	33
Robert	34	34
Thomas	35	35
Richard	36	36
Henry	37	37
George	38	38
Edward	39	39
Charles	40	40
John	41	41
James	42	42
William	43	43
Robert	44	44
Thomas	45	45
Richard	46	46
Henry	47	47
George	48	48
Edward	49	49
Charles	50	50
John	51	51
James	52	52
William	53	53
Robert	54	54
Thomas	55	55
Richard	56	56
Henry	57	57
George	58	58
Edward	59	59
Charles	60	60
John	61	61
James	62	62
William	63	63
Robert	64	64
Thomas	65	65
Richard	66	66
Henry	67	67
George	68	68
Edward	69	69
Charles	70	70
John	71	71
James	72	72
William	73	73
Robert	74	74
Thomas	75	75
Richard	76	76
Henry	77	77
George	78	78
Edward	79	79
Charles	80	80
John	81	81
James	82	82
William	83	83
Robert	84	84
Thomas	85	85
Richard	86	86
Henry	87	87
George	88	88
Edward	89	89
Charles	90	90
John	91	91
James	92	92
William	93	93
Robert	94	94
Thomas	95	95
Richard	96	96
Henry	97	97
George	98	98
Edward	99	99
Charles	100	100